

تطبؤتان بكنبة تاهمز

أم العروب

تألیف عبد محمّب دجوده السِحِتّ ار

> (گناکشر مکت بترمصیشر ۳ شناره کامل شکق الغمالا

الفصل الأول

تردد رنين الجرس الخارجي في أرجاء الشقة ، ففتح حسين عينيه فوقعتا على زوجته زينب ، الراقدة إلى جواره تغط في نومها ، وتتابع الرنين فأزاح الغطاء بعيدا عنه وهو ينهض ، فرأى ابنته هالة تتمطى في سريرها الصغير ، الملتصق بسريرهما من جانب زينب ، فخشى أن يوقظها ذلك الرنين المتواصل ، فهب مسرعا وانطلق حافى القدمين إلى المطبخ والتقط وعاء اللبن واتجه إلى باب الشقة وهو يهرول .

انفرج الباب عن فتحة تكاد تسمح بمرور الوعاء ، ومد يده به ، وهو يخفى وجهه عن بائع اللبن ، فقد أحس أن شعره منفوش ، وعينيه ما زالتا منتفختين من أثر النوم ، وأن البيجاما التي يرتديها كانت من قطعتين مختلفتين !

وشعر بثقل اللبن في الوعاء ، فسحب ذراعه ، وأغلق الباب في حذر ، حتى لا يرتفع صريره ويوقظ النائمين ، وسار على أطراف أصابعه إلى المطبخ ، ثم عاد إلى غرفة نومه ، واندس في السرير ، وسحب الغطاء وأغمض عينيه ليستأنف النوم اللذيذ .

وتقلبت هالة في سريرها ، وبكت بصوت بدأ منخفضا ثم أخذ في الارتفاع ، فمد ذراعه من فوق زوجته ، وراح يتحسس الحلمة المطاط المشبوكة في صدر هالة ، حتى عثر عليها ووضعها في فمها ، ولكن هالة

لم تكف عن البكاء ، بل انقلب صياحا ، فنحى الغطاء عنه فى غيظ ، فانكشف ذراع زينب ، وقام ليغادر الغرفة حافى القدمين إلى المطبخ ، وهو ينظر إلى زوجته وابنته التى عكر عويلها صفو السكون ، فألفى زوجته تمد يدها وتسحب الغطاء عليها دون أن تفتح عينيها ، وتروح فى سبات وقد ارتسم على وجهها هدوء عجيب .

ووصل إلى المطبخ ، وبكاء ابنته يصك أذنيه ، فتناول علبة الكبريت ، وأخرج منها عودا في عجلة ، وحاول أن يشعله ، ولكن العود انكسر ، فأخرج آخر وأشعله في لهفة ، ثم أوقد « وابور السبرتو » ووضع فوقه وعاء اللبن .

و لم يشأ أن يضيع وقتا ، فأخرج من النملية زجاجة ركبت فوق فوهتها حلمة من المطاط ، وذهب إلى الحوض ، وأخذ يغسلها فى عناية ، ثم وضع فيها قمعا ، وعاد إلى وعاء اللبن الموضوع فوق « وابور السبرتو » .

واستمرت هالة في بكائها ، فجعل يتململ في وقفته ، وينظر إلى النار في توسل يتعجلها .. وأخيرا رفع الوعاء وصب اللبن في الزجاجة ثم ألقى القمع في الحوض ، وراح يركب الحلمة المطاط .

وفتح صنبور الماء ، ومديده بالزجاجة ليبرد اللبن ، واستمر الماء يجرى فوق الزجاجة ، حتى إذا حسب أن حرارة اللبن أصبحت مناسبة ، رفع الزجاجة إلى فمه ، ومص من الحلمة مصة فإذا باللبن يلسعه ، فعاود وضع الزجاجة تحت الماء في ضيق ، فبكاء هالة كان يدوى في المطبخ . وأغلق صنبور الماء ، وعاود مص الحلمة مرة أخرى ، وهو في انطلاقه

إلى هالة ، ليطمئن إلى مناسبة درجة حرارة اللبن ، ورفع بصره إلى الساعة المتواضعة المعلقة في الردهة ، فإذا بها تشير إلى السادسة ، وأخرج الحلمة من فمه ، ومسحها بيده ، ثم هرول إلى غرفة النوم .

وألقم هالة الحلمة ، فكفت عن البكاء ، وأخذت الزجاجة بين يديها فوقف ينظر إليها برهة ، وقد تفجرت ينابيع الحنان في جوفه ، وانبسطت أساريره ، ثم دار حول السرير ليأخذ مكانه إلى جوار زينب ، ولكنه ما إن هم بالرقاد ، حتى عاود القيام ، فقد تذكر شيئا هاما :

خرج من الغرفة ، وسار فى ردهة طويلة ، حتى بلغ غرفة مغلقة ، ففتح بابها فى حرص ونظر . كان فى الغرفة ثلاثة أسرة ، رقدت فيها بناته الثلاث ، أحلام ونبيلة وسوسن .

كانت أحلام فى الثامنة عشرة ، مكتملة النمو ، بيضاء البشرة ، تبعثر شعرها الأسود الفاحم على الوسادة ، وارتسمت على شفتها بسمة ، ودارت فى فراشها نصف دورة ، فارتفع صدرها الناهد ، وامتدت إحدى ساقيها العاريتين وتقلصت الأخرى ، كانت فى حلم لذيذ من أحلام الشباب .

وكانت نبيلة في السابعة عشرة ، منفوشة الشعر ، مزججة الحاجبين ، رقيقة الشفتين ، وكانتا تتمتان ، فهي لا تكف عن الكلام حتى في نومها ، كانت ترتدى بيجاما ضيقة ، تكشف تفاصيل جسمها الرياضي .

وكانت سوسن فى الثامنة ، دقيقة الملامح ، وردية اللون ، سبطة الشعر ، تبدو فى نومها كملاك ، قد رفع ثوبها أثناء تقلبها ، فبدا بطنها

عاريا .

وتقدم يسترق الخطا ، وتناول أطراف الغطاء المكور تحت أقدام الحلام وسحبه في رفق فوقها ، ثم اتجه إلى نبيلة والتقط الغطاء من على الأرض ، وغطاها وهو ينظر إلى شفتيها الدائبتي الحركة ، فأشرق وجهه وبدا على فمه مولد ابتسامة .

وذهب إلى سوسن ، ورفعها فى رفق بين يديه ليعيد رأسها على الوسادة ثم أحكم غطاءها ، وراح يمرر يده على شعرها الكستنائي فى حب وحنان .

وانسحب من الغرفة ، وجذب الباب خلفه ، وقبل أن يغلقه ، وقف برهة وقد لمعت عيناه .

واتجه إلى الغرفة المجاورة ، وفتح بابها ونظر ، فإذا بثلاثة أسرة رقد فيها أبناؤه الثلاثة ، سامي ومراد وعاطف .

كان سامى فى الرابعة عشرة ، معتزا بشبابه ، ينام عاريا ، لا يرتدى إلا بنطلونا قصيرا من قماش أبيض ، وكان وجهه أشبه بوجه نبيلة ، كانت ملامحه توحى بطفولة ، ولكنه كان راضيا عن شكله كل الرضا ، وما كان يضايقه إلا تأخر نمو شاربه !

كان مراد فى الثانية عشرة ، تبدو فى رقدته شقاوة ، فآثار الحبر فى أصابعه وفى خده ، وقد أدخل زرار البيجاما الأول فى العروة الثانية ، ونام فى عرض السرير ، رأسه مدلى ورجلاه مرفوعتان على الحائط .

كان عاطف في الثالثة ، نام وقد وضع يده تحت خده ، وكور جسمه فدنت ركبتاه من ذقنه ، كان يرتدى قميصه وبنطلونه المخمل الأحمر ،

وفردة حذاء وجوربا أبيض في رجل ، ورجله الثانية عارية !

واتجه حسين إلى عاطف ، وخلع له الحذاء والجورب ، ثم أبعد خصلة الشعر الأصفر المتهدلة على وجهه عن عينيه ، وجذب يده من تحت خده في رفق ، فإذا به يتقلب في فراشه ، فخشى أبوه أن يستيقظ ، فوضع الغطاء فوقه ، وانسل من جواره في حذر وهو يتلفت .

وذهب إلى مراد ، وحمله بين يديه ، ووضع رأسه على الوسادة ، ثم غطاه ، وقبل أن يتحرك رفس مراد الغطاء ، ودار نصف دورة ، فإذا يرأسه يتدلى في الهواء ، وإذا برجليه ترتفعان وتستندان إلى الحائط ، عائدا إلى وضعه الأول . فتناول الأب الغطاء وغطى به ابنه ، وهو في وضعه ذاك ، دون أن يحاول إعادة رأسه إلى الوسادة .

ويمم صوب سامى ، وسحب عليه الغطاء ، فإذا بسامى يهب من نومه مفزوعا ، وينكمش في الزاوية البعيدة من السرير ، وقد فتح عينيه المحمرتين من أثر النوم ، وعلا رأسه شعره الذي كان أشبه بعرف الديك ، فبدا كأنما قد وقف من الخوف ، وراح يغمغم :

فقال أبوه وهو يجذبه في رفق :

_ نام .. ما فيش حاجه ..

نام سامى ، وسرعان ما أغلق عينيه ، فأسدل أبوه عليه الغطاء ، وتحرك عاطف فى سريره وتمطى ، فغادر الأب الغرفة هاربا .

ودخل غرفة نومه ، وفي طريقه إلى السرير مر بمرآة ، فتفرس في وجهه لحظة ، ومرر يده على شعره ، ثم هبط بها يتحسس التجعدات التي بدت

في صفحة وجهه ، ولاح في عينيه الأسى ، فقد مشت إليه الشيخوخة ولما يتجاوز الخامسة والأربعين!

وأُلقى بجسمه فى السرير ، وأغمض عينيه ، ولكنه أحس حركة فى الغرفة ، ففتح عينا واحدة ونظر فلمح عاطف قد أقبل ، فأغمض عينيه وتظاهر بالنوم .

وراح عاطف يتسلق السرير ، ثم أراد أن يتخطى أباه النائم ، فداس فوقه وغاصت رجله في بطنه وحسين صامت لا يتكلم ، وإن تحرك قليلا ليفسح له مكانا بينه وبين زوجته ، واندس عاطف بين والديه ، ووضع رأسه على الوسادة ، ثم وضع ساقا على أخرى وهو راقد .

وظل ساكنا لحظة ، وسرعان ما ضاق بذلك الصمت المسيطر على الغرفة ، فالتفت إلى أمه فألفاها مغمضة العينين ، فمد يده يفتح لها عينيها ، فتململت الأم في نومها وأزاحت يده بعيدا ، فلم يرتدع ، بل استمرأ فعلته ، فاعتدل في جلسته ليكون أمر فتح عيني أمه بيديه ميسورا .

وضاقت أمه بإلحاحه ، فأولته ظهرها لتبعد عينيها من يديه ، فإذا به ينهض ويمتطيها ، فدفعته بمرفقها فسقط على أبيه الذى تلقاه بين يديه ، وحمله ووضعه على الأرض ، وقال له :

- ــ روح صحى نبيلة .
 - ــ اديني قرش قبله .
- ـــ دلوقت لما اصحى .
- ـــ ما انت صاحى أهو . اديني قرش بقي .

ونهض حسين واتجه إلى حيث علق ثيابه ليعطيه قرشا ، ويريح رأسه ، كان واثقا من أن عاطف لن يكف عن طلبه حتى يأخذ ما يريد .

ومدت زينب يدها إلى هالة تتحسسها ، وهي مغمضة العينين حتى لا يفر النوم منهما ، وراحت يدها تتجول على جسمها ، حتى إذا بلغت نهاية ظهرها ، تقلص وجهها تقززا ، وفتحت عينيها وأزاحت الغطاء عنها ، ونهضت لتحمل ابنتها وتغادر الغرفة .

وأخذ عاطف القرش ونظر إليه مليا ، ثم أعاده إلى أبيه وهو يقول : __ لأ ما اخدش ده ، عايز قرش مخروق .

و كانت الأم قد دنت منهما وهي تحمل هالة بين يديها .

فقالت لزوجها:

_ إيه الدلع ده ؟ ما حد ح يتلف أمله غيرك .

فقال حسين لابنه في زجر:

_ ما فيش غير ده .

فراح عاطف يصيح في بكاء :

ـــ أنا مالى عايز قرش مخروق .. عايز قرش مخروق .

وكانت زينب قد غادرت الغرفة ، فإذا بها تصيح من الحمام :

ــ عندك قرش مخروق تحت المخدة .

فابتسم حسين وقال:

_ حنينا!

وأخذ عاطف القرش وذهب إلى حيث يرقد إخوته ، واقترب من مراد وقال له وهو يمد يده بالقرش :

ــ خد .. اديني حاجه ..

فتح مراد عينيه فرأى القرش ، فرفع رأسه المتدلى وأنزل رجليه من على الحائط ، ونهض مسرعا ، وقبل أن يغادر فراشه كان قد التقط القرش بين أصابعه . وغادر الغرفة وعاطف فى أثره ، واتجه إلى صوان صغير فى الردهة ، وفتحه وأخرج منه صندوقا من الورق .

بدأت الحركة تدب في الشقة ، فقد استيقظت نبيلة ووقفت على باب غرفتها ، واستيقظ سامى وظهر عند باب غرفته وقد وضع فوطة فوق كتفيه ، ولمحته نبيلة فانطلقت مسرعة على أطراف أصابعها كراقصة الباليه لتبلغ دورة المياه قبله ، فقال لها سامى في غيظ :

_ أدى اللي انت فالحه فيه .

فقالت له .

_ أحسن منك ، مش فالح في حاجه أبدا .

وارتفع صوت الأم من الحمام:

_ اصطبحنا!

فقال سامي في عناد:

ــ تعالى شوفى صابحه ترقص ازاى !

وارتفع صوت نبيلة من بعيد:

- باقول لك ما لكش دعوه بيه .

وإذا بصوت الأم يدوى:

ـــ وبعدين معاكو .

وصمت سامي ونبيلة ، وصاح عاطف وهو يعيد قطعة السمسمية

إلى مراد :

_ مش عايز دى .. أنا أنقى ..

وقدم مراد الصندوق إلى عاطف ، وهو يقول :

_ خد اللي انت عايزه .

ومد عاطف يده ينتقى ما يريد ، وقال سامى وهو يضم الفوطة إلى صدره :

_ مش ح تبطل التجارة دى يا مراد ؟

فقال له مراد بصوته الخارج من كل حنجرته ، وقد نفرت عروق رقبته :

_وانت مالك .

وخرجت سوسن من غرفة أبيها وفى يدها قرش ، واتجهت إلى مراد تشترى منه قطعة حلوى ، فقال سامى :

... الهف فلوس العيال .

فصاح مراد:

_ يا ماما حوشي سامي .

فصاح سامي:

_ يا ماما ح يعيي الأولاد بيجيب حلاوة زي الزفت .

_ مش أحسن م الحلاوه اللي بتجبها ؟

فقال سامي وهو يحاول أن يأخذ الحلاوة من يد سوسن :

_ دى وساخه ..

فقالت له سوسن وهو تبعد يدها عنه:

ـــوانت مالك ؟

والتفت سامي إلى مراد وقال :

_ فيه خمسه صاغ تكسب خمسه وعشرين قرش ؟. دا نصب . وارتفع صوت الأم :

_ ما بس بقى يا سامى .. لازم تسمعوا حسنا للجيران ع الصبح ؟ واستمر سامى في هجومه :

__ ح يعمل إيه بالفلوس دى كلها ؟ أهو بكره يركب بيها عجل ويقطع هدومه .

وهتفت الأم في ضيق :

ـــ ما تقوم لولادك دول .. دى حاجه تقصر العمر .

وخرج الأب من غرفته ، وقال في هدوء :

ـــ ما بس بقى . يالا البس انت وهو مافيش وقت .

وسار سامى إلى دورة المياه ، وسرعان ما ترددت أصوات طرقاته على الباب ، وذهب عاطف إلى الصوان يعبث فى محتوياته ، وخلع مراد جاكتة البجاما وألقاها على الأريكة الموضوعة فى الردهة ، وراح يخلع بنطلونها وهو فى سيره ، ثم ألقاه على كرسى وغاب فى غرفته قليلا ، ثم عاد يصيح :

ــ مش لاقي فردة الجزمة.

وراح مراد يزحف على الأرض وينظر تحت المقاعد منقبا عن حذائه ، ودخلت سوسن غرفة أمها وقالت :

_ مش لاقيه المشط.

وصاح مراد:

_ المشط أهه تحت الكنبة ، أمال الجزمة فين ؟

فقالت سوسن:

_ شفتها ع الترابيزه في الأوضه المفروشه .

وأقبلت نبيلة على أطراف أصابعها ، ومرت في حركة راقصة بعاطف دون أن تلتفت إليه ، ثم انسلت إلى غرفتها كالطيف وقد بدأت في خلع جاكتة البيجاما .

وخرجت سوسن إلى حيث كان مراد ، وأخذت المشط السذى أخرجته من تحت الأريكة ووضعته فوقها ، وراحت تمشط شعرها وهى في طريقها إلى المرآة ، ومرت بعاطف ، ورأت ما يفعله ، فانطلقت إلى أمها مسرعة ، وهي تصيح :

_ ماما .. ماما .. الحقى عاطف .

_ماله ؟!

_ بدر علبه الخيط .

فأسرعت الأم اليه فإذا بخيوط حمراء وصفراء وسوداء قد التفت على يده ، وامتدت منها إلى البكر المبعثر على الأرض ، فضربته على ظهره ، وهي تقول :

__ هو انتو قرود ا

وراحت تلتقط البكر وتلف كل خيط على بكرته .

وقامت أحلام من نومها تتمطى ، ولمحتها نبيلة في المرآة وهي ترتدي ثياب المدرسة وتصفف شعرها ، فوجدت الفرصة سانحة لتتحدث ، فاندفعت تحدثها عن المدرسة والمدرسات والمدرسين ، وكانت تتكلم بحاجبيها وعينيها ويديها ، وتطول وتقصر وتمثل ، وتلفتت أحلام في الغرفة فألفت ثياب نبيلة المنزلية مبعثرة هنا وهناك، فقالت وهي تنهض:

_ ما تعلقي هدومك .

فتلفتت نبيلة في الغرفة ، ثم قالت وهي تسرع بالهرب :

ـــ اتأخرت قوى ..

فقالت أحلام وهي تلتقط بنطلون بيجامة نبيلة من الأرض.

_ طول عمرك زواغه .

وذهبت نبيلة إلى حيث كان أبوها ، وقالت له :

ــ عايزه خمسه وعشرين قرش.

_ ليه كان ؟

_ ح نروح رحله لسقاره .

وبلغ ذلك الحديث مسامع سامي ، فخرج من غرفته مسرعا ، وهو يرتدى القميص ويدس رجله في البنطلون ، وصاح :

_ ما تديهاش يا بابا .

فالتفتت إليه نبيلة في غضب ، وقالت له مزمجرة :

ــ وانت إيش حشرك ؟

ولم يأبه لا عتراضها ، بل استمر في وسوسته :

ــ عايزه تجرى على حل شعرها مع البنات المايعه .

وقالت نبيلة في صوت خنقته العبرات :

_ عاجبك يا بابا قلة الأدب دى ؟

واستمر سامي في هجومه:

_ لو سمعت كل واحده فيهم وهي بتطق الضحكه ..

وصاحت الأم في حدة:

_ و بعدین معاکو ؟! دا ما بقاش بیت .. دی سرایة مجانین .

ولم يزدجر سامي ، بل ازداد عنادا ، ورأى أبوه أن يهاجمه حتى

يسكت ، فمد يده إلى الكرافتة التي في عنقه وقال وهو يعبث فيها :

_ هو نت مش ح تخلى لى حاجه ألبسها أبدا ؟! الشرابات وقطعتهم ، والمناديل وضيعتهم ، ح تندار ع الكرافتات ؟

فقال سامي في هدوء:

_ ما عندیش کرفتات .. هات خمسین قرش اشتری کرفاته .

فصاح أبوه في وجهه ليبعده ، حتى لا يلح في طلب النقود :

ـــ طب غور من وشي .

وانسحب سامى فى هدوء ، وهو يسوى الكرافاتة ، ودنت سوسن من أبيها ترقبه ، فلما رأته يمد يده فى جيبه ويعطى نبيلة خمسة وعشرين قرشا تشجعت وقالت :

_ وأنا عايزه عشره صاغ .

__ علشان ایه ؟

_ أشترى مسطره وكراسه وعلبة ألوان .

فصاحت الأم وهي تضع الحلمة المطاط في فم هالة:

ـــ هو كل يوم علبة ألوان! فين العلبة اللي جبتيها أول امبارح؟

ــ كسرها عاطف .

(أم العروسة)

فقال الأب في هدوء:

_ العصر أجيب لك الكراسة والمسطرة وعلبة الألوان .

فقالت في بكاء تمثيلي:

_ وانا مالي .. عندنا رسم أول حصه . الأبله تضربني .

وناولها الأب عشرة قروش ، ورأى مراد سهولة دفع النقود فأقبل

وهو يصيح من حنجرته:

_ وأنا عايز فلوس المجموعة ، الأستاذ طلبها امبارح قلت له بكره .

فقال الأب:

ـــ والنهارده قل له بكره .

فقال مراد وهو يلوح بيده في ضيق :

ایه ده ؟

ونظرت أمه إلى حذائه الأصفر الذي ذهب لونه ، وقالت له :

_ دی جزمه تخرج بیها ؟

... ما قلت لكم عايز جزمه ما رضيتوش.

فقالت له الأم في ضيق:

_ حرام عليك دى ما بقلهاش شهر ، روح امسحها .

_ ما فيش ورنيش .

_ والعلبه اللي اشتريتوها امبارح ؟

_ خلصت .

ولم ينتظر في الغرفة ، بل انسحب يائسا ، ونظرت الأم خسلال الباب ، فلمحت أحلام تلتقط ملابس إخوتها المبعثرة في الردهة ، وتعيد

تنسيق الأثاث فنادت:

_ أحلام : املى القلل واعملي الشاى .

وأقبلت نبيلة من غرفتها ، وقد وضعت حافظة كتبها على عجزها ،.

وأسندتها بذراعها ، ودنت من أحلام وقالت لها :

ــ اشتغلى ما دام قعدتى في البيت .

فالتفنت إليها أحلام وقالت:

_ بكره تقعدى في البيت انت رحره .

فقالت نبيلة في تمثيل ، وهي تسير في خطوات راقصة :

ـ لا .. دا مستحيل .. أنا ح ادخل الجامعه .

وخرج سامي من غرفته وقد أتم ارتداء ملابسه ، فقال وقد اتخذ هيئة رجل :

__ دا بعدك .

فصاحت نبيلة:

ــ يا ماما . خلى الشيخ أبو العيون ده يسكت .

فقالت الأم:

_ هو لولا العربيه اللي بتيجي تاخدك من باب البيت وتجيبك لباب

البيت كنت وديتك المدرسه ؟

وقال الأب لينهي هذه المناقشة قبل أن تحتدم:

_ أمال عاطف فين ؟

فقالت سوسن:

_ نزل الشارع .

- فقالت لها الأم:
- _ انزلي هاتيه .
- _ أنا اتأخرت ، راحة المدرسه .
- __ ماتنزلیش قبل ماتفطری .. عندك جبنه رومی فی النملیه ، اعملی یانبیله لأختك سندویتش .

وتحركت نبيلة إلى المطبخ تتبعها سوسن ، وسرعان ما لحق بهما سامى ومراد، وامتدت الأيدى إلى وعاء الخبز، ثم امتدت في تسابق إلى الصحفة التي وضع فيها الجبن، فكأنما جراد نزل بحقل ولم يغادره إلا بعد أن أصبح يبابا قفرا! وارتفع صوت بوق سيارة ، فصاحت نبيلة وهي تجرى :

ـ عربیتی .

وراح سامي ومراد وسوسن ينسلون من المطبخ في طريقهم إلى الباب الخارجي ، وصاحت سوسن قبل أن تخرج :

_ ماما .. الحقى ، خلصوا الجبنه .

فأسرعت الأم إلى المطبخ وهي تقول:

ــ يبقى جنان .. وانا لسه مشترياها امبارح .

ونظرت فوقع بصرها على آثار المعركة ، فتات من الخبز تناثرت على المنضدة القريبة من النملية ، وصحفة خالية وورقة كانت الدليل الوحيد عن أنه كان ملفوفا بها شيء دسم ، وضربت كفا بكف وعادت إلى حيث كان زوجها وقالت :

ــ خلصوا الجبنه .

فقال في هدوء:

- _ خليهم ياكلوا .
- فقالت في استنكار .
- _ ياكلوا! مش ناقص إلا ياكلونا.

وكان الزوج قد أتم ارتداء ملابسه ، فنظر في ساعته وتحرك خارجا من الغرفة ، فصاحت الأم :

_ أحلام ! هاتي الشاي لبابا واقلي له بيضتين يفطر .

فقال الأب وهو سائر وزوجته خلفه :

_ وانتو مش ح تفطروا ؟

_ لسه بدرى . لما نخلص مرار الشقه .

وجلس على الأريكة الموضوعة فى الردهة ، وأسرعت الزوجـة ووضعت أمامه منضدة صغيرة .

وجاءت أحلام تحمل كوبا من الشاى ، وجلست الزوجة بالقرب من زوجها ، وقالت :

- _ ح تتغدوا إيه النهارده ؟
 - _ أي حاجه .
- وبدأ يرتشف الشاي ، فقالت :
- _ ما تدوخوناش .. شوفوا تاكلوا إيه ؟
 - وارتفع صوت أحلام من المطبخ :
 - ــ فاصوليا بيضه .
 - فقالت الأم في استنكار:
 - _ ما احنا لسه طبخينها أول امبارح .

فقال الأب:

_ اعملوا صينية بطاطس.

فقالت الزوجة معترضة :

_ هو ما فيش إلا الفاصوليا والبطاطس ؟

فقال الزوج :

_ اطبخي اللي على نفسك .

_ لا ماتحيرونيش .. قولوا تاكلوا إيه ؟

وأقبلت أحلام تحمل صينية صغيرة ، عليها رغيف وصحفة من الألمونيوم قلى فيها بيضتان ، وغطاء علبة بلاستك وضع فيه الملح ، وطبق فنجان شاى فيه قطعة صغيرة من الجبن الأبيض ، ووضعت الصينية أمام أبيها .

ومد الأب يده إلى الرغيف ، وإذا بصوت ارتطام حذاء صغير بالباب الخارجي يتتابع ، فقالت الأم لأحلام :

_ افتحى .. عاطف طلع .

وأسزعت أحلام إلى الباب وفتحته ، فدخل عاطف ، وجرى إلى حيث كان أبوه ، ونظر في الصينية وقال :

_ بتأكل إيه ؟

ــ بيض .. تعالى كل .

فقال عاطف وهو يهز أكتافه :

فقالت الأم لابنتها:

_ عندك بيض ؟

__ أبدا .

فالتفتت إلى عاطف وقالت له:

_ اطلع شوف بيضه عند الفراخ .

وتحرك عاطف ، وقالت له أحلام :

ـــ وإذا ما لقيتش بيضه ، استنى فوق لما الفرخه تبيض .

فقالت الأم في حنان :

_ ليه كده يا بنتى .. دى الشمس تقوره .

_ لسه الشمس ما جتش في السطح ، خلينا نستريح شويه .

وبكت هالة ، فأسرعت الأم إلى حيث ترقد وهي تقول :

_ والله ما ح نستریج أبدا .

ودخل عاطف المطبخ ، وأخذ كرسى مطبخ صغير ، وحمله على كتفه ، ثم سار منطلقا نحو السطح .

كانت عشة الدجاج مصنوعة من سلك وخشب قابعة فى ركن من السطح ، فذهب مهرولا إليها ، ونظر من خلال السلك ، وأدار عينيه فى العشة ، فلم يجد بيضا ، فوضع كرسى المطبخ بالقرب من العشة ، وجلس وقد أسند خده بكفه ، ينتظر أن تجود عليه دجاجة بيضة !

وانتهى الأب من تناول الإفطار ، وتناهب للخسروج ، وإذا بزوجته تقترب منه ، وقد حملت هالة على ذراعها ، وتقسول

له :

ــ ما قلتش ح تتغدوا إيه النهارده .

وأسرع هاربا وهو يقول:

_ أي حاجه .

وأُغلق الباب الخارجي خلفه ، فقالت الزوجة في ضيق :

_ والله بطننا دى محيرانا .

الفصل الثاني

أحدت الشمس في الارتفاع ، وأرسلت أشعتها الحامية ، وعاطف جالس على كرسي المطبخ بالقرب من عشة الدجاج ، يتململ في جلسته ، ويجفف عرقه بيده ، دون أن يتطرق اليأس إلى قلبه .

وارتفع صياح دجاجة ، فإذا بعاطف يقوم مسرورا ، ويذهب إلى العشة ينظر من خلال السلك ، فيرى الدجاجة تبيض ، وراح يغدو ويروح أمام العشة في قلق الوالد الذي ينتظر وليده الأول !

وراح صوت الدجاجة يخفت ، فتيقن من أن البيضة تم وضعها ، اكتسب خبرة من ممارسته الانتظار الطويل بالقرب من العشة ..

وفتح باب العشة ، ودخل فإذا بالدجاج يفر منه مذعورا ، وإذا بصيحات الفزع ترتفع متتابعة ، فلم يلتفت إلى ما يجرى حوله ، بل سار إلى هدفه والتقط البيضة وخرج .

وهبط في الدرج مسرعا ، حتى إذا وصل إلى باب الشقة ، أخذ يركله بقدمه ، فأسرعت أمه تفتح له الباب وفي يدها مغرفة بها أثر اللبن .

ونظرت إليه فألفت الدم يكاد يفر من وجهه . فمالت تضمه إلى صدرها بيدها الخالية وتقول في حنان:

_ يا حبيبى ! كنت فى السطح فى النغره دى ؟ فقال فى فرح وهو يرفع يده بالبيضة :

- ــ جيت بيضه .
- _ طب روح لأحلام تسلقهالك .

وأسرع إلى المطبخ ، وعادت إلى حيث كانت ، راحت تغرف من حلة نحاس لبنا تضعه فى أوعية بلورية ، وعاد عاطف إليها ورفع رأسه وسأل :

- _ بتعملي إيه يا ماما ؟
 - _ مهلبية .

ولم ينتظر طويلا ، بل سحب كرسيا ، ووضعه بالقرب مسن « البوفيه » الذى صفت فوقه أوعية البلور ، وراح يتسلقه ، فقالت له أمه في زجر :

- _ ابعد .. الحله تقع عليك .
 - _أشوف .

ووقف فوق الكرسي ينظر ، ولم يطق صبرا ، فمد يده يحاول أن يأخذ المغرفة من أمه ، فقالت :

- __ عايز إيه بس ؟
- _ هاتي اغرف انا .
 - فصاحت الأم:
- ـــ أحلام . تعالى خدى أخوكى ادى له البيضه بتاعته .

وأقبلت أحلام ، ترتدى ثوبا بسيطا ، فوقه « فوطة » مسن البلاستيك ، ويقطر الماء من يديها ، وأرادت أن تجفف يديها في « الفوطة » ، ولكنها أخفقت فما كان البلاستيك ليمتص الماء ، فجففتهما

فی طرف ثوبها ، ثم لفت ذراعها حول وسطه ، وحملته بین ذراعیها وعجزها ، وسارت به وهو یهز رجلیه سرورا .

انطلقت به إلى المطبخ ، ووضعته على كرسى أمام المنضدة ، وأحضرت له البيضة ، وهمت بتقشيرها ، وإذا به يمد يده ويأخذها منها ويقول :

_ أنا اللي أقشرها .

وراح يقشرها ويرمى بالقشر على الأرض ، وأحلام غافلة عنه ، فقد تحركت تحضر له كسرة خبز ، وعادت بالكسرة ، ورأت القشر على الأرض ، فقالت في زجر :

ــ وبعدين معاك .. هو احنا مش ح ننضف أبدا!

ووضعت كسرة الخبز أمامه ، وانحنت تلتقط القشرة من الأرض .

ولاحظت تساقط فتات صفار البيضة ، فرفعت رأسها تنظر إليه ، فألفت عاطفا قد وضع البيضة كلها فى فمه ، وأخفق حلقومه فى ابتلاعها !

وأسرعت تملأ كوب ماء ، ثم عادت إليه مهرولة وهي تقول :

ــ اشرب .. ح تموت نفسك .

وشرب ، واختلط الماء بصفار البيضة في الكوب ، فقالت أحلام في . .

_ أنا عارفه إيه القرف ده ؟!

فقالت أمها وهي عائدة إلى الطبخ تحمل الحلة الفارغة والغرفة:

_ آهو كلكم اتربيتوا بالمرار ده ..

وغادر عاطف المطبخ ، وذهب إلى الكرسي الذي وضعه بالقرب من « البوفيه » وتسلقه ، وراح ينظر فوجد أن أمه قد وضعت زبيبا وفستقا على سطح المهلبية ، فأخذ يلتقط الزبيب والفستق ويلقى بهما في فمه ، ولم يكتف بذلك بل راح يعبث بأصبعه في المهلبية .

و جاءت أمه ، ورأت فعلته فحملته بين ذراعيها في غضب ، ووضعته على الأرض في شدة ، وهي تصيح فيه :

_ غور من وشي قبل ما اقطم رقبتك .

وراحت تصلح-ما أفسد ، وسرعان ما تجاوب رنين الجرس ، فهرعت إلى الباب وفتحته ، فإذا بسوسن قد عادت من مدرستها ، فقالت لها أمها زاجرة :

ـــ مش ح تبطلی تحطی صباعك ع الجرس علی طول ، والله لو صحیت هالة ما حد ح یشیلها غیرك .

فحركت كتفيها في عدم اكتراث ، واتجهت إلى غرفتها لتبدل ثيابها . وفيما هي في سيرها لمحت عاطفا يعبث في « التواليت ، فعادت إلى أمها مهرولة وهي تصيح :

ــــ ماما .. ماما .. الحقى عاطف دلق البودرة ، وحط الفيزلين فى راسه .

- __ أبعديه .
- ـــ مش عايز .

وأسرعت الأم إلى عاطف ، تبعده عن التواليت ، وتجمع البودرة المندلقة ، فإذا بهالة تستيقظ ، وتبدأ في البكاء ، فقالت الأم :

_ سوسن .. سكتى أختك .

فذهبت سوسن إلى هالة و حملتها ، ورفعت الأم عاطف بين يديها ، وذهبت به إلى الحمام ، ولمحت سوسن فيلا من الجلد على ظهر الصوان ، فخطر لها أن تحضره لتلاعب أختها به ، فوضعت هالة على حافة السرير ، وجاءت بكرسي ووضعته بجوار الصوان ، ووقفت فوقه ولكنها لم تصل إلى الفيل ، فجاءت بصفيحة بها « قراقيش » وبسكوت ووضعتها فوق الكرسي وتسلقت حافة الكرسي في حذر ، وهمت بالوقوف فوق الصفيحة ، فإذا بها تسقط على الأرض ، وقد أحدثت دويا ، وتناثر البسكوت والقراقيش ، ففرعت سوسن ، وهرولت فرارا من أمها إلى السطح . وتركت الأم عاطفا ، وأسرعت ترى ماذا جرى ، وهي تصيح :

_ يا شياطين .. يا ملاعين .. يا قرود .

وصاح عاطف من الحمام في بكاء:

ــــــ الصابون بيحرقني في عينيه .

فنادت الأم وهي في عودتها إليه :

_ أحلام .. تعالى لمي القراقيش والبسكويت .

وقالت أحلام في صوت عال:

_ ولما الحله إللي ع النار تشيط!

وذهبت إلى الحمام ، وراحت تغسل لعاطف وجهه ويديه وإذا بهالة تضج بالبكاء فارتفع صوت الأم :

ــ بس .. بس .. أنا جايه أهو .. أنا عارفة يا رب ليه دوختني ..

وذهبت إلى هالة وحملتها ، ثم راحت تجمع ما انتثر من البسكويت والقراقيش ، وجاء عاطف خلفها ، فقالت له :

ـــ لم معايا .

فانحنى عاطف ، والتقط بسكويتة ووضعها في فمه ، فقالت له في حنان :

_ باقول لك حط البسكويت في الصفيحة مش في بطنك .

وتهللت أسارير عاطف ، وعكف على التقاط ما انتثر ووضعه فى الصفيحة .

وأطمأنت سوسن إلى أن ثورة أمها قد خمدت ، فعادت إلى المطبخ ، وراحت تعبث بالقرب من النار ، فقالت لها أحلام :

_ ابعدى قبل النار ما تمسك في شعرك .

فتأخرت خطوات ، وما لبثت أن تقدمت إلى النار ، وفي يدها عود من قش المقشة تدنيه منها ، فصاحت أحلام بها :

ــ اخرجي من هنا .

وخرجت سوسن مطأطئة الرأس ، وجلست على الأريكة ، و لم تطق الصمت طويلا ، فتلفتت فوقع بصرها على المقص ، فتناولته وأحضرت صحيفة ، وراحت تقصها (عرائس) وما انقضى طويل وقت حتى كان المكان قد غطى كله بقصاصات الورق .

وخرجت الأم من غرفتها تحمل هالة ، ويسير خلفها عاطف وقد أمسك بملابسها ، فرأت قصاصات الورق تغطى الأرض ، فصاحت : __ يا مقصوفة الرقبه ، والله لانا عدماكي .

فتركت سوسن المقص، وأطلقت ساقيها للريح، وراحت تعدو نحو السطح ، وأخذت الأم تجمع القصاصات ، ولمح عاطف المقص فتناوله ، وحاول قص غطاء الأريكة ، ولمحته أمه ، فأسرعت تنتزع منه المقص وهي تصيح :

_ هو انتو عفاریت ، اخلصی یا أحلام ، و خدی هاله شویه .

_ ح انزل الحله وجايه .

وجاءت أحلام وحملت هالة ، وذهبت الأم تلقى قصاصات الورق ثم عادت وقالت لأحلام :

_ خدى اخواتك في أودتكم لما أريح شويه .

وأخذت أحلام هالة وعاطف ، وذهبت إلى حجرتها بينا تمددت الأم على الأريكة ، ولفت ذراعها فوق وجهها ، وما كادت تنعم بالاسترخاء حتى أقبلت سوسن صائحة :

_ ماما .. ماما .. الحقى مراد بيتخانق مع تلات اولاد .. ح يموت في إيديهم .

وهبت الأم من رقدتها ، وخفت إلى الشرفة فإذا بها ترى ابنها بين ثلاثة أولاد ، قد ضربوا حوله نطاقا ، إذا دفع أحدهم ليشق طريقه بينهم ، دفعوه الثلاثة مرة واحدة ، فيختل توازنه ويترنح ، فلم تطق صبرا بل صاحت في الأولاد :

_ ما تسيبه يا واد انت وهو .

فقال أحدهم وهو يرفع رأسه إليها:

_ خليه يدينا البرايه بتاعتنا .

... ما تديهم البرايه يا مراد .

فقال مراد متشجعاً لما سمع صوت أمه :

_ مش ح اديها لهم إلا لما يدوني المسطره والقلم الرصاص .

ولمحت سامي مقبلا ، فهتفت :

ــ سامي . هات اخوك واطلع .

ودنا سامي منهم ، فقال له مراد :

ــ واخدين مني المسطره والقلم .

فقال الثلاثة معا:

ـــوهو واخد مننا البرايه .

فقال سامي :

ــ هات البرايه .. هاتوا القلم والمسطره .

وناولهم المبراة ، وأخذ منهم المسطرة والقلم ، ودفع أخاه أمامه وهو يقول له :

_ ياللا يا خايب .

فصاح فيه مراد:

_ إيه .. ما لكش دعوه بيه .

وقالت الأم لهما من الشرفة :

ــ اطلع انت وهو ، واللا عايزين تفرجوا الناس علينا !

وعادت إلى الأريكة ، وتمددت فيها ، وداعب الوسن عيسنيها ، واستشعرت طعم الراحة ، وإذا بأصوات مراد وسامي وسوسن تمتزج وتصك أذنيها صكا فتصيح دون أن تفتح عينيها :

_ ما بس بقى .. هو ما فيش في البيت ده راحه ؟

واستأنفت نومها ، ولكن سرعان ما أقبلت سوسن ، تقول :

ــ ماما .. ماما .. آكل .

ودفعتها بيدها لتبعدها عنها ، وإذا بعاطف يقبل هاتفا :

ــ ماما .. جعنا .

فنادت الأم:

ـــ أحلام ، تعالى أكلى اخواتك .

وأقبلت أحلام ، ودفعت بهالة إلى مراد ، وانسلت الأم إلى غرفة نومها ، وارتمت في سريرها .

ووضعت أحلام لعاطف قليلا من الأرز في صحفة صغيرة ، ورشت فوقه ملوخية ، وأرادت أن تطعمه ، ولكنه أصر على أن يأكل وحده ، فتناول الملعفة وجعل يعبث في الأرز ، وطلبت سوسن أن يغرف لها الأرز وحده ، والملوخية وحدها ، ثم قالت :

ــ وحطى لى حتة لحمه سمينه .

فقالت أحلام في زجر:

ـــ وطى صوتك بلاش قلة أدب .

ونظرت سوسن إليها فى دهش ، فما كانت تدرى ما الخطأ الذى ارتكبته . وتناثر الأرز على صدر عاطف ، وعلى المنضدة ، وعلى الأرض ، ولما امتلأ راح يقرع الصحفة بالملعقة .

ونادت أحلام :

ــ مراد .. سامي .. أغرف لكم ؟

(أم العروسة)

فقالا معا:

والتفت سامي إلى مراد وقال له:

_ ح تاكل معانا بإيديك الزفت دى ؟. روح اغسلهم .

ــ طب خد هاله .

ـــوانا مالى .

فوضع مراد هالة على الأريكة ، وذهب يغسل يديه ويحاول أن يزيل الحبر منهما دون جدوى ! وارتفع بكاء هالة ، فتململت الأم فى رقدتها ، وخرجت أحلام من المطبخ تحمل عاطفا وقد تلوث وجهه وثيابه بالملوخية ، وقالت لسامى ، الذى خلع ثيابه ووقف بفائلة سبسور وبنطلون البيجاما :

- _ سكت هاله .
 - _ وانا مالي .
- _ طب خد عاطف شطفه .
- _ أمال انتم بتعملو ا إيه في البيت ؟
 - _ طب اسكت بلاش غلبه .

وارتفع صوت مراد وهو يغسل يديه مشتركا في الحديث :

- كفايه عليه يعمل ريس في البيت .
 - وصاحت الأم من غرفتها :
- ـــوالله يا سامي إن ما شلت أختك لقايمه ومخليه نهارك زى وشك .
- وخرجت سوسن من المطبخ ، وحملت هالة ، فصاحت أحلام فيها :

_ بتشيليها بإيديكي الوسخه!

فوضعتها سوسن على الأريكة ثانية وهي تقول:

_ أنا مالي . الحق على .

كان مراد قد يئس من تنظيف يديه ، فمسحهما تحت إبطيه وأسرع يحمل هالة .

وسارت أحلام إلى الحوض ، وهي تبعد وجهها عن يدى عاطف ، فقد كان يحاول أن يعبث بشعرها بيديه الملوثتين بالملوخية .

ورن جرس الباب الخارجي ، فذهب سامي إليه في تؤدة وفتحه فاندفعت نبيلة داخلة ، وهي تطوح حافظة كتبها في يدها ، وراحت تتحدث :

_ يا سلام لو شفتم اللى عملناه النهارده فى أبو الأسود الدؤلى ، دخل الفصل وقال لنا : (العواف) قلنا له : (الله يعافيك يا افندى) قال : (درس النهارده فى المفعول لأجله) قلنا له : (ما تحكى لنا الروايه اللى شفتها فى السيغ امبارح أحسن يا افندى) قال : (إيش عرفكم الى كنت فى السيغ ؟ » قلنا له : (أمانى شافتك يا افندى ، وبالأماره كنت قاعد قدام خالص يا افندى » قام قال : (أنا باقعد قدام علشان نظرى ضعيف » قلنا له : (بقى مش علشان آخر الشهر يا افندى » ؟

وكانت نبيلة قد وصلت إلى باب غرفتها ، فقال لها سامي :

ـــ ما كفايه بقى ، اقفلي الراديو ده .

فالتفتت إليه نبيلة وقالت في حركة تمثيلية :

_ وانت مالك يا بايخ ! هو انا باحكى لك ؟

- _ أمال بتحكى لمين ؟
 - _ باحكى لأحلام .

ورن جرس الباب الحارجي ، فصاحت سوسن وهي تهرول نحو الباب :

ـــ بابا جه .

وتخلص عاطف من یدی أحلام وراح یجری خلف سوسن ، وهو یصیح :

_ أنا اللي افتح له .

واستبقاً إلى الباب ، وفتحته سوسن قبله ، فراح عاطف يسبها :

__ يا قليلة الأدب .. يا سافله .

وقبل أن يستمر في سبابه ، لمح أباه يحمل كيسا ، فأسرع إليه وقال

له:

- _ إيه إلى معاك ده ؟
 - _ حاجه حلوه .
 - ـــ طب وريني .
 - _ لما ادخل .
- _ طب هات اشیلها .

فقالت سوسن :

_ لا أنا اللي اشيلها .

وأسرع سامى ومراد وهو يحمل هالة ليريا ما الذى أحضره أبوهما . ودخل الأب إلى غرفته ، وأبناؤه خلفه حتى أحلام ونبيلة لحقتا به ، واعتدلت الأم في السرير ، وقالت :

_ إيه ده ؟

فقال الأب في نشوة:

_ تفاح .

فقالت الأم وهي تغادر الفراش ، وتمد يدها إلى الكيس لتستولى عليه :

_ ما لوش لازمه النهارده . عندنا مهلبيه .

فصاح عاطف وسوسن ومراد وسامي:

_ احنا مالنا عايزين تفاح .. تفاح .

وقالت الأم في استسلام :

_ أحلام هاتي السكينه .

وذهبت أحلام وعادت بالسكينة ، وأخذت الأم تشق كل تفاحة نصفين ، وتدفع إلى كل من أبنائها نصف تفاحة ، فغضب عاطف وقال :

_ ما اخدش نص ، أنا عايز تفاحة بحالها .

فصاحت الأم في غضب:

_ ما فيش الأكده .

وغضب عاطف وخرج من الغرفة يبكى وأبوه يتبعه بعينيه فى أسى كان يريد أن يدخل البهجة على قلوب أبنائه ، فإذا به لا يجلب معه إلا النكد .

وأخذ كل منهم نصف تفاحته وهو صامت ، وإن كانت وجوههم

تنطق بعدم الرضا ، وقالت الأم :

_ خلوه لبعد ما تاكلوا حلوا بيه .

ولكن مراد وضع نصف التفاحة فى فمه ، وراح يلوكها ، وقالت الأم :

ــ أحلام .. نبيلة وضبوا السفرة .

وخرجت أحلام ونبيلة يتبعهما سامي ومراد ، وجاء عاطف يتمسح ثم قال وهو يمد يده :

_ طب هاتی .

ودفعت إليه نصف تفاحته ، وهي تربت على كتفه ، فقال لها :

ـــ مش أنا حلو بقى ؟

فقالت في حنان:

ـــقمر ،

وراح الأب يخلع ثيابه ، ودنت منه وقالت له :

ــ يا راجل اعقل . بلاش تبذير .

فقال في هدوء:

ــ دى الحكايه كلها وقه .

ــ اوعى لنفسك . طالع لك بنات ، ح يعوزوا تقلهم .

ــ ربنا هو اللي بيرزق.

ـــ والله ما انا عارفه لو واحده فيهم اتخطبت ح تعمل فيها إيه ؟

ـــ يبقى وقتها يعين الله .

_ أنا عارفه ما بيعجبكش كلامي . كل واحد ما بيعجبوش الا

عقله ، قال على رأى المثل .

وصمتت الأم وتحركت لتغادر الغرفة ، فقال الأب وهو يرتدى جاكتة بيجامته التي تختلف في لونها عن البنطلون :

__ ما تكملى المثل: لو جابوا للمجنون ألف عقل على عقله ما يعجبوش الاعقله.

فقالت وهي تخرج:

_ أنا ما قلتش انت اللي قلت .

وارتفع صوت أحلام :

_ اتفضلوا الأكل جهز .

ونادى مراد:

ــ سوسن تعالى خدى هاله خليني آكل .

و آقبلت سوسن و حملت هالة ، وإذا بعاطف يقبل و يجذب سوسن من ثوبها :

_ هاتيها أنا اللي ح أشيلها .

وصاحت سوسن:

_ ماما .. ماما .. الحقى .. عاطف ح يوقع هاله .

وقالت الأم:

ــ ادخلوا أودتكم ولعبوها سوا .

وجلس الأب والأم وأحلام ونبيلة وسامى ومراد حول المائدة ، والمتدت الأيدى فى تؤدة ، ثم أخذت سرعتها فى الازدياد ، فبدا أنها كانت فى سباق ، وإن هى إلا لحظات حتى كانت الصحاف نظيفة كأنما قد

غسلت.

ونهضوا يتسابقون إلى الحوض، غسلت نبيلة يديها ومراد وسامى خلفها يترقبان ، ودلفت إلى غرفتها ، فصاح سامى :

ـــ أيوه زوغي .

ــ وانت مالك ؟

وبلغ ذلك الحوار مسامع الأم ، فنادت :

ــ نبيلة ، تعالى اغسلى الأطباق دول ، أختك اتهد حيلها م الصبح . فقالت نبيلة وهي تختفي في حجرتها :

ـــ يا مُاما ورايا مذاكره كتير .

وراحت أحلام تحمل الصحاف الفارغة إلى المطبخ ، والأم تهدر : ــــ إيه الكلام الفارغ ده ، خشى نامى وسيبى الخدامين يخدموكى ، طب والله العظيم ما ح تفسل أحلام الاطباق دى ، ولو دودوا ، دا ظلم دا كفر .

ونهض الزوج ، ودخل إلى المطبخ ، وشمر عن أكامه ، وراح يغسل الصحاف ليحسم الموقف ويريح رأسه !

ودخل كل إلى غرفته ليستريج بعد الغداء ، ودخل الزوجان حجرتهما ، وأغلقا بابها وتمددا في الفراش ، وأسلمت الأم جنبها للرقاد . وما أن بدأت الراحة تمسح بيدها الحنون تعبها حتى أقبل عاطف يدق باب الحجرة بيديه في قوة ، فنهضت وفتحت الباب ، وحملته ثم عادت به وأنامته إلى جوارها ، فسكن قليلا ، وما لبث أن تقلب في الفراش ، وأخذ ينظر في وجهها ، فضايقه أنها مغمضة العينين ، فمد يده



ونهض الزوج ، ودخل إلى الطبخ

يفتحهما ، فدفعت يده تبعدها عن عينيها ولكنه كان كالذباب اللحوح ، كلما أبعدت يده عن وجهها ، عادت تعبث بعينيها أو شعرها أو أنفها . ومد أصبعه وأدخله في أذنها ، فنفد صبرها ، فحملته وانطلقت به إلى حيث كان مراد وسامي وسوسن ، وقالت لهم :

ــ فين كرته ؟ العبوا معاه.

وقالت سوسن :

_ ماما .. خدى هاله .

وقالت الأم وهي تسرع إلى غرفتها :

_ اديها لنبيله .

وأغلقت الباب خلفها وارتمت فى الفراش ، وانقضت دقائق من الهدوء وإذا باب الغرفة يفتح ، وصوت سوسن يرن فيها :

_ ماما .. ماما .. الحقى .. مراد شاط الكوره طارت ع الشارع . وكان النوم أغلى من الكرة فلم تنبس الأم بكلمة ، وتقلب الأب متبرما ، ثم سحب الغطاء وأخفى وجهه وأذنيه ، حتى لا يسمع .

وانسحبت سوسن ، وكأنما عز عليها أن تعود مهزومة ، فقالت لمراد :

_ ماما جايه لك .

ومرت لحظات هنيئة كلها هدوء وصفاء ، تبعها صوت باب يصفق في قوة ، ثم انهيار زجاج ، فقفزت الأم من نومها مفزوعة ، وانطلقت مرعوبة ، فإذا بها تجد عاطفا واقفا وهو مذهول وقد تناثر حوله زجاج الباب ، وارتفع صوت الأب مستفسرا :

-- جرى إيه ؟

_ عاطف كسر قزاز الباب .

فقال الأب في ضيق:

ـــ هو كل يوم لوح قزاز ؟

وقالت الأم في راحة :

_ الحمد لله ربنا ستر ، لو وقع عليه كان قتله .

وبكت هالة ، فذهبت سوسن إليها وأخذتها من جوار نبيلة ، ثم انطلقت إلى أمها وقالت :

__ ماما .. ماما .. خذى هاله .

فقالت الأم في زجر :

_ ابعدى دلوقت .. انتى عميتى ؟

_ بتعيط .

_ اديها لابوكى .

وعكفت الأم على التقاط الزجاج المتناثر ، وهي تبعد عاطفا عنه ، وانسلت سوسن إلى غرفة أبيها ، وقالت :

_ بابا .. خد هاله .

واستيقظ الأب ، وحمل ابنته ، ثم خرج بها إلى المطبخ ، يعد لها زجاجة لبن .

وعاد الأب مسرعا ووضع هالة في سريرها ، وألقمها الحلمة المطاط ، وطفق ينظر إليها وهي تمتص اللبن في حنان .

ودلفت الأم إلى الحجرة ، وأغلقت الباب حلفها ، ووقفت ترمق

زوجها وابنتها برهة ، ثم تقدمت منهما وقالت :

ــ قول لى : بتحب البنت دى قوى كده ليه ؟.

فقال وهو يبتسم:

ــ بنت الشيبه .

جلست على طرف السرير وقالت:

_ إلا الواحد بيحب آخر ولاده ليه ؟

فاعتدل وقال وهو يفكر:

_ يمكن عشان يبقى حاسس إنه ح يتحرم من عطفه بدرى .

ومرر يده بحنان على جسم هالة وقال:

یا تری مین اللی ح یربیکی ؟

فقالت الأم في سرعة:

ــ ما ح يربيها ويجوزها غيرك .

فقال الأب وقد شرد ببصره :

_ مش باین .

فقالت الأم وهي تجذبه من طرف بيجامته :

ــ طيب نام بقي والنبي ما تمغصش بطننا .

وتمددا فى السرير ، ولزم الزوج الصمت ، وظهر القلق فى وجه الزوجة ، وأرادت أن تنزل الطمأنينة بصدرها ، فقالت :

۔۔ هو انت مش زی ابویا ، أبویا عاش لما جوزنا كلنا .. عندك ٥٥ سنه و كان ستاشر سنه لما تتجوز هاله يبقى عندك ٦١ سنه ، مش ح تعيش ٦١ سنه ؟!

_ الأعمار بيد الله .

لما يبقى عند هاله ستاشر سنه ح اجوزها على طول ، مش ح استنى ولا يوم .

_ ما تقولش الخطاب واقفين على الباب!

فمدت يدها ومررتها على شعره ، ثم رفعت صدرها وانحنت فوقه ، وقبلته قبلة على خده أودعتها كل حبها .

وأغمضا عيونهما ، وراحا في سبات .

* * *

ونهضت أحلام ووقفت أمام المرآة تصفف شعرها ، ثم فتحت درجا وأخرجت حلقها ، ثم صاحت :

_ إيه القرف ده! مين اللي كسر الحلق ؟

فقالت سوسن:

__ عاطف كان بيلعب بيه .

وراحت تعبث في الدرج ثم قالت:

_ فين السيكوتين ؟

فقالت نبيلة ، وهي ترتدي ثيابها ، وتقرب وجهها من المرآة وتتحرك

فى خطوات راقصة :

_ كان مع سامى .

وأُقبل سامي متحديا :

_ كنتى شوفتينى خدته ؟

_ مش كان في إيدك الصبح!

- _ ما تبطلي الكدب بأه .
- __ ما حد كداب غيرك .
 - ونظر إليها مليا وقال:
- ــ وبتزوقی وراحه علی فین ؟
 - _ مش شغلك .

واستيقظ الأب والأم على صياحهما ، ولكنهما ظلا في الفـراش ينصتان ، وقالت أحلام :

- ــ نبيله جايه معايا ۽ رايحين نزور فايزه صاحبتي .
 - فاتخذ سامي هيئة رجل وقال:
 - ـــ ما عندناش بنات يخرجوا لوحدهم .
 - فقالت نبيلة في ضيق:
 - ــ وانت مالك يا بايخ ؟
 - فقال سامي في إصرار:
- ـــ إذا كانت أحلام ح تروح لفايزه أنا ح اروح معاها .
- وهز الأب رأسه معجباً ، ورفت على فمه بسمة رضا ، وتحركت الأم في فراشها وجلست متحفزة ، وارتفع صوت نبيلة متحديا :
 - _ ح اروح غصب عنك ..
 - _ مش راحه .
 - وصاحت نبيلة:
 - ــ هو انت ابويا ؟!
 - وقال الأب لزوجته :

ـــ ما تخرجي لاولادك دول .

ــ زقني وخليك بعيد ، لما العيال كرهتني .

وصاحت نبيلة:

ـــ يا ماما ، ما تحوشي الشيخ ابو العيون ده !

وقالت الأم وهي تفتح الباب:

ـــ دانتو بنتين ، ترجعوا في الضلمه لوحدكو ازاي ؟

فقالت نبيلة في ثورة:

ــ وفيها إيه يعني ما دام أنا واثقه من نفسي ؟!

وقال سامي ساخرا:

_ واثقه من نفسى!.

و دارت نبيلة على عقبيها ، والتفتت اليه متحدية وقالت :

_ آه واثقة من نفسي ، أمال زيك .. ح تسكت واللا اتكلم

انسفك ؟

فقال سامي في تخاذل:

_ ح تقولي إيه يعني ؟

ونهض الأب ووقف بالقرب من الباب يصغى .

_ ح اقول ع السجاير اللي بتشربها .

وخرج الأب من غرفته ليشترك في المعركة ، وقال :

ـــ سجاير ؟ والله عال مش فاضل الا السجاير !

وصاحت الأم:

ــ إياك نكفيكو عيش ، قال سجاير قال .

وأحس سامي أنه وقع في المصيدة ، فقال صارخا .

_ كدابه .. والله كدابه ..

فقالت نبيلة ، وهي تدني وجهها منه في حركة تمثيلية :

_ والسيجاره اللي كنت بتشربها بالليل ؟

ـــ دى سيجاره حلاوه اشتريتها من مراد ؟

فقال مراد في بساطة:

_ أبدا . ماحصلشي .

فثار سامي وقال:

ــ يا كداب .. بتنكر عشان تبقى تشترى منك !

فقال مراد وهو يهز كتفيه:

ــ ما خلاص التجاره فلست .

فقالت له أمه في زجر :

ــ قول الحق .

فقال مراد وهو يبتسم:

ــ الحق .. الحق .. أنا اللي اديته السيجاره .

فلطمته أمه على وجهه وقالت:

_ أمال بتكدب ليه ؟

فقال مراد وهو يتحسس وجهه بيده .

ــ الحق على اللي قلت الحق.

وقالت الأم:

_ إذا كانت أحلام خارجه ما حدش ح يخرج معاها الا سامي .

فقالت نبيلة في غيظ:

_ يا سلام ! عشان ما هو ولد ؟

فقال لها سامي وهو يخرج لها لسانه :

_ راجل .

واتجهت نبيلة إلى أحلام وقالت لها:

_ طب هاتی بلوزتی بقی .

فقالت الأم:

_ وبعدين معاكى يا نبيله ؟

_ مش عايزه حد يلبس هدومي .

فقال سامي وهو يرتدي ملابسه ، ويسرح شعره :

ـــ لو کنتی ح تروحی معاها کنتی ادیتیها لها .

_ ما لكش دعوه يا بايخ .

خلعت أحلام « البلوزة » وألقت بها فى وجه نبيلة ، وراحت ترتدى بلوزة أخرى ، وانتهى سامى من ارتداء ملابسه . ودخل غرفة أحلام فرآها تمرر أصابعها على شفتيها فقال لها :

_ إن حطيتي أحمر في شفايفك مش ح امشى معاكى .

فقالت له نبيلة:

_ جتك القرف في شكلك .

فأخرج لها لسانه ، فتركت له الغرفة وانصرفت .

وتحرك سامي وأحلام ، وسار عاطف خلفهما ، حتى إذا ما فتح الباب تقدم عاطف ليخرج ، فصاحت سوسن :

(أم العروسة)

- _ ماما .. ماما الحقى . عاطف نازل الشارع .
 - _ سيبيه يتهوى .

واغتاظت سوسن ، فقالت :

_ أنا مالى .. أهو دلوقت يوسخ هدومه .

وذهبت إلى حافظة كتبها القماش وحملتها واتجهت إلى حيث ذهبت نبيلة . ولمحت مراد يعبث في الصوان ، فقالت له :

_ مش ح تذاكر ؟

فقال لها بصوته المنبعث من حنجرته ، وقد نفرت عروق رقبته :

_ إيه ! ما اديني بدور على كراسي فاضي أهو .

وعثر مراد على الكراس ، وانطلق خلف سوسن .

وتحرك الأب ليغادر غرفته ، وقبل أن يخرج التفت إلى زوجته وقال لها :

_ وراكى إيه النهارده ؟

ـــ المرار اللي ما بيخلصش ، ح اخيط شرابات العيال ، واركب لهم الزراير .

وبدأت تحمل كومة من القمصان ، وعلبة رصت فيها الجوارب الممزقة ، وقال الزوج :

ـــ أنا ح اقرا الجرنال .

ــ ورايا ايه ؟

ــ جزم وصنادل العيال عايزين يصلحوا أهم عندك ورا الباب :

ونظر خلف الباب ، فرأى صندوقا من الورق المقوى ، تكدست فيه أحذية الأولاد وصنادلهم ، فحمل الصندوق ، وانطلق إلى الردهة الخارجية ، ووضع الصندوق على الأرض ، ثم اتجه إلى المطبخ ، وأحضر كرسيا قصيرا صنع من الخشب ، وعلبة صفيح بها خيط وسكينة أحذية وإبر ومسامير وقدوم ، وحمل سندانا مما يستعمله من يقومون بإصلاح الأحذية وذهب إلى الردهة .

وجلس على الكرسى ، وقد وضع السندان أمامه ، ومد يده في الصندوق وأخرج حذاء سوسن وراح يقلبه فألفاه مفتوقا ، فوضعه على فخذه ، ومد يده في العلبة الصفيح يأخذ الإبرة .

وأقبلت الأم ووضعت كوم القمصان على الأريكة ، ثم جلست ترفو الجوارب وهى تنظر إلى زوجها بين لحظة وأخرى ، وهو منهمك فى خصف نعال أبنائه ، والتقت عيونهما مرة ، فابتسم الزوج وهو يغمز بعينه :

_ صنعه في اليد .

الفصل الثالث

أتى المساء . وانتهى حسين من إصلاح أحذية أبنائه ، وأتمت زينب تثبيت الأزرار وإصلاح الرتوق ورفو الجوارب ، فقامت تحمل البنطلونات والقمصان على رأسها ، وعلبة الخيط والجوارب في يديها ، وسارت قليلا ثم توقفت والتفتت خلفها وقالت :

ــ والنبي يا حسين تكوى للأولاد قمصانهم .

ووضعت علبة الخيط تحت إبطها ، ومدت يدها تسحب القمصان من فوق رأسها ، وتدفع بها إلى زوجها .

تناول حسين منها القمصان ، وأخرج من الصوان مكواة كهربية ، ومفارش وأغطية راح يفرشها فوق المنضدة ، وجاء بكوب ماء ، وأخذ يلأ فمه بالماء ويرشه على القمصان ثم يكورها ويضعها على المنضدة .

وبدأ في الكي ، وإذا بصوت سوسن يرن في الردهة :

ـــ بسم الله الرحمن الرحيم . قل أعوذ برب الناس ، ملك الناس ، إله الناس ، الناس ، من شر الوسواس الكناس .

فصاح الأب وهو مستمر في عمله :

ـــ الخناس يا سوسن .

فأصلحت سوسن خطأها واستمرت في القراءة :

ــ من شر الوسواس الخناس ، الذي يوسوس في صدور الناس .

وكانت الأم قد انتهت من وضع البنطلونات والجوارب فى أماكنها وأقبلت ، فقالت لزوجها :

_ الخناس يعنى إيه ؟

فشرد حسين وقال:

__ الحناس ؟.. الحناس ؟.. هاتى مختار الصحاح نشوف معناها بالضبط إيه ، وهمت بالتحرك . وإذا بزوجها يقول :

_ ولا مالوش لزمه .

_ ليه عرفت معناها ؟

_ أبدا ، بس ح نتعب نفسنا من غير لزمه .. ما فيش كلمه دورت عليها فيه الالقيت مكتوب الشيء الفلاني « معروف » .

_ يعنى إيه معروف ؟

ــ يعنى سهل قوى ، مش محتاج لشرح ، الناس كلها عارفاه .

ــ طب والنبي لما اروح اشوف شارح « الخناس » بإيه .

واتجهت إلى غرفة الاستذكار ، إنها غرفة بسيطة ، بها مكتب واحد متواضع ، وصوان صفت فيه الكتب ، لا ضلف له . أسدلت عليه ستارة ، وقد جلست نبيلة خلف المكتب، بينها انبطح مراد على وجهه على الأرض ، وقد بسط أمامه كتاب الحساب وكراسة ، وجلست سوسن على كرسي من القش ، ترتل القرآن وتهز رجلهها .

ونظرت الأم ، فألفت عاطف قد نام فى كرسيه ، وقد تكور فيه ، بينها نامت هالة على الأرض ، فقالت لنبيلة :

_ حرام عليكي .. هو انتي ما فيش في قلبك رحمه ؟

فقالت نبيلة في دهش:

_ في إيه ؟

_ مش شايفه اخواتك نايمين ازاى ؟

_ دول لسه نايمين دلوقت .

_ ناموا يا كبدى من غير عشا .

_ ما كلوا العصر .

وذهبت إلى هالة وحملتها فى رفق ، ثم التفتت إلى نبيلة ، وقالت :

_ هاتی أخوكی .

فرمت نبيلة الكتاب من يدها في تبرم وهي تقول:

_ أف .. الواحد ما يعرفش يذاكر في البيت ده .

۔ یعنی المذاکرہ حلیت دلوقت ، لما کنتی ح تخرجی مع أحلام ما فکرتیش فی المذاکرۃ ؟

وحملت نبيلة عاطفا ، وسارت الأم وبين يديها هالة ، وخلفها نبيلة ، وعلى كتفها عاطف ، واتجهت الأم إلى غرغتها وذهبت نبيلة إلى غرفة البنين .

وضعت الأم هالة فى فراشها فى حنان ، وراحت تخلع لها حذاءها فى رفق ، ثم مالت ووضعت على خدها قبلة .

ودخل الأب الغرفة وهو يحمل القمصان ، فالتفتت إليه زوجته ، وقالت :

_ إيد ما نعدمها .

ثم دنت منه وقبلته في خده ، فأشرق وجهه ، ورفت على فمه بسمة

رضا.

ووضعت نبيلة عاطف على فراشه وخلعت له فردة حذاء ثم غطته في عجلة ، وفي رجله الأخرى « فردة » .

عاد الأب والزوجة إلى غرفة الاستذكار ، وإذا بسوسن تردد القسم ، وهي واقفة :

_ أُقسم بالله ، أن أكون مخلصة لمصر ..

ورفع مراد رأسه والتفت ، فلما رأى أباه نهض وفي يده كتاب الحساب ، ذهب إليه وهو يقول :

_ مش فاهم المسأله دى .

فقال الأب وهو يبتسم:

_ ح تفهمها ازاي وسوسن عماله تذيع قرآن وأناشيد ؟

فقالت سوسن ورأسها مرفوع:

_ يعنى مااذكرش ؟! أطلع خايبه زيهم ؟

فقالت أمها وهي تربت على ظهرها :

_ كفايه النهارده . أكلك في النمليه كليه وخشى نامي .

_ حاضر يا ماما .

وأقبلت نبيلة ونظرت ، فلما رأت أباها في الغرفة مدت يدها وتناولت الكتاب وخرجت لتستذكر دروسها في غرفة أخرى .

وتناول الأب الكتاب من مراد ، وقرأ المسألة ، ثم قال :

ــ شوف يا مراد ، عندك حوض على شكل متوازى مستطيلات أبعاده من الداخل ١٢٠ سنتى و ١٠٠ سنتى و ٨٠ سنتى متر ، ركب عليه حنفيه تنزل ٢٠ لتر في الدقيقه وفيه بلاعه تفرغ ٤٠ لتر في الدقيقه ، فإذا فتحنا الحنفيه والبلاعه مع بعض ، بعد أد إيه يتملى الحوض ؟

فقالت الأم في حماسة:

_ كلام إيه الفارغ ده ، اللي عايز بملا الحوض يسد البلاعه ، إنما يفتح الحنفيه و يسيب البلاعه مفتوحه يبقى جنان .

_ المسأله بتقول كده .

_ يعلموا العيال حاجه معقوله .

ومد مراد يده ، وأخذ الكتاب من أبيه وأغلقه ، فقال له أبوه :

_ بتعمل إيه يامراد ؟

فقال مراد وهو يضع الكتاب على المكتب :

_ ما دام حاجه مش معقوله أفهمها ليه!

وتحرك ليغادر الغرفة ، فقال له أبوه :

_ تعال ، رايح فين ؟

ودق جرس الباب الخارجي ، فذهب مراد وفتحه ، فاندفعت أحلام في مرح يتبعها سامي في تؤدة ، وسارت حتى بلغت غرفة الاستذكار ، فأطلت برأسها وقالت متهللة الأسارير :

_ السلام عليكم .

ثم صارت تصفر ، وكل خالجة فيها تنطق بسرورها ، وراحت الأم تتبعها بنظرها برهة ، ثم قالت :

_ إيه اللي جرى الليله دى ! أحلام مش زى عوايدها .

_ مز قططة ومش على بعضها .

وارتفع صوت أحلام في غناء :

_ مال الهوا يا امه .

فالتفتت الأم إلى زوجها ، وقد اتسعت عيناها دهشة :

ـــ سامع .. بتغنى . وما سمعتهاش بتغنى قبل الليله أبدا .

وأنصت الزوج مليا ، ثم التفت إلى زوجته وقال :

ــ غريب . صوتها طالع من قلبها .

ثم قالت بصوت خافت :

_ تکونشی بتحب ؟!

فهبت الأم كمن لدغتها أفعى:

ـــ بتایه ؟ هو انا عندي بنات يعرفوا الكلام ده !

وانطلقت خافقة القلب إلى غرفة ابنتها ، فألفتها قد خلعت ثيابها ، ووقفت أمام المرآة تتفرس فى مفاتنها التى عجز القميص الشفاف عن سترها ، وأخذت الأم تنظر إلى ابنتها مليا ، فرأتها لأول مرة فتاة نامية ، اكتملت أنوثتها ، فاشتد وجيب قلبها وتقدمت إليها فى قلق ، وقالت :

ـــ شفتي مين عند فايزه ؟ كان مين اللي قاعد معاكو ؟

فقالت أحلام في بساطة:

_ ما كانش فيه حد غريب .. كانت فايزه وأمها وابوها وجلال .

فقالت الأم في اضطراب:

_ وجلال كان قاعد معاكو!

_ أيوه يا ماما .

فقالت الأم في صوت فيه رنة غضب:

ـــ وازاي يقعد معاكر ؟

ـــ وفيها آيه يا ماما ؟ لقى سامى قاعد قعد .

ـــ لكن سامي لسه صغير ، إنما جلال بقي راجل .

سمع سامي الحوار الدائر بين أمه وأحلام ، فخرج من غرفته ، وانسل

إلى الغرفة الثانية حتى يشترك في الحديث ، وقال :

_ أنا كنت قاعد في أدبي مش زي جلال .

فقالت أحلام في ثورة وقد توردت وجنتاها ، فازدادت جمالا :

_ ما كان قاعد في أدبه راخر ، قول لي عمل إيه كده ؟

فالتفت سامي إلى أمه وقال:

_ لو شفتيه وهو بيبص لها ح ياكلها .

فتقدمت أحلام نحوه صائحة:

_ خللي عندك أدب .

ولم يأبه لها ، بل استمر يقص على أمه ما حدث :

ـــ طول ما هو قاعد يبص لرجليها .

واتسعت عينا الأم ، ونظرت برغمها إلى ساق ابنتها العاريتين ،

فامتلأت حنقا ، واحتقن وجه أحلام بالدم ، وصاحت :

... ما بس بلاش كلام فارغ .

وهز سامي رأسه في عدم اكتراث بها ، وقال :

_ ولو شفتي اللي عمله أبو فايزة .

فقالت الأم في فزع:

__ وعمل إيه راخر ؟

فتقدم وهو يقلد الرجل في حركاته وفي نبرات صوته :

_ طبطب على خد أحلام وقال لها : « أهلا مرات ابني » .

فقالت الأم وهي تشهق :

_ مرات ابنه .. مرات ابنه ازای !؟

وخرجت كالعاصفة ، وانطلقت إلى غرفة الاستذكار ، فإذا بزوجها

قد اضطجع وراح يقرأ الجريدة في هدوء ، فصاحت فيه :

_ يا بختك بروقان بالك .

فنحى الجريدة ، واعتدل وقال :

_ حصل إيه ؟

_ قال الرجل يطبطب على خدها ويقول لها : أهلا مرات ابني .

ـ بيهزر معاها .

ـــ هزار إيه البايخ ده اللي يفتح عنين الاولاد ؟

وجاء سامي خلف أمه يسعى ، ودخل الغرفة وقال :

_ نسيت اقول لك .

_ نسيت إيه كمان ؟

فأمسك الباب بيده ، ووضع ساقا على ساق ، ومال قليلا ناحية ذراعه التي أمسك بها الباب وقال :

_ أبو فايزه وامها وجلال بيقولوا لكم إنهم ح بيجوا يزوروكم يوم الخميس الجاى .

فقالت الأم في دهشة:

_ إيش عجب"! لا يعرفونا ولا نعرفهم .

وشردت ببصرها ، وراحت الأفكار تتزاحم في رأسها ، وصمت الأب يفكر ، ونظر سامي إلى أمه وإلى أبيه ، فألفاهما شاردين ، فهز كتفيه وقال قاطعا حبل تفكيرهما :

_ مش ح تتعشوا ؟

فقالت الأم في سرعة للتخلص منه:

ــــ إحنا شبعانين ، روحوا اتعشوا انتم .

وانسحب سامى ، وجلست الأم على أقرب مقعد ، وقد حملت رأسها بكفها ، وأرادت أن تطمئن إلى الأفكار التي نحت في رأسها فقالت :

_ تفتكر يا حسين پيجوا يزوروناليه ؟

و لم يشأ أن يعبر عن الخواطر التي طفت على سطح ذهنه ، حتى لا يسبب لها ألما إذا ما خاب حدسه ، فقال :

ـــ إيش عرفني .

وساد الصمت بينهما ثانية ، وانفرد كل منهما بأفكاره ، حتى أفاق حسين على صوت كرسى يسحب من الخارج ، فالتفت إلى زوجته وقال :

ــ يللا يا زينب ننام .

فنهضت وهي تقول:

_ يللا .

__ ودخلا غرفتهما ، وتمددا في السرير ، وراحت زينب تتقلب قلقة ، فقال لها زوجها :

_ ما تنامى .

_ مش جای لی نوم .

وخيم الهدوء على الغرفة ، ثم تنهدت زينب بصوت مسموع ، فقال لها زوجها :

_ بتفكرى في إيه ؟

_ يا ترى الناس دول شكلهم إيه ؟

ـــ ناس زينا ، لهم عنين وودان وبق ومنخير .

__ مش قصدى .

__ أمال قصدك إيه ؟

__ يا ترى دول ناس طيبين واللا جنسهم إيه ؟

فقال لها وهو يربت على ذراعها العارية :

_ نامى نامى .. بكره نعرف كل حاجه .

الفصل الرابع

جلست زينب أمام « التواليت » وراحت تصفف شعرها ، ولمحت زوجها مقبلا في المرآة ، وهو يرتدي بيجامته ، فقالت له :

_ ح ننزل نشترى للأولاد جزم .

فقال لها الزوج وهو يعبث بذقنه:

_ ماصلحناهم أول امبارح .

_ جزمهم بقت عره ، والناس ح ييجوا بكره ، يقولوا علينا إيه ؟

_ دول ما بقالهمش شهر.

_ أنا عارفه بيعملوا فيهم إيه ؟

وصمتت قليلا ثم قالت:

_ خد مقاسهم ويللا .

ــ طب البسي انتي وما تأخريناش .

فقالت وهي ترفع حاجبها عجبا:

ــ بقى أنا باغيب فى اللبس ، والله ما طلع على الحكايه دى غيرك . فقال وهو يغادر الغرفة :

ــ لما نشوف.

ونادى وهو في طريقه إلى الردهة :

ـــ سامي ، هات ورقة بيضه وقلم رصاص .

وأقبل سامى ومراد وعاطف وسوسن ، ووقفت نبيلة على باب غرفتها تنظر . قدم سامى إلى أبيه الورقة والقلم ، فوضع الأب الورقة على الأرض ، وقال لعاطف :

_ حط رجلك .

فوضع عاطف قدمه عارية فوق الورقة ، وأخذ الأب يمرر القلم الرصاص حول القدم ، ليحدده على الورقة ، وقال سامى :

_ مقاس رجلي ٣٩.

وقال مراد بصوته المنبعث من حنجرته :

ـــ وأنا مقاسى ٣٦ .

ورفع عاطف قدمه ، ووضعت سوسن قدمها ، وراح الأب يرسمها على الورق ، وقالت نبيلة :

.... أنا عايزه جزمه (سبور) ٣٧ .

والتفتت نبيلة خلفها ثم قالت :

_ وأحلام عايزه جزمه بكعب عالى ٣٦ .

وإذا سوسن تربت على خد أبيها وتقول:

_ وأنا يا بابا عايزه جزمه بكعب عالى .

ودنا عاطف وقال:

ــ وانا كان .

وقال الأب وهو يتجه إلى غرفته :

ـــ حاضر .

ودخل يرتدى ثيابه ، فالتفت إلى زوجته فألفاها لا تزال تصفف

شعرها ، فقال :

_لسه!

فقالت له:

ــ والنبي البس انت وما تلخمنيش .

وارتدى قميصه وبنطلونه ، وجلس يدس قدمه في الجورب ، وإذا بسوسن مقبلة تصيح :

ــ ماما .. ماما .. إلحقى سامى بيحلق دقنه .

وقام الأب وقد لبس « فردة » جورب وقدمه الأخرى حافية ، وذهب إلى الحمام ، فوجد الصابون الغزير يغطى ذقن سامى : فقال له الأب في زجر :

_ إيه اللعب ده ؟ تهيج دقنك .

فقال سامي في مكابرة:

ــ هو انا عملت حاجه ! أنا بأغسل وشي .

وأقبلت نبيلة وقالت :

ـــ مستعجل قوى ، عايز تبقى راجل .

فقال لها سامي :

_ وانتي إيش حشرك ؟

وقالت سوسن:

ــ شفت يا بابا هو اللي بياخد امواسك ويقول إن أنا اللي باخدهم أبرى بيهم الأقلام .

ومد سامي يده وقبض على ذراع سوسن ، وهزها في غيط :

ــ يا بت انتي بطلي الكذب والتأويم .

وصرخت سوسن وقالت وهي تبكي :

_ آه يا دراعي .

فقال الأب في غيظ:

_ إنت بتضربها ليه ؟

فقالت نبيلة:

_ ماحدش مالي عينه .

وصاحت الأم:

ــ ما بس بقى ، والله لو صحيت هاله ما حد ح يشيلها غيركم .

وانسلت نبيلة إلى حجرتها ، وخرجت سوسن وهي تمسح دموعا متوهمة ، وعاد الأب إلى الغرفة يستأنف لبسه ، فوجد الجورب قد ابتل بالماء ، فخلعه وقام يحضر جوربا آخر . وأتم ارتداء ثيابه ، وزوجته جالسة لا تزال بقميص النوم أمام التواليت ، وفي يدها أصبع الأحمر تمرره على شفتها ، فقال لها :

ـــ أنا يدى أعرف يتزوق لمين بس ؟

فقالت في دلال وهي تنظر في المرآة :

ــ لك يا راجل.

ـــماانتي قاعده كل يوم في البيت من غير زواق، واشمعنا الأبيض والأحمر ما يحلاش إلا ساعة الخروج .

_ عايزني أمشى جنبك عره ؟!

ـــ إذا كان على أنا عاجبني من غير زواق ، بس شهلي ، والله ما حد (أم العروسة)

ح يخطبك ، اتجوزتى وخلاص .

_ آهو انت اللي بتعطلني وترجع تقول باغيب في اللبس.

فقال وهو يهم بمغادرة الغرفة:

ــ ما فيش فايده ، كل الستات يحبوا إن الرجاله يصفروا لهم .

_ مش كلهم .

_ كلهم ، وانتى أولهم ، فاكره يوم ما جيتى فرحانه وقلت لى إنك كنتى ماشيه بين اتنين صحابك وواحد قال لك : أحلاهم اللى فى الوسط !

ــ طب اخرج بقى خلينى البس ، الحق على اللي بقول لك كل حاجه .

وخرج من الغرفة ، وراح يغدو ويروح فى الشقة وقد لاح فى وجهه الضيق ، ووقع بصره على الراديو ، فذهب إليه ليديره لعل النغمات المنبعثة تنزل الراحة بصدره ، وتعينه على الصبر .

ونظر إلى الراديو فاتسعت عيناه دهشة ، كان زجاجه محطمسا ، وعقاربه منزوعة ، والأزرار التي تدير العقارب مفكوكة ، فقال :

ـــراديو إيه ده ؟ بتدوروه ازاى ؟!

فأسرعت سوسن إليه وقالت:

ــ عايز آني محطه ؟ مصر واللا صوت العرب ؟

فقال الأب:

_ أى محطه .

فمدت يدها تدير ذلك المسمار العارى الذي كان مركبا عليه زرار

العقارب ثم توقف وقالت :

_ آهي دي محطة القاهره.

فالتفت أبوها إليها وقال :

_ يعنى ما نطقش .

فقالت سوسن في بساطة:

ــ ده ما بيمشيش إلا بالضرب ، إدى له على نافوخه .

فنظر إليها وهو لا يفهم مما تقول شيئا ، فآسرعت إلى الراديو وضربت سقفه بقبضة يدها الصغيرة ، فانبعث صوت الراديو مجلجلا في الشقة .

و جلس الأب يصغى برهة ثم نهض واتجه إلى غرفة النوم ونظر ، فألفى زوجته لا تزال تقوم بارتداء ملابسها ، فعاد إلى الراديو ضيق الصدر ، وضرب سقفه في غيظ بقبضة يده ، فإذا بالراديو يسكت عن الكلام .

وعاد ثانية إلى حيث كانت زوجته ، وقال :

_ ما تيللا بقى .

فراحت تمرر زجاجة العطر خلف أذنيها في هدوء ، ثم مدت إليه يدها بالزجاجة وهي تقول:

_ خد ، إتريح .

فانقشع غضبه سريعا وقال:

_ بعدين الستات تجري ورايا .

_ مش أحسن ما تجرى منك ؟

ومد يده وجذبها من يندها وهو يقول:

ــ اتأخرنا خالص ح نخرج في الضلمه .

وجذبت يدها منه وقالت :

_ طب لما اقفل الدولاب.

وأغلقت الدولاب ، ووقفت أمام مرآة « التواليت » تنظس إلى ظهرها ، فمد يده وجذبها فانقادت له .

وخرجا من الغرفة وسارا في الردهة ، وإذا بها تقف فجأة وتقول : _ والله ما حد بيلخمني غيرك ، نسيت آخد مقاس رجل هاله .

وعادت إلى الغرفة . ووقف في الردهة يصرف أنيابه ، وغابت قليلا ثم عادت ، وانطلقا حتى إذا بلغا باب الشقة الخارجي قالت :

_ أوه ، نستني الجوانتي .

وتركته وعادت لتحضر قفازها ، ووقف يدق بقبضة يده دقات مكتومة تنم عن ضيقه ونفاد صبره .

وعادت إليه تعبث بقفازها ، وعلى فمها ابتسامة هادئة ، ففتح الباب وقال :

_ اتفضلي ، على الله ما تكونيش نسيتي حاجه تانيه .

وانطلقا ، حتى إذا بلغا شارع ٢٣ يوليو ، راحا يتفرسان واجهات المحال ، وقال لها :

- _ مش ح نخش نشتری بقی ؟
 - _ مش لما نتفرج قبله .

وسارا ، وإذا بشاب يصفر ، فالتفت إلى زوجته وقال :

_ ما تفرحيش ، مش بيصفر لك ، بيصفر للي ورانا .

والتفتت خلفها ، وإذا بفتاة قد ارتدت ثوبا ضيقا مثيرا ، برز منه

نهداها ، وتعلو وجهها طبقة من المساحيق ، وقد ركبت رموشا طويلة وصبغت شعرها بلون الذهب ، فقالت :

_ إنت بتبص للفتارين و لا للماشيين ؟

فقال في بساطة:

ـــ بتفر ج ـ

ووقفا أمام محل يبيع أقمشة ، وقالت :

ــ ما بقاش عندى فساتين أخرج بيهم ، تعال لما اقطع لى فستانين . فقال في صوت مضطر ب :

_ لكن احنا نازلين نشترى جزم للأولاد.

ــ دلوقت نشتريهم .

ودخلت إلى المحل ودخل خلفها ، وانسابت مسرعة إلى قسم الحراير وهو في أثرها ، وقالت للعامل .

ـــ عايزه قماشه بيج وردتها صغيره .

وراح الرجل يعرض عليها القماش ، وهي ترفض :

وتكدست أثواب القماش أمام العامل ، حتى كادت تخفيه ، ونفد صبر الزوج ، فتقدم من العامل وقال له :

ــ لو كانت الفابريكه تنصف ، كانت تبعث لكم القماش ساده ، وتبعث معاد الألوان والفرش ، وكل زبونه ترسم السورده اللي على مراجها .

وأحست الزوجة أن ضيق زوجها بلغ منتهاه ، فاختارت القطعتين وتناولت من العامل القسيمة ، ودفعت بها إلى زوجها ليدفعها .

وذهبا إلى محل أحذية ، واشتريا ما يحتاجان إليه بعد أخذ ورد طويلين بين الزوجة وصاحب المحل في الأثمان ، وخرجا من المحل ، الزوج يضع لفة القماش تحت إبطه وتتدلى في كل يدربطة أحذية ، بينها سارت الزوجة إلى جواره تعبث بقفازها!

ووقفت الزوجة عند واجهة محل ، وراحت تتفرس فى حقائب اليد المعروضة ، ووقف الزوج بعيدا ، فإذا بها تلتفت إليه وتناديه ، فلما يدنو منها : تقول له وهى تشير بأصبعها من الزجاج :

_ إيه رأيك في الشنطه دي ؟ شنطتي بقت عره .

ــ اعقلي بلاش تبذير ، طالع لنا بنات .

__هو احنا جبنا حاجه زياده ؟ حتى حتت الشنطه مستخسرها فيه ! ما استهلهاش ؟

_إذا كانت عاجباكي خديها .

وهمت بالدخول ، فقال لها :

_ اسمعى قبل ما تخشى ، مكتوب عليها تلاته جنيه ، نخش ندفع الفلوس ونخرج ، مش عايز فصال ووجع دماغ ، إن فاصلتى ح اسيبك واخرج على طول . .

ـ طيب .

ودخل خلفها وهو لا يدرى كيف يوفق بين لومها له واتهامها إياه بالتبذير يوم اشترى أقة تفاح ، وبين ما تفعله اليوم ! وجعلت تقلب الحقيبة بين يديها ، وتجرب قفلها ، وتتفسرس في محتوياتها ، ولما اطمأنت إليها ، سألت :

- _ تمنها كام ؟
- فقال الرجل:
- _ تلاته جنيه .
- ــ كتير ، ميه وخمسين قرش بس .

واربد وجه الزوج ، ونظر إلى زوجه فى غيظ ، ثم غادر المحل وتركها وحدها ، ووقف أمام المحل يدق الأرض بقدمه فى ضيق ، وتقضى بعض الوقت ، ثم أقبلت الزوجة وفى يدها الحقيبة .

- _ خدتیها بکام ؟
- فقالت في هدوء :
- ـــ بميه وخمسين قرش .

فالتفت إلى المحل وهو يجز على أسنانه ، فمدت الزوجة يدها إليه وقالت وهي تجذبه :

__ يللا .. أصل فلوسك كتير .

الفصل الخامس

جاء يوم الخميس ، وكان ميعاد الزيارة المرتقبة ، فدبت حياة عاصفة صاخبة في الشقة، كان الأبناء جميعهم يرتدون أفخر ما عندهم حتى الأب راح يرتدى بذلته الرمادية التي كان يدخرها للمناسبات ، وارتفعت الأصوات واختلطت فكانت أشبه بالضجة المنبعثة من مشاهدى مباراة حامية في كرة القدم .

وصاح سامي في عصبية :

_ المشط فين ؟ مين خده من قدامي ؟

فقالت نبيلة وقد خلعت جاكتة البيجاما ، ووقفت أمام المرآة تلف

شعرها دوائر:

_ أنا اللي خدته ، ما بقى لك ساعه بتتسبسب .

وصاح الأب:

_ مين اللي خد الكرافته من هنا ؟

فصاحت نبيلة:

ـــ مع سامى .

وخرج الأب من غرفته ، وهو عارى الساقين ، يرتدى قميصا أبيض ، واتجه إلى حيث كان سامى ، ووقع بصره على الكرافتة ، فانقض

عليها وأخذها وهو يقول:

ے حتی الکرافته دی ح تاخذها ؟ دانا بقی لی خمس سنین مش عارف أشتری غیرها .

ونادت أحلام :

ـــ نبيله نبيله ، والنبي تناوليني البنس .

فاتجهت نبيلة إلى الحمام ، ودفعت إلى أحلام بالبنس .

وصاح عاطف في بكاء :

_ لا ما البسش البنطلون ده ، عايز البنطلون الأحمر .

وقال مراد وهو يدس قميصه في البنطلون في إهمال بحيث أصبح القميص من أمام داخل البنطلون ، بينا كان طرفه الخلفي خارجه :

_ ما تدى له البنطلون اللي هو عايزه .

وجاءت سوسن تهرول ، وهي ترتدي فستانا قصيرا كشف عن ركبتيها، وهي تقول :

__ ماما .. ماما .. لبسيني الفستان .

وأولت ظهرها لأمها ، فهمت الأم بمديدها لتصلح هندام ابنتها ، وإذا. بعاطف يصيح :

_ أنا مالي عايز البنطلون الأحمر .

وارتفع بكاء هالة ، فصاحت الأم :

_ یا نبیله ، أنا مش عارفه بتعملی إیه عندك ، تعالی شوفی أختك . وقال سامی وقد ارتدی ثیابه :

ـــ لما تخلص زواق .

_ أنا قلت لك ميت مره مالكشي دعوه بيه .

وقالت الأم لسامي :

ــ فوت انت بقى روق لنا الشقه شويه .

فقال سامي :

ــ هاتوا ثمن تذكرة السينها .

فقالت الأم بصوت عال:

__ إدى له يا حسين .

ففال الزوج في ضيق :

ــ ما كانوا قعدوا في الشقه!

فقالت الأم في حدة:

_ أنا واحده عيانه وما تجبوليش الأوى ، حرام عليكو كفايه قرف .

بقى !

فقال الأب وهو يدفع لسامي ثمن التذكرة في صوت أقرب لصوت المعددة :

ـ ليه العواذل حاسديني ، دول حقهم يبكو على .

ورأى مراد أن سامى حصل على ثمن تذكرة السينها ، فتشجع واقترب من أبيه وقال :

__ وأنا ؟

فقالت الأم وهو تصفف شعر عاطف :

ــ خد أخوك معاك ياسامي .

فقال مراد بصوته المنبعث من حنجرته :

_ لأ ما امشيش مع سامي ، بيزغدني في السكه .

فقال سامي وهو ينصرف:

_ ومين يمشى معاك ؟

وأخذ مراد نقوده ، وانطلق مهرولا وأمه تصيح خلفه :

ــ تعرف تركب بيهم عجل ح اقطم رقبتك .

وخرجت أحلام من الحمام ، وهي في قميص وردى ، تضع على كتفيها منشفة ، غطت بها ظهرها وصدرها ، وإن ظل الأخدود الغائر بين ثديبها عاريا ، واتجهت في تؤدة إلى غرفتها ، كانت في قرارة نفسها تحس أن اليوم يومها .

ونظر الزوج إلى زوجته وقال:

_ لسه ما لبستيش ؟ الناس زمنهم جايين .

_ ح البس أهو .

ووضعت يد عاطف في يد سوسن وقالت :

_ اقفى باخوكى ع الباب .

فقالت سوسن:

ـــ طب هاتوا نضيع .

وأعطاها أبوها قرشا ، فرفضت أن تأخذه وقالت :

ـــ أنا شفتك اديت لسامي ومراد إيه ، عايز تضحك على ، واللا

يعني عشان ما هم ولاد ؟

وأعطاها أبوها حتى رضيت ، وأقبلت نبيلة تحمل هالة وتقول فى ملل :

_ كان على ذنب أتحبس معاها النهارده .. ما كنت خرجت أنا رخره ..

فقال لها أبوها :

_ كنت تروحي على فين ؟

فقالت نبيلة وهي تلق بهالة في حركة راقصة ؟

_ أى حته .

فقالت الأم وهي تخلع ثوبها :

_ ما هي الدنيا سايبه .

ودخلت نبيلة غرفتها وانبعثت من الراديو أنغام راقصة ، فراحت ترقص وهي ترفع هاله بيدها ، وأخذت تدور ، فقالت لها أحلام :

ــ كفايه بقى زغللتى عنيه .

ولم تكف نبيلة عن الدوران ، بل قالت :

ــ قولي لي الناس دول جايين النهارده ليه ؟

فقالت أحلام وهي تزرر فستانها :

ــ أنا عارفه 1.

ـــ كل حاجه فيكى بتقول إنك عارفه ، تسريحتك ، فستانك ، لمعان عنيكى ، الفرحه اللي . .

قالت أحلام مقاطعة:

_ بس بلاش غلبه ، هو انتي ما بتتعبيش م الكلام !

وظلت نبيلة في دورانها وحديثها:

_ الكلام ده نعمه .. يمكن انتى ما تحسيش بيها ، لأن حواليكى ناس كتير بيكلموكى ، زى الشبعان اللى ما يعرفش قسوة الجوع ، ياما ناس يتمنوا يلاقوا اللى يكلموهم .

وارتفع صوت الأم ينادى :

_ نبیله .. نبیله .

فقالت نبيلة وهي تتحرك في خطوات راقصة:

_ مؤكد ماما لبست الشراب .

وانطلقت إلى حيث كانت أمها ، فألفتها قد ارتدت ثوبها وجوربها وقد لفت بجذعها تنظر إلى بطن ساقها ، ولما رأت نبيلة ، قالت لها :

_ شوفي خط الشراب معدول ؟

فنظرت نبيلة ثم قالت:

_ معدول خالص ، وان ما كانش معدول ح يحصل إيه فى الدنيا ؟ فقالت الأم في إيمان :

_ إزاى ؟ دى قيمة الست في شرابها .

وقالت نبيلة في خبث :

_ طب واللي من غير شراب ؟

فقالت الأم في بساطة:

_ ما لهاش قيمه .

وضحكت نبيلة ضحكة طليقة ، فهذا الحديث يدور بينها وبين أمها كلما لبست الأم جوربها .

وأقبل الأب وهو فى كامل هيئته ، ولمحته نبيلة فقالت فى مرح :

_ إش . إيه الشياكه دى كلها ؟

فقالت الأم وهي تبتسم :

ــ يا بت خللي عندك أدب .

وقال الأب وهو يهز رأسه :

ــ الشياكه راحت من يوم انتم ما جيتوا .

ودق جرس الباب الخارجي ، فالتفت الأب إلى الأم في اضطراب ، وقال :

_ أهم جم . افتحى لهم الباب .

وقالت الأم في قلق :

ــ أنا ما اعرفهمش . روح قابلهم انت .

وقالت نبيلة:

انتوح تسيبوا الناس واقفين ع الباب! أروح أفتح لهم أنا؟
 وقال الأب في سرعة:

_ لاً .. لاً .. أحلام اللي تفتح لهم .

وخرجت أحلام من غرفتها ، وسارت صوب الباب الخارجي في حيوية ، وإذا بالأب يقول :

_ دخلي الستات في الأوده المفروشه والرجاله في المكتب .

ووصلت إلى الباب ، فوقفت برهة تصلح هندامها ، ثم مررت يدها على شعرها لتتأكد من أن الهواء لم يعبث به ، وفتحت الباب فألفت جلالا وأباه وأمه ، فرفت على فمها بسمة ، وتأخرت خطوة ، لتفسح الطريق ، وقالت :

_ تنضلوا .

والتقت عيناها بعيني جلال ، فأحست كأن تيارا كهربيا سرى في بدنها ، واستشعرت نشوة وسارت في خفة ، وأشارت إلى أم جلال أن تتفضل إلى غرفة الاستقبال وانطلقت أمام جلال وأبيه تقودهما إلى غرفة المكتب .

وجلس جلال وأبوه يقلبان عيونهما في المكان فاحصين ، كان جلال شابا في الثالثة والعشرين ، أسمر الوجه ، أسود العينين ، يميل أنفه إلى الكبر ، غزير الشعر ، متوسط القامة . وكان أبوه ربعة ، بارز الكرش ، مستدير الوجه ، أصلع الرأس على الرغم من غزارة شعر حاجبيه ، سقطت بعض أسنانه و لم يفكر في أن يضع مكانها أسنانا صناعية .

وأقبل حسين وزوجته فى الردهة ، حتى إذا بلغا غرفة المكتب وقف حسين متمهلا كأنما يستجمع شجاعته ، ثم دلف إلى الغرفة ، بينها انطلقت زوجته إلى غرفة الاستقبال ، ولمحه جلال وهو مقبل ، فقد كان مقعده مواجها للباب ، فنهض لاستقباله ونهض أبوه .

ومد حسين يده مصافحا ضيوفه ، فقال أبو جلال معرفا بنفسه :

_ أنا مصطفى علوان .. ابنى جلال .

فقال حسين:

__تشرفنا .. أنا حسين عبد المتعال .. أهلا و سهلا .. أهلا و سهلا . اتفضلوا .

ومر بعض الوقت فى ترحيب ، وجاءت نبيلة وهى تحمل هالـة واقتربت من الغرفة تصغى ، وخطر لها أن تتخلص من هالة ، فعادت إلى غرفتها ، ووضعتها فى السرير لتنيمها وتمددت إلى جوارها ، وإذا بنبيلة تنام ، بينا راحت هالة تعبث فى شعرها .

وغادرت أحلام غرفة الاستقبال ، ومرت بالمكتب وتمهلت قليلا ، فرأت جلالا ينظر إليها مبتسما ، ثم يغمز لها بعينه فى غفلة من الأبوين الغارقين فى حديث تافه ، فأشرق وجهها والتمعت عيناها سرورا ، وانسلت فى خفة الغزال .

وغابت أحلام قليلا ثم عادت تحمل صينية عليها ثلاث صحاف في إحداها موز وفي الثانية « جاتوه » وفي الثالثة برتقال من الحجم الكبير ، ودقت باب الغرفة بطرف الصينية وجلال يرقبها ، وقد هم أن يخف إليها يحمل عنها الصينية ، ولكنه ثاب إلى رشده ، وبقى في مكانه ، وأحس أن والده بدأ ينظر إليه لما نهض حسين ليتناول من ابنته الصينيه ، فتظاهر أنه يغض من بصره في حياء متكلف ، فابتسم أبوه ابتسامة عريضة فضحت يغض من بصره في حياء متكلف ، فابتسم أبوه ابتسامة عريضة فضحت للنفاق ، إني أعرفك جدا » .

ووضع حسين الصينية على منضدة صغيرة ، ثم حمل المنضدة وما عليها ووضعها أمام مصطفى علوان ، حتى كادت تلمس كرشه ، واختفت أحلام من عينى جلال ، ولكن سرعان ما عادت تحمل صينيه أخرى وانطلقت صوب غرفة الاستقبال .

واعتدل مصطفى فى مقعده ، وتأهب للخوض فى الحديث الذى -جاءوا من أجله ، فنظر إلى جلال وهو يخفى موزة فى فمه ، وقال :

_ أتكلم أنا واللا تتكلم انت .. ما هو شبان اليوم عنيهم مفتحه ؟ وضحك ضحكة طليقة ، ثم قال لحسين :

ــــأنا فاكر يوم ما رحت مع أبويا يوم كتب كتابى بقت سنانى تتكتك وركبى تخبط فى بعضها .

وابتسم حسين ابتسامة باهتة ، حزر ما جاءوا من أجله ، فراح يجمع شتات نفسه التي ذهبت شعاعا ، كان يخمن الدافع لهذه الزيارة المفاجئة ، وكان يعد نفسه لها ، ولكن ما إن سمع كلمة « كتب الكتاب ، حتى اضطرب وانقشع أمنه ، وسرت في صدره رهبة .

ومال مصطفى علوان نحو حسين وقال:

_ جلال ده ابنى ، أنا اللى ربيته ، قدامى طيب مستقيم ، لكن من ورايا ما اعرفش ، مش عايز أغشك ، إذا وافقت على طلبه اسأل عليه .. طالب إيد أحلام .. أحلام دى بنتنا ، بنحبها كلنا ، بس إياك جلال يعجبكم ويكون له قسمة ..

فقال حسين في صوت خافت مضطرب:

- ــ ده شرف کبير لنا .
- __ أستغفر الله .. الجواز قسمه ونصيب .

وسمع وقع أقدام في الخارج ، فالتفت حسين فألفى زوجته منطلقة في تأثر ، فالتفت إلى مصطفى وقال :

- _ عن إذنك .
 - ــ اتفضل .

وذهبت الزوجة إلى غرفتها ، وانطلق حسين خلفها مهرولا ، ودلفا إلى الغرفة وإذا بحسين يرى في المرآة زوجته مطرقة وفي عينيها الدموع ، وما إن أحست به حتى قالت في صوت تخنقه العبرات :

- _ عارف جايين ليه ؟
- ــ عارف ، جايين يخطبوا أحلام .

وانفجرت الزوجة بالبكاء ، فدنا منها يربت على كتفها ويقول :

_ مسير البنت تكبر وتسيب بيت أبوها .. أنا عـارف إنها ح توحشك .

فقالت وهي تشرق بدموعها:

- ــ أنا مش بعيط على كده .
 - _ أمال بتعيطي على إيه ؟

فقالت وقد استدارت وأخفت وجهها في صدره :

- ــ بعيط على إن بقى لى بنت تتجوز .
 - وضمها إليه في حنان وقال:

__ اطمني ، مش ح تعجزي أبدا .

ومد يده ورفع ذقنها ، والتقت عيناه بعينيها ، وقال :

_ ح تفضلي طول عمرك حلوه .

ثم قبلها قبلة هادئة وقال:

__ امسحى دموعك وروحى للناس.

فقالت وهي تجفف دموعها بيديها:

_ و ح تقول لهم إيه ؟

_ ح اقول لهم : إدوني مهله أفكر .

وسارت زينب وهي تقول في أسي:

_ هيه . . كلها سنه والا اتنين وابقى جده .

وذهب حسين إلى غرفة المكتب ، وانسلت زينب إلى غرفة الاستقبال ، وما إن استقرت في مقعدها حتى دوى صوت « بجب » أطفال وصوت زمارة .

واستيقظت نبيلة على الدوى ، وبكت هالة ، فنهضت نبيلة وحملتها ، وذهبت ثائرة إلى غرفة الاستقبال وهي تقول :

_ كده خضيتوا البنت .

وتظاهرت بأنها فوجئت بوجود أم جلال ، فتأخرت خطوة ، وإذا بأم جلال تقول :

_ خشى يا بنتى .. ما فيش حد غريب .

وتناولت الأم هالة ، وضمتها إلى صدرها ، وجلست نبيلة وتأهبت

لتطلق لسانها من عقاله وإذا بصوت ارتطام حذاء صغير بالباب يتتابع الواذا برنين الجرس يدوى متصلا ، فقالت الأم :

_ نبيله .. شوفي مين .

وقالت أحلام في سذاجة :

_ ما فيش إلا سوسن وعاطف .. هي اللي تحط صباعها ع الجرس ما تشيلوش إلا لما يتفتح الباب ، وهو يفضل يضرب الباب بجزمته .

وفتحت نبيلة الباب ، فدخلت سوسن ترتدى قناعا على وجهها يتبعها عاطف ينفخ في زمارة وقد تمددت مثانتها حتى بلغت نهاية تمددها ، فقالت له نسلة :

ــ بس بقى .. ح تطق .

فقال لها عاطف وهو ينفخ :

_ ما لكيش دعوه .

وضربت سوسن (بمبة) .

وأرادت نبيلة أن تبعدهما ، وإذا بسوسن تفلت منها ، وتذهب إلى غرفة الاستقبال .

رأتها أم جلال ، فقالت :

ــ أهلا .. أهلا .. ما تشيلي الوش ده وورينا حلاوتك .

وهزت سوسن كتفيها ، وقد ثبتت عينيها على الموز والبرتقال والجاتوه ، وأرادت أمها أن تخرجها من الغرفة ، فقالت لها :

ـــ سوسن ،، بره ـ

-- سيبيهم .. كلنا عندنا عيال .

وقبل أن تتحرك سوسن ، دخل عاطف وصوت زمارته يسبقه ونبيلة في أثره ، فقالت الأم في غيظ مكتوم :

_ نبيلة .. خدى اخواتك من هنا .

فقالت أم جلال:

_ سييهم .. كلنا عندنا عيال .

ورأى عاطف الصينية وما عليها ، فقال :

_ موزة .. موزة ..

ودفعته أمه ، وإذا بمثانة الزمارة تنفجر ، فقال عاطف لأمه وهو يبكى :

_ أنا مالى . إنتى اللى طققتيها .. ما حدش ح يدفع تمنها غيرك .. وارتفع صوته بالعويل ، فأقبل أبوه وقال وهو بعيد عن الغرفة :

ــ عاطف . . تعال . . تعال أجيب لك و احده تانيه .

وحملته نبیلة ، وذهبت به إلى أبیه وهو یتلوی بین یدیها ، وأخذه أبوه فى رفق وراح یربت على ظهره ویقول له :

ــ بس . ح أجيب لك عروسه كبيره .

فقال عاطف وهو يمسح دموعه .

ـــ لا .. أنا عايز أتومبيل .

وراحت الأم تنظر إلى نبيلة نظرات زجر لتنسجب ، ولكن نبيلة أعرضت عن نظراتها .

وقالت أم جلال:



ورأى عاطف الصينية وما عليها فقال : موزة .. موزة ..

- _ أمال سامى فين ؟
 - فقالت أحلام:
 - _ راح السينها .
 - و قالت أم جلال:
- _ عقبال ما يروح مع عروسته .
 - فقالت زينب:
 - __ تسلمي .
- ونهضت أم جلال ، فقالت زينب :
 - _ ما بدرى .
- ــ بدرى من عمرك . ابقوا شرفونا .

وسلمت على الأم وعلى نبيلة ، وعلى سوسن ، ثم طبعت قبلة على خد أحلام .

وأسرعت أحلام تفتح الباب ، وسارت زينب وأم جلال وخلفهما نبيلة وسوسن .

ونهض جلال وأبوه وحسين، وانطلقوا صوب الباب ، وإذا بالجميع يتقابلون عند الباب لأول مرة ، وانتهزت أحلام هذه الفرصة ، فراحت ترنو إلى جلال في حب وهو ينظر إليها مشرق الوجه مبتسما .

وجاء مراد ، وفي وجهه أثر شحم ، وقد اتسخت يداه ، وفي ساقه أثر تراب امتزج بعرقه ، وما إن رأته أمه حتى اربد وجهها ، وقالت في ثورة :



- غوله عملت فرس قالوا: ليله سعيده عليها وعلى أو لادها

_ مش قلت لك ما تركبش عجل .

فقال في بساطة:

_ ما ركبتش عجل.

_ أمال إيه الوساخة دى !

__ ركبت موتوسيكل .

وشق طريقه بينهم وانطلق.

وانصرف الضيوف ، بعد أن تصافح الجميع ، وضغط جلال على يد أحلام ضغطة خفيفة أحست أثرها في قلبها الذي اشتد وجيبه ، وفي وجنتيها اللتين اشتعلتا نارا .

واتجهت نبيلة إلى غرفة الاستقبال وحملت الصينية ، وانطلقت أحلام إلى غرفة المكتب وعادت بالصينية الثانية، ووضعت الصينيتان على نضد بالمطبخ، وإذا بالأيدى تتخاطف ما بهما ، وقالت نبيلة ، وهي تمد يدها تأخذ قطعة جاتوه :

_ غوله عملت فرح قالوا ليلة سعيدة عليها وعلى او لادها .

الفصل السادس

أتى المساء ، فنام عاطف كعادته على الأريكة في الردهة ، وفي قدمه فردة حذاء ، وقدمه الأخرى عارية ، وأقبلت سوسن تتمطى ودنت من أمها وقالت :

- ــ ماما .. ماما .. عايزه أنام .
 - ــــ روحي نامي .
 - ــ حد يفرش لي السرير .
 - فقالت أحلام:
 - _ تعالى .. أنا داخله أنام .
- والتفتت أحلام إلى أمها وأبيها وقالت :
 - _ اتمسوا بالخير.

وسارت حتى إذا بلغت الردهة ، حملت عاطفا لتضعه فى سريره .. وانطلقت إلى غرفة نوم الأولاد، فإذا بمراد قد نام ورجلاه مستندتان إلى الحائط ، ورأسه مدلى عند منتصف السرير فلم تلتفت إليه ، وتقدمت إلى سرير عاطف ، ووضعت حملها فيه فى رفق ، ثم ذهبت إلى غرفتها وسوسن فى أثرها تردد فى صوت ممدود كله تكاسل :

_ عايزه أنام .

وتقدمت أحلام من سرير سوسن وأصلحت وضع وسادته ، ورفعت الأغطية ، فأسرعت إليه سوسن وقبل أن تتمدد فيه قالت :

__ غطيني .

وأحكمت أحلام وضع الأغطية حول سوسن ، ثم خلعت ثيابها واندست في سريرها وقد أغمضت عينها لترى بعين خيالها أحلامها البهيجة وأمانيها العذاب .

كان الزوجان يترقبان انصراف الأولاد ليتحدثا في نجوى ، ويتشاورا في أمر خطبة جلال لأحلام ، ولكن بقاء سامى ونبيلة في الغرفة جعل صبر الأب ينفد ويقول لهما :

_ انتوا مش داخلین تناموا ؟

فقال سامى:

_ لأ . أناح اذاكر .

وقالت نبيلة وهي تنهض:

__إذا كنت ح تذاكر هنا ح اسيب لك الأوده واروح اقرا في أودتنا . فقال لها سامي :

_ تعملي طيب .

وغادرت نبيلة الغرفة ، والتفت الزوج إلى زوجته وقال :

ـــ الواحد وخمان النهارده ، ياللا نخش ننام .

ونهض ونهضت زوجته وسارا إلى غرفة نومهما.

ووصلت نبيلة إلى غرفتها ، فأضاءت النور ، وقطعت على أحلام حبل

أحلامها اللذيذة ، فقالت في عصبية ، دون أن تفتح عينيها حتى لا تفر الرؤى العذاب :

ــ اطفى النور . خلينا ننام .

وراحت نبيلة تخلع ثيابها وترتدى بيجامتها ، وقالت في هدوء :

ـــ ما تنامى .

فقالت أحلام وهي تتقلب في غضب :

_ ما اعرفش أنام في النور .

_ وانا ما اعرفش اقرا في الضلمه

ـــ هو الواحد ما يعرفش يستريح في البيت ده !

فقالت نبيلة وهي تتمدد في السرير وفي يدها كتاب:

_ هانت .. بكره تسيبيه وتستريحي منه على طول .

وتقلبت أحلام مرة ثانية في حنق ، ثم جذبت غطاءها وأخفت به وجهها ، لتعيش في الظلام تهيم في دنيا جميلة من نسج خيالها .

ودخل الزوجان غرفتهما ، وأغلقا بابها عليهما ، واتجهت الزوجة إلى هالة ، وأحكمت الغطاء حولها وهي تقول لزوجها :

_ عرفت ماهية جلال كام ؟

ـــ قالوا خمسة وعشرين جنيه .

_ و تفتكر خمسه وعشرين جنيه تفتح بيت اليومين دول ؟ ح يسكن بكام وياكل بكام ؟

وهز الزوج كتفيه ، و لم ينبس بكلمة ، وقالت الزوجة :

_ قل لي : أبو جلال قال لك إيه ؟

_ قال لى : إذا حصلت قسمة يجيبوا الشبكة ، ويقروا الفــاتحة ويأخروا الكتاب للدخلة .

_اسمع أنا بنتى لازم يتعمل لها فرح ، أنا مش بقى لى تمنتاشر سنة متجوزه لكن مش قادرة انسى إنى دخلت ع السكت ، الحكاية دى عملت لى قرحة فى قلبى ، كل ما افتكرها انقبض وعينيه ترغرغ بالدموع . إيه اللى خلانا عملنا كده ؟ إزاى قبلت انك تيجى لوحدك تاخدنى زى اللى نكون عملنا عمله .. دخلنا شقتنا نتسحب زى الحراميه ، لا طقت زغروتة ولا انقادت شمعة .

واقترب منها وقال وهو يلف ذراعه حولها:

_ ياما ناس اتعمل لهم أفراح ولا عمروش .

ـــ لكن برضه الفرح حلو .

وقال لها وهو يضمها إليه :

ـــ الستر والتوفيق أحسن .

وابتعدت عنه في دلال وهي تقول :

_ افتكرنا نفسنا وح ننسى البنت ، قول لى ما عرفتش إذا كان ح يسكن لوحده واللاح يسكن مع ابوه ؟. أنا بنتى ما تسكنش مع حد أبدا .

ــ دى تفاصيل ما تكلمناش فيها ، مش لما نوافق ع الجواز قبله ؟ أتما خلع ثيابهما ، واتجها إلى السرير وتمددا فيه ، وقال الزوج وهو يضع رأسه على ذراعه وينام على جنبه ، ووجهه في وجه زوجته :

_ قبل ما نقول آه أولا لازم ناخد رأى أحلام .

_ ناخد رأيها في إيه ؟

_ في جلال . يمكن ما بتستظرفوش .

_ أحلام لسه صغيره إيش عرفها بالكلام ده .

_ أنا لما جيت أتجوزك مش خدوا رأيك ؟

_ قالوا لى إنك جاى تخطبنى ، قمت وديت وشى الناحيه التانية ، قال إيه مكسوفة ، والحقيقة إلى كنت فرحانة .. كل بنت بتفرح لما تتخطب ، بتحس إن بقى لها قيمة ، وإن فيه راجل بيطلبها . فرحت خالص مع إنك كنت غريب عنى ، ما كنتش أعرفك خالص ، كنت بالنسبة لى زى سر جميل .

_ وعرفتي السر ده إمتي ؟

_ بعد ما اتجوزنا . الحب ما يجيش الام العشرة .

ـــ أمال اللي بيحبوا بعض قبل ما يجوزوا ؟

_ ده حب شیطانی . ما بیعمرش .

وقربت وجهها منه وقالت :

_ قولي لي بتحب فينا إيه ؟

ـــ باحب فيكم كل حاجة فيكم . كدبكم ، وزيطتكم ووجع الدماغ اللى بتسببوه لى ،تعرفى آخر مره سافرت فيها ، لما جه الليـل ودخلت أودتى أنام حسيت إنى وحيد ، ما ليش حد فى الدنيا ، بقيت

أتلفت وانا مقبوض ورغرغت عيني بالدموع ، اشتقت ساعتها لعياط هاله ، وسآلة سامي ، ولت نبيلة .

وشرد قليلا ثم قال :

_ الله احنا مالنا الليله دي بنفتكر نفسنا وننسى البنت .

الصبح لازم تسألي أحلام عن رأيها في جلال.

__ ح أسألها وإن كنت واثقه انها ح تودى وشها الناحيه التانيه وتطاطى راسها .. يا ترى عيلة جلال شكلها إيه ؟

ــ هي ح تتجوز جلال واللاح تتجوز عيلته ، الرك عليه هو .

_ الرك ع الأصل برضه ، الأصيل ما يعبش .

ثم تنهدت وقالت:

__ بقى انا اللى كنت بالعب أول امبارح فى الحاره بقى لى بنت تتجوز !

_ ما شفتكيش وانتي بتلعبي في الحاره ، شفتك شابه حلوه .

_ هو انت لحقت تشوفنی ، كنت مستعجل قوى ، ما لحقت خطبتني ما لحقت دخلت عليه .

ــ فاكره ليلة الدخله لما لقينا نفسنا في الشقه لوحدنا ؟

ومدت يدها تطفىء النور ، وهي تضحك ضحكة خافتة وتقول :

ــــوالنبی ما تفکرنیش ، دا احنا کنا عبطه قوی .

وامتزجت ضحكاتهما الخافتة ، ونسيا ابنتهما وراحا يفكران في نفسيهما بكل حواسهما . وانقضى الليل بأسراره ، ودبت الحياة في الشقة ، فإذا بملابس النوم تلقى هنا وهناك ، وإذا بشجار وصياح وعويل وبكاء ، وإذا بأياد تمتد إلى الصحاف ولا ترتفع إلا بعد أن تصبح خاوية .

وخرج الأب والأولاد ولم يبق في الشقة إلا أحلام وهالة وأمهما . راحت أحلام تلتقط الثياب المبعثرة ، وتملأ القلل ، وتعبد تنسيق المكان ، بينا كانت الأم تغسل ثياب هالة وجوارب الأولاد ومناديلهم . ونادت الأم :

ــ أحلام . تعالى خدى الغسيل ده انشريه عندك .

وذهبت أحلام إلى الحمام ، ودنت من أمها ، فإذا بالأم تقول لها وهي تتظاهر بالانهماك في عصر ثوب من ثياب هالة :

_ عارفه إن جلال جه يخطبك امبارح ؟

ونظرت إلى ابنتها من طرف عينيها لتراها وهي تشيح بوجهها خجلا ، ولكن أحلام قالت في هدوء :

ــ عارفه .

ولم تجد الأم مبررا لتتظاهر بالانشغال عن ابنتها لتخفف من حدة حجلها ، فما عادت البنات يخجلن من ذكر الزواج والخوض في أحاديثه فوضعت الثوب على الصنبور ، وأسندت كفها على الحوض وقالت :

- ــ وعارفه إنه بياخد محمسه وعشرين جنيه ؟
 - ــ عارفه .
- ــ وتفتكري الخمسه وعشرين جنيه يكفوكو ؟

فقالت أحلام في حماسة:

_ یا ماما لازم نبتدی من أول السلم ، نكافح سوا ، ویكون لنا هدف واحد ، نبتدی صغیرین ونكبر مع بعض ، عشان لما نعجز تكون لنا ذكریات مشتركة نعیش علیها ، انتی نسیتی یا ماما بابا كانت ماهیته كم لما اتجوزتو ؟

. _ كانت ماهيته اتناشر جنيه ، لكن كانت أيام غير دى ، كانت أجره الشقه اتنين جنيه ، ورطل اللحمة الضاني كان بتلاته ونص .

_ يا ماما احنا اتنين ، ح ناكل إيه ولا ح نشرب إيه ؟

_ النهارده اتنين بكره ح تزيدوا .

۔۔ و کمان ماہیتنا ح تزید ، ومش ح نعمل زیکو ، ح نخلف واحد أو اتنین بالکتیر .

_ كان غيركم أشطر .

واقتربت أحلام من أمها وقالت:

_ قولى لى : إيه هى أسعد أيامكم ؟ مش أيام جوازكم الأولى والأيام اللى اتولدت فيها نبيله وسامى ومسراد وسوسن وعاطف ؟ دانا فاكره يوم ما اتولدت هاله ، كان بابا فرحان ، إحنا لما اتولدنا كنا عبء جديد عليكم ، وبرضه فرحتوا بينا ، مش كل الأعباء تزعل ، في أعباء لذيذة الواحد يتحملها وهو مبسوط ، أنا أفتكر إن متاعب الكفاح من الأعباء اللذيذة . لما تزرعى شجره وتتعبى فى زرعها مش بتنسى كل تعبك لما تشوفيها كبيره ، كان الزوجه بترعى جوزها مش بتنسى كل تعبك لما تشوفيها كبيره ، كان الزوجه بترعى جوزها

وبتتعب عشانه وبتحرم نفسها من كتير ، عشان توفر له الراحه ، وتهيأ له الفرصة اللي يكبر فيها ، لغاية ما تشوفه كبير ، وساعتها تنسى كل تعبها .

ونظرت أمها إليها في دهش ، وهي صامتة ، لم يدر بخلدها أن أحلام ابنتها الطفلة ، التي كانت تحسب حتى الساعة أنها لا تفهم عن الحياة شيئا ، تتحمس لخطبتها كل ذلك الحماس ، كانت تظن أنها ستدير وجهها حياء ، حتى إذا ما ألحت عليها في استطلاع رأيها قالت في صوت متهدج : (البركة فيكم . اعملوا اللي تشوفوه) .

ورأت الأم من الحكمة أن تساير ابنتها في عواطفها ، وألا تحاول تبصيرها بمستقبلها ، فقد أحست ضآلة نفسها بعد أن سمعت آراء ابنة الأمس ، فقالت :

_ يا بنتى احنا كل اللي عايزينه سعادتك ، وإن ربنا يهدى سركم . والتفتت الأم صوب السماء وقالت :

... يا رب اجعل أيامهم أحسن من أيامنا .

فقالت أحلام وهي تبتسم :

ــ واللازيها .

_ واللا زيها يا بنتي . والله أيامنا ما كانت وحشه .

وأخذت أحلام الغسيل وغادرت الحمام لتنشره ، والأم تنظر إليها في إعجاب وعجب .

وراح الوقت يمر ، وعاد الأولاد من مدارسهم ، وبدأت متاعب

الغداء ، وارتفعت الأصوات ، وأقبل الـزوج ، واتجه إلى غرفتــه ، وأسرعت زوجته إليه ، فقال لها وهو يخلع جاكنته :

_ هيه . كلمتي أحلام ؟

ــ كلمتها .

ـــموافقة على جوازه ؟

مد موافقه بس ا دا لو جاب محمامی ماکنشی اتکلم لمه زی ما تکلمت له .

_ قالت لك إيه ؟

فقالت وقد التمعت عيناها ببريق الإعجاب:

ــ قالت كلام ما عرفش اقوله أنا يا للي متجوزة بقي لي تمنتاشر سنة .

ثم مصمصت بشفتها وقالت:

ــ بنات آخر زمن .

القصل السابع.

وقفت أحلام أمام المرآة تديم النظر إلى وجهها ، ثم ترفع يدها وتصلح الشعرات المبعثرة على جبينها ، واقتربت نبيلة منها ومررت يدها على ظهرها لتذهب التقلصات التي كانت بثوبها ، ونظرت إلى ساقيها مليا ، فالتفتت إليها أحلام وقالت وهي تبتسم :

_ إيه ، خط الشراب مش عدل ؟

فقالت نبيلة وهي تضحك :

_ فين الشراب ده ، هو انتي لسه لبستيه ؟

ورفعت أحلام ثوبها ، والتفتت بنصفها الأعلى ، لترى بطن ساقها وقالت :

_ ما اهه .. بصى عدل .

فازداد ضحك نبيلة ، وقالت :

_ ح تستعميني ، وانا نظري سته على سته ؟

وصكت ضحكات نبيلة أذن سامى ، فخرج من غرفته ، وهو عارى الصدر ، يرتدى بنطلونا قصيرا وجوربا وفردة حذاء ، وفي يده الفردة الثانية وقال :

ــــ إيه الضحك ده ، زمان جلال طالع ، يقول علينا إيه ؟

فقالت نبيلة وهي تشيح بوجهها عنه:

_ إيه . ما نضحكش ؟!

_ لأ ما تضحكيش .

ــ هو حكم قراقوش ده ، واللا إيه ؟

_ أيوه حكم قراقوش . . .

ـــ اسمع . انت ما لكش دعوة بيه . انت مش ولي أمرى .

كانت الأم ترقب زوجها وهو يرتدي ثيابه ، فقالت له همسا:

ــ يا راجل اخرج لهم خليك حمش .

وخرج الأب لهم وقال في صوت خافت :

_ ما بس . زمان جلال طالع .

فقالت نبيلة في عصبية:

-- خلیه یسکت عنی ، مالوش دعوه بیه ، دا مش عایسزنی آضحك .. مش عایزنی اتكلم .. مش عایزنی اتنفس .. یعنی أموت یعنی ؟

فقال سامي :

- یا بابا مش سامعها بتضحك ازای ؟

ــ يا بابا دا عامل نقره من نقرى .

ووقف الأب حائرًا بينهما ، فأسرعت الأم لتضع حدا لهذا النزاع فصاحت :

_خللى عندك دم انت وهى ، ياللا كل واحد منكم على أو دته ، مش عايزه أسمع حس حد فيكم .

وانسحب سامى إلى غرفته ، ودخلت نبيلة إلى غرفتها ، فإذا بأحلام في شغل عنهم جميعا بتنسيق وضع الشيكولاتة على الصينية ، كان همها إرضاء جلال .

ولمحت الأم مرادا وهو مقبل من أقصى الشقة ، وقمد اتسخت ملابسه ، وتلوثت يداه بالحبر ، فصاحت فيه :

... مراد . خش اشطف والبس هدوم نظیفه ، زمان جلال طالع . فقال فی بساطة :

_ وانا مالي ومال جلال ؟!

ـــ لما يشوفك وسخ كده يقول إيه ؟

ــ يقول اللي يقوله ، هو جاي عشاني ؟

ونظر من خلال الباب فرأى أحلام ، فقال :

ــ اللي جاي عشانهم يتزوقوا له .

فصاحت الأم فيه:

_ خش اشطف بلاش قلة أدب .

وأسرع مراد إلى الحمام ، واتجهت الأم إلى زوجها ، وقالت :

_ كلمه بصراحه .. اسأله إذا كان ح يسكن لوحده واللاح يس مع أمه ، إذا كان ح يسكن مع أمه ماتوافقش ، إحنا لسه على البر ، واللاح تتكسف زى عوايدك ؟

فقال وهو يدس رجله في الحذاء :

_ أكسف ازاى!

_ آه . دي بنتنا ولازم نريحها .

وصمتت قليلا ثم قالت:

_ تعرف يا حسين أنا يوم ما اتخطبت قلبي ما دقش زى النهارده . أنا مش عارفه مالى موهومه كده .. بخايفه .. إلا يا حسين سألت عليه كويس ؟

_ كل اللي سألتهم عنه قالوا إنه ابن جلال .

وسمع ارتطام حذاء بالباب الخارجي ، فصاحت الأم :

_ نبيله ، افتحي لاخوكي .

وأسرعت نبيلة إلى الباب وفتحته ، وإذا بعاطف يدخل منفوش الشعر ، في وجهه آثار عرق ممزوج بالتراب ، وقد حمل في يده فردة حذاء وتدلى بتطلونه فبدت الفائلة من تحت قميصه القصير ، فصاحت نبيلة فيه وهي تجذبه من يده :

_ إيه الوساخه دى . تعالى .

وانطلقت به صوب الحمام وقالت لمراد:

_ اغسله و شه وايديه معاك .

وتركته ، فانسل مسرعا إلى حيث أمه ، فقالت له :

ـــ روح اغسل وشك وتعال عشان ألبسك البدله الجديده.

فقال عاطف وهو يهز كتفه :

- __ قبله هاتی قرش .
- ــ بعد ما تغسل وشك وتنضف ح اديك قرش.
 - ودق جرس الباب الخارجي ، فقالت الأم :
 - _ سامي افتح . جلال جه .

لكن رنين الجرس ظل متواصلا ، فقال سامي :

- ــ دى سوسن .
- ـــ طب روح افتح لها .

وقال الأب وهو يرتدي جاكتته وينظر إلى هندامه في المرآة :

_ الشيكولاته والملبس اللي اشتريتهم فين ؟

فقالت الأم:

_ مع أحلام .

و أقبلت سوسن ، وفي يدها قطعة من كعكة عيد ميلاد واتجهت إلى أبيها وقالت وهي تتمسح به :

__ بابا اشمعنى جيرانا كلهم بيعملوا لأولادهم عيد ميلاد ، واحنا ما بنعملش ؟

ومرر أبوها يده على شعرها في حنان وقال : `

_ عايزه تعملي حفلة عيد ميلاد ليه ؟ عشان تاكلي جاتسوه وشيكولاته ؟ أجيب لك جاتوه وشيكولاته .

_ لأ يا بابا . أنا مش عايزه أعمل عيد ميلاد عشان آكل جاتوه وشيكولاته ، عشان أعزم أصحابي اللي بيعزموني ، عشان يفرحسوا ويهيصوا معايا ، زى ما بفرح واهيص معاهم . النهارده بقيت قاعده معاهم مكسوفه ، لأنى عارفه إنى مش ح اجيبهم فى عيد ميلادى ، لأنى ما ليش عيد ميلاد .

واكتسى وجه الأب بسحابة من الخزن ، وظل صامتا يغالب مشاعره ، تحرك الحنان في صدره فكاد يضعف ويعد ابنته بحفلة عيد ميلادها ، وإن كلفه ذلك ما لا يطيق ، وإذا بزوجه تجذب سوسن من يدها في رفق ، وتقول لها في صوت فيه رنة أسى وحزن ، وإن جاهدت أن ينبعث طبيعيا ، لا يشوبه ذلك الكدر الذي حركه حرمان ابنتها من أمنية عزيزة من أمانيها :

ـــاسمعى يا سوسن ، اللى بيعملوا حفلات عيد ميلاد أو لادهم بيكون عندهم ولد اتنين مش زينا ، احنا لو عملنا « عيد ميلاد » ح نعمل حفله كل شهر .

وتسرب ذلك الحديث إلى آذان الأولاد ، فأقبل سامى ونبيلة وأحلام ومراد وعاطف ووقفوا عند باب الغرفة يصغون ، وكأنما شاءت هالة أن تعلن عن وجودها فراحت تعبث فى أصابع رجلها وهى مستلقية فى سريرها ، تصبح صبحات متتابعة .

وانبرت نبيلة تشد أزر أختها قالت :

ـــ بلاش نعمل لكل واحد فينا عيد ميلاد ، نعمل عيد ميلاد واحد لنا كلنا .

فقالت الأم:

_ ونختار تاریخ الحفله دی ازای ؟

فقال سامي وهو يشمخ بأنفه :

_ تتعمل في عيد ميلادي أنا ، لأني أنا أكبر ..

ولم تتركه نبيلة يتم جملته ، وقالت مقاطعة :

_ ليه الأنانيه دي ؟

وقالت الأم منتهزة هذه الفرصة لتتخلص من هذه الورطة .

_ ح تتخنقوا ! ياللا كل واحد فيكم على أودته .

وقالت أحلام في هدوء:

_ ولا خناق ولا حاجه . نعمل الحفله دي في عيد ميلاد بابا .

وصاح الأولاد كلهم موافقين :

_ أيوه عيد ميلاد بابا .

واندفعوا إليه يلتفون حوله ، وأمسكت سوسن ببنطلونـه وصاح مراد :

__ يحيا بابا .

ودق جرس الباب ، فقال الأب :

_ جلال جه . ياللا يا سامي افتح له ودخله أودة الاستقبال .

وخرج سامى ، وانسلت أحلام ونبيلة من الغرفة ، وقالت الأم

لمراد :

_ ياللا روح اقلع هدومك اللي زى الزفت دى ، يا نبيله خدى عاطف لسبه .

وعادت نبيلة وتناولت يد عاطف وخرجت به ، وأسرعت سوسن لتنظر إلى جلال من بعد ، وبقى الزوجان وحدهما في الغرفة ، فقالت الأم في مرارة :

__ طبعا يحبوك ويكرهونى أنا . ما انت دايما تصدرنى لهم . أنا اللى أقول ما فيش خزم .. ما فيش بدل .. ما فيش خروج .. ما فيش فلوس .. إزاى يحبونى .. أنا من بعد النهارده ما ليش دعوه بأولادك . انت اللى تربيهم :

فاقترب منها وقال:

ـــ إنتي زعلتي ؟! أهم ولادي وولادك .. دول ما يقصدوش .

_ دى مش أول مره . دول بيعاملونى زى ما اكون مرات أبوهم . فقال و هو يبتسم :

_ ولا يهمك . كفايه انك تكوني أمي أنا .

وأسرع عاطف ، بعد أن ارتدى ثيابا جديدة ، إلى غرفة الاستقبال ، وقف ببابها بالقرب من سوسن ينظر .

كان جلال جالسا فى المقعد المواجه للباب ، وكان سامى إلى جواره ، وقد ساد الصمت بينهما . ولمح جلال عاطف ، فقال له وهمو يهم لاستقباله :

ـــ تعال .

فقال عاطف وهو يهز كتفه:

_لأ ..

_ تعال عشان أديك حاجه حلوه .

فقال عاطف وهو يتقدم:

__ هات قرش قبله .

واربد وجه سامي وصاح في عاطف:

_ ح اقطم رقبتك .

وقال جلال :

___ سبه .

وانطلقت سوسن كالعاصفة إلى حيث كان والدها وقالت:

_ ماما .. ماما .. إلحقى . عاطف بيشحت من جلال قرش . فقالت الأم في عصبية :

_ امشى هاتيه ، هى العيال دى ما تسترش أبدا .

ومد الزوج يده إلى عقدة الكرافتة وأصلحها ، ثم سار إلى غرفة الاستقبال ، وزوجته توصيه :

__ ما تنكسفش .. إذا كان ح يسكن مع أمه الله الغنى عن دى جوازه .

ودخل الأب الغرفة ، فنهض جلال لاستقباله ، وتصافحا ، وانسل سامى من الغرفة وراح يبعد إخوته عنها ، فيسمع الأب وجلال همهمتهم ، فيرفع الأب صوته بالترحيب ليغطى الضوضاء المنبعثة من الخارج:

_ أهلا وسهلا . إزاى والدك ؟

ـــ بخير والحمد لله .

واعتدل الأب في جلسته ، وراح يجمع شتات نفسه ، فقد كان مقبلا على حديث خطير ، قال :

_ أنا كل اللى سألتهم عنك قالوا إنك طيب وابن حلال ، وأنا يابنى يشرفنى إنى أدى لك بنتى ، بس أحب أقول لك إن العيشه اليومين دول صعبه ، كل حاجه غاليه ، فكرت ح تسكن بكام وح تعيش ازاى ؟ أيام أنا ما اتجوزت سكنت باتنين جنيه ونص ، وكل اللى كنت باصرفه على البيت تلاته جنيه ، كنت عايش, بالمبلغ ده عيشة أمرا . . كنت باكل تفاح وموز وفراخ وحمام ، وبالبس حرير وصوف إنجليزى ، أفصل كل ست اشهر بدله جديده . . كان القسط اللى بدفعه للترزى خمسين قرش .

وسمع طرق خفيف على الباب ، فالتفت الأب فرأى أحلام وبين يديها الصينية ، عليها صحاف من بلور ، نسقت فيها الشيكولاتة والملبس والجاتوه ، فنهض ليآخذ منها الصينية ، فإذا به يرى أبناءه جميعا قد اصطفوا خلف أحلام ، كانوا أشبه بالقطط التي جاءت على رائحة السمك .

وضع الأب الصينية أمام جلال وقال:

ـ اتفضل ..

ومد جلال يده وتناول قطعة شيكولاتة ، بينا راحت أحلام تبعد أخواتها عن الغرفة في رفق وتحول بينهم وبين الهجوم على الصينية المشتهاة . ووجد جلال الفرصة سانحة ليتحدث فقال :

_ حكاية الشقه فرجت .



كانت فرصة ذهبية أن ينفردوا بالشيكولاتة والملبس والجاتوه

ــ إزاى ؟

ــ بابا اتنقل المنصوره ، ح ياخذ ماما معاه ، وح يسيب لى الشقه . وأحس الأب راحة ، فقال وهو يزفر في اطمئنان :

_ عال .

_ أما الأكل واللبس ..

فقاطعه الأب قائلا:

ــ الحاجات دي كلها مقدور عليها .

ونهض الأب مستأذنا ، وأسرع إلى زوجته يزف إليها النبأ ، ويطمئنها أن ابنتها لن تعيش مع حماتها تحت سقف واحد .

واستطاع عاطف أن ينسل فى غفلة من الجميع إلى غرفة الاستقبال ، وأن يذهب مباشرة إلى الصينية ، وأن يغتنم الفرصة لينفرد بما فيها وحده ، وجلال يعاونه على فض أغلفة الشيكولاتة ، وفطنت سوسن إلى غياب عاطف ، وإلى تسربه إلى غرفة الاستقبال ، فخفت تشاركه الغنيمة . وأراد الأب أن يعلن بطريقة عملية أن جلالا قد صار فردا من الأسرة فأذن لأولاده جميعا أن يشاركوه جلسته .

وأقبل الجميع يسلمون عليه ، ودخلت الأم وصافحته في شوق ، وما أن جلس الأولاد حتى رأوا فتك عاطف وسوسن بالشيكولاتة ، فخف كل منهم إلى الصينية ليأخذ نصيبه .

وجاءت أحلام ، ومدت يدها إلى جلال ، فإذا به يضغط على يدها ف حب ، والتقت عيونهما لحظة ، كان لها في نفسيهما وقع السحر واتجهت إلى كرسى قبالته وجلست ، فشاع فى المكان جو عجيب من الحب والهيام ، ما كان يعكره إلا الأيدى الممتدة إلى الصينية فى تتابع ، ونظرات الزجر التى كانت تسددها الأم إلى أبنائها ، والتى كانوا يشيحون بوجوههم عنها ، كانت فرصة ذهبية أن ينفردوا بالشيكولاتة والملبس والجاتوه ، وأن يلتهموا ما يشاءون كما يشتهون تحت بصر أمهم وسمعها ، دون أن تقدر على زجرهم ، فرصة قلما يجود الزمان بمثلها !.

الفصل الثامن

أراد جلال أن يعلن أصهاره أن فى أسرته من يمتلك سيارة ، فدعا شفيق ابن خاله ليذهب معه فى اليوم المحدد لقراءة الفاتحة ، ودفع المهر والاتفاق على يوم الزفاف .

ووقفت السيارة أمام بيت حسين ، وهبط منها جلال وأمه وأبوه وشفيق ، كان شفيق شابا فى الرابعة والعشرين ، طويل القامة ، عريض المنكبين ، خفيف الظل ، من ذلك الطراز الذى تهفو إليه القلوب من أول نظرة .

وكان عاطف وسوسن واقفين عند باب البيت ، فلما رأى عاطف جلالا ، أسرع يحييه ، فمد له يده مصافحا وقال :

ــ أهلا صاحبي ، انت جيث ؟

ورفعه جلال بين ذراعيه وقال له وهو يقبله:

ــ أهلا عاطف ، ازيك . خ

ووضعه على الأرض ، فرفع رأسه وقال :

ــ هات قرش بقى .

فوضع جلال يده في جيبه وأخرج قرشا ، ووضعه في كفه ، فقالت سوسن كأنما تعلن عن وجودها :

_ اخص يا عاطف ، ح اقول لماما .

فقال لها عاطف:

ــ وانتى مالك ؟

_ يا شحات .

ومد جلال يده في جيبه وأخرج قرشا آخر وأعطاه لسوسن ، فتمنعت تمنع الراغب ، ثم أخذت القرش في خفة ، وقالت لعاطف : __ تعال لما اشترى لك حاجه .

وابتعدا وجلال ينظر إليهما وهو فى طريقه إلى البيت ، وقد وسع خطاه ليلحق بأهله الذين سبقوه إلى السلم .

ودق الجرس ، فإذا بحسين يفتح الباب في سرعة ، فقد كان يرصد مقدمهم ، ورحب بهم وقدم مصطفى علوان شفيقا إلى حسين ، وجلسوا يتبادلون عبارات الترحيب ورائحة البصل المحمر في السمن تملأ أنوفهم .

كان المطبخ على قدم وساق ، أحلام تغرف الطبيخ في الصحاف ، والأم تحمر الدجاج ، ونبيلة وسامي ومراد يغدون ويروحون بين المطبخ والسفرة يحملون الصحاف والخبز والماء المثلج .

وقالت الأم:

ـــ روحي انتي يا أحلام غيري هدومك .

فقالت نبيلة ، وهي تجفف يديها في « الفوطة » التي كانت ترتديها فوق ثويها : ـــ واشمعنی أحلام ، ما اروح أنا رخره أغير هدومي .

فقال سامي متحديا ومتأهبا للشجار:

ـــهو ما فيش حد بيعمل حاجه ، إلا لازم تعملي زيه ، ما تقولي لازم أنجوز أنا رخره .

ــ وانت حاشر نفسك في كل حاجه ليه يا بايخ ؟.

فقالت الأم:

ـــ هس .. انکتموا وخللو عندکم دم ، الناس جوه . یاللا غوروا کلکم من وشی . مش عایزه حد منکم هنا .

وانسلوا من المطبخ ، وراحوا يرتدون ملابسهم . كأنما كانوا فى سباق ، وخرج سامى من غرفته يرتدى الحذاء والقميص والجاكتة ، وهو يهرول صوب غرفة الاستقبال ، وإذا بعاطف يضحك ضحكات عالية ، وأطلت أحلام ونبيلة برأسيهما ، ومراد يقول :

ــ سامي ح يقابل الناس من غير بنطلون .

ونظر سامى إلى ساقيه العاريتين ، ثم عاد مهرولا إلى غرفته ، فقالت له نبيلة وهي ترمقه في زراية :

ـــ بلاش خفافة والنبي .

وأتمت أحلام ارتداء ملابسها وتقدمت في تؤدة إلى غرفة الاستقبال .. وما إن لحها مصطفى علوان حتى قال مرحبا :

ـــ أهلا .. أهلا بعروستنا .

ونهضوا جميعا لاستقبالها ، وصافحتهم واحدا واحدا ثم استدارت

لتجلس فى كرسى بعيد ، فقال شفيق وهو يفسح لها مكانا إلى جوار جلال :

_ ح تروحي فين ، محلك بقي هنا .. جنبه .

وأطرقت رأسها حياء ، ثم اتجهت إلى الكرسي المجاور لكرسي جلال وجلست .

وجاءت نبيلة فى خطوات راقصة ، وتقدمت ثابتة الخطو وسامى ومراد خلفها ، وقالت وهى ترفع يدها إلى رأسها بالتحية :

_ السلام عليكم .

ورد الجميع:

_ وعليكم السلام ..

واتجهت إلى مقعد مواجه لمقعد شفيق وجلست ، وقعد بالقرب منها سامي ومراد .

ولاحظت أم جلال أن نبيلة تطيل النظر إلى شفيق في استغراب ، فقالَت :

_ شفيق ابن خال جلال ، كانوا سوا في المدرسة ، انتقلوا مع بعض من فصل لفصل ، لغاية ما خلصوا الجامعة سوا .

وأقبلت زينب وصافحت الجميع ، وما إن استقرت في مقعدها ، حتى أخرج جلال من جيبه علبة صغيرة من المخمل الأحمر ، وفتحها وتناول منها دبلة راح يضعها في أصبع أحلام ، وقد أطرقت خجلا ، وإن كانت كل خالجة فيها تنطق بالفرح .

وقال له شفيق :

__ حيلك . مالك مستعجل كده ؟

فقال والد جلال:

_ خير البر عاجله .

والتفتت أم جلال إلى زينب وقالت :

_ ما فيش حد يعرف يزغرط ؟

و لم تنبس زينب بكلمة ، كانت الدموع تترقرق في مآقيها ، وأحست أن الأنظار ستتجه إليها ، فنهضت وقالت :

_ اتفضلوا .

وقام الجميع ، وقال شفيق وهو يفسح الطريق لأحلام وجلال :

ــ العريس والعروسه الأول .

فقال جلال لوالده ووالد أحلام ، وهو يشير بيده :

ـ اتفضلوا.

فقال مصطفى علوان وهو يبتسم:

ــ انتم الأول النهارده ــ دا احنا ما جيناش إلا عشانكو .

وتقدم جلال وأحلام ، ثم سار الجميع خلفهم ، ومراد يشق طريقه بينهم ، والتفت شفيق ، فإذا بنبيلة تسير إلى جواره جنبا إلى جنب ، فرفت على شفتيه بسمه رقيقة .

وجلسوا حاول المائدة ، جلال وإلى جواره أحلام وإلى جوارها والدة ، جلال ، ثم نبيلة فسامى ، وجلس مصطفى علوان في صدر المائدة ،

وجلس حسين أمام جلال وإلى جواره زوجته ثم شفيق ومراد .

ومدت أم جلال يدها ، ورفعت الأطباق من أمام أحلام وقالت :

___النهارده تاكلي انتي و جلال في طبق واحد ، عشان ما تفترقوش عن بعض أبدا .

وأطرقت أحلام حياء ، وقالت أم جلال لابنها :

_ اقطع لقمه وغمسها في الملح وكلوها سوا ، عشان يبقى بينكو عيش وملح .

وابتسم جلال ، وبقى مترددا برهة ، فقال شفيق مشجعا :

__ يللا يا جلال ياللا .

وتناول جلال لقمة خبز غمسها في الملح ، ثم قسمها جزأين ، وغيب جزءا في فمه ومد يده بالجزء الآخر إلى فم أحلام فالتقمته وقد تضرج وجهها بلون الدم ، والتقت عينا شفيق بعيني نبيلة ، فإذا بها تنفجر ضاحكة ، فسددت إليها أمها نظرة زجر قاسية .

وقال حسين وهو يشير بيده إلى الطعام المكدس على المائدة :

_ اتفضلوا .

وقال شفيق وهو يغرف الحساء بالمغرفة :

_ ياما حضرت خطوبات كتير ، وكتب كتاب وأفراح ، ماشفتش حكاية العيش والملح دي ولا الأكل في طبق واحد .

فقال حسين وهو يبتسم:

__اللي يعيش ياما يشوف .

فقال مصطفى وهو يضحك:

_ مهما عاش مش ح يشوف اللي شفته .

والتفت إلى زوجته وقال مداعبا:

ـ الست دي ياما ورتني ، ورتني كتير.

ورمقته زوجته من طرف عينيها وقالت :

ــ يا راجل عيب .

هو انا قلت حاجه! أنا قلت إنك ورتيني كتير ، لكن ما قلتش
 ورتيني إيه ، يمكن ورتيني حاجات حلوه كتير .

وشاع السرور ، وتوجت الابتسامات الشفاه ، وراح جلال وأحلام ، يتناولان طعامهما في طبق واحد ، وتعمد جلال أن تمس يده يد أحلام ، والتقت عيونهما أكثر من مرة في لمحات كانت أفصح من حديث طويل .

وانتهز مراد فرصة انشغال الجميع في الحديث ، فتـرك الشوكــة والسكين وراح يعالج قطعة الدجاج بيده .

وعلى حين فجأة ارتفع بكاء هالة ، فوقف فم أمها عن الحركة ، وقطبت جبينها ، ثم التفتت إلى نبيلة وقالت :

_ هاتی أختك .

ونهضت نبيلة وغادرت المائدة ، وصوت هالة يدوى في المكان، وأراد مصطفى أن يزيل ذلك الحرج البادى على وجه أمها وأبيها فقال : __ عقبال ما نفرح بيك يا شفيق .

فقال شفيق وهو يدس ورك دجاجة في فمه :

_ قريب إن شاء الله .

فقالت له أم جلال:

_ ما كنت بتقول مش ح تتجوز أبدا .

فقال حسين:

ـــ الجواز نص الدين .

فقال شفيق مبتسما:

ــ دا النص الحلو فيه .

وعادت نبيلة تحمل هالة ودفعت بها إلى أمها ، فأجلستها على فخذها ، وراحت هالة تعبث بكل ما تصل إليه يدها ، عبثت بالشوكة مرة ، وبالسكين مرة أخرى ، ثم وضعت كفها فى طبق به ملوخية ، ورفعته ومررته على وجه أمها ، وتحملت الأم مضايقات ابنتها فى صبر ، وإن كان الحنق يكاد يمزق صدرها .

وانتهوا من تناول طعامهم ، فغادروا المائدة وعادوا إلى غرفة الاستقبال إلا مصطفى وحسينا اتجها إلى المكتب .

وأخرج مصطفى من جيبه رزمة أوراق مالية ، ودفع بها إلى حسين ، وهو يقول :

__الشقه بعد أسبوعين ح تكون فاضيه ، اللي تشتروه تقدروا تبعتوه على هناك على طول .

فقال حسين وهو مأخوذ:

__ إن شاء الله .

__ ربنا يتمم بخير .

و لاحظ مصطفى أن حسينا يعانى ذلك القلق الذى يحسه المقدم على مغامرة ، فقال له ليرفه عنه :

داكل شيء قسمه ونصيب ، أنا ربنا رزقني بالست بتاعتي كانت سبب سعدى ، فهمتها و عرفت بركتها فين ، ماكنتش أعمل حاجه إلا لما آخد رأيها فيها ، وإن قالت يمين أنا أعمل شمال ، أعمل عكس رأيها على طول ألاقي الحاجه مشيت وبقت عال .. ده توفيق كبير .. رضا .

وابتسم حسين وقال:

_ إن اتزنقنا في حاجه نبقى ناخد رأيها .

_ خلاص بقى بقينا أهل ، وادى انت عرفت السر .

ونهض مصطفى وقال:

_ بللا نقعد مع الأولاد .

واتجها إلى غرفة الاستقبال ، ودخل مراد إلى الشرفة ينظر ، فرأى عاطفا وسوسن يعبثان في سيارة شفيق ، ويفرغان الهواء من إحدى العجلات ، فأسرع إلى أبيه وقال له هامسا .

- _ عاطف وسوسن فسوا عجلة الأوتومبيل.

فأشار الأب برأسه إلى سامى أن يتبعه ، وخرج من الغرفة ومراد معه ، فإذا بسامى ينهض ويتجه إليهما ، وقال الأب :

___ العفاريت فسوا عجلة الأوتومبيل ، لازم تنفخها بأى طريقه . فقال سامى : _ آخد مفاتيح العربيه من شفيق واشوف عنده منفاخ ، وأنفخها . فقال الأب لسامي :

_ أنا عايزك تنفخها من غير ما يعرفوا .

فقال سامى:

_ ح انفخها ببقى !

وقال مراد :

_ أنا اروح للعجلاتى . وح اخليه يجيب منفاخه وييجى ينفخها . والتفت الأب إلى سامى وقال له :

_ هو انت ما تعرفش تتصرف أبدا ؟

وهرول مراد منصرفا ، وعاد الأب وسامى خلفه شامخا بأنفه ، وما إن لمحته الأم حتى نادت :

... سامي ، تعال .

ودنا منها ، فقالت له هامسة :

_ خد نبيلة وروحوا شيلوا الأطباق والحاجه من على الترابيزه .

والتفت ناحية نبيلة ، فألفاها تتحدث مع شفيق وجلال وتضحك ،

فرآها فرصة سانحة ليعكر صفوها فقال بصوت عال :

ـــ نبيله . تعالى .

والتفتت إليه نبيلة في ضيق وقالت :

_ إيه ، عايز إيه ؟

وأحست الأم بداية العاصفة ، فقالت في حزم :

_ نبيله روحي معاه .

وسار سامي ونبيلة خلفه ، حتى إذا ابتعدا عن الغرفة قليلا ، قالت :

ـــ نعم ؟

فأشار إليها بأصبعه ناحية المائدة ، فقالت له في غيظ :

_ ما تنطق عايز إيه ؟

_ عايزينك تشيلي الأطباق اللي ع الترابيزه .

_وكانت قدوصلا إلى المائدة ، فراح سامي يستعرض ما عليها بنظرة از دراء ثم قال :

ــ أنا عارف هوانم إيه اللي ياكلوا ويسيبوا الترابيزه بالشكل ده!

_ إذا كنت ح تشتغل ، اشتغل من غير ما تتنفس بكلمه أحسن لك .

وراحا يتنقلان بين المائدة والمطبخ ، يحملان الملاعق والسكاكين والشوك والصحاف ، دون أن يتبادلا كلمة . كان سامي يحمل الأشياء وذراعاه مبسوطتان حتى لا تتسخ ثيابه ، بينا تسير نبيلة على أطراف أصابع قدميها ، كأنها ترقص على مسرح .

وبدأت فى جمع الفوط ، ووجدت كوبا موضوعا فوق فوطة ، فجذبت الفوطة بقوة ، فصارت فى يدها بينها ظل الكوب على المنضدة . ورأى سامى ما فعلته ، فأراد أن يقلدها ، جذب فوطة ليخلصها من طبق موضوع فوقها ، فصارت الفوطة فى يده ، ولكن الطبق سقط على الأرض ودوى صوت تكسره ، وصك الصوت أذنى الأم فضمت هالة إليها فى غيظ ، وإن ظلت البسمة تتوج شفتيها .

ولاحظ مصطفى كثرة تلفت حسين صوب الباب ، فقام وقال :

_ نستأذن بقى .. يللا يا جلال .

فقال شفيق:

.... إذا كان على جلال مش عايز يمشي أبدا .

وقال حسين وزوجته:

_ والله ما انتو نازلين دلوقت . بدرى .

واتجه حسين إلى مصطفى وقال له وهو ينظر في البشرفة ، ويرى مراد و « العجلاتي منهمكين في نفخ عجلة السيارة .

_ والله لانت قاعد.

وقال شفيق وهو ينهض:

_ ما تيجو معانا في العربية تشموا هوا .

فقالت زينب وهي تنظر إلى هالة:

ــوالأولاد!

_ ييجوا معانا .

فقالت الأم وهي تبتسم:

_ هو دا معقول . فيه عربيه تاخدنا كلنا إلا إذا كانت أمنيبوس .

واشرأب حسين بعنقه ، ونظر من خلال الشرفة ، فوجد مرادا والرجل منهمكين في نفخ العجلة ، فقال وهو يجلس :

_ والله ما انتوا نازلين دلوقت . اقعدوا شويه .. اقعدوا .. قهوه يا نبيله .

فقال مصطفى:

ـــ والله ما احنا قادرين نشرب حاجه ، نقعد ولا نشربش .

فقال حسين وهو يتنفس في راحة :

_ طب اقعدوا .

و جلسوا ، وأقبلت نبيلة وسامى ، وقال شفيق وهو يحاول أن يقهر نفسه ويرغمها على عدم التطلع إلى نبيلة :

_ طب نيجي بكره ناخدكم ونتفسح شويه .

فقالت زينب:

ـــ كتر خيرك ، وما تتعبشى نفسك ، مش ح نقدر نخرج .

وقال جلال ، دون أن يحيد نظره عن أحلام :

_ ناخذ الأولاد .

وضحك مصطفى وقال:

... ما بلاش لف ودوران وتقولوا إنكم عايزين تفسحوا أحلام .

وأطرقت أحلام في خفر ، وقالت نبيلة في بساطة :

_ ليه ما نتفسحش بكره ، ما فيش ورانا حاجة ؟

وحدجتها أمها بنظرة تأنيب ، وقال لها أبوها :

ــ انتى حاشرة نفسك ليه ، هو حد عزمك ؟

وقال سامي :

ــ زى البصل محشوره فى كل حاجه .

وقال شفيق:

ــ بكره نيجي ناخد أحلام وسامي ونبيله .

وقالت الأم:

... والنبي ما تفتحش على نفسك الفاتحه دى .

وقال سامي :

_ بكره الساعه خمسه تلاقونا جاهزين .

وجاء مراد وفى يديه ووجهه آثار شحم ممزوج بالتراب ، والعرق يتفصد من وجهه، ووقف بعيدا وجعل يشير لأبيه بيديه أن النفخ قد انتهى ، وأنه يريد نقودا للرجل .

وهم أبوه بالذهاب إليه ليعطيه ما يطلب ، ولكن الأم لمحته ، فصاحت :

... درمغت نفسك في إيه كده ، ركبت عجل تاني ؟

فقال مراد وهو ينظر إلى أبيه :

_ هو عارف .. هو اللي قال لي .

_ قال لك تدرمغ نفسك كده!

وكان أبوه قد وصل إليه ، وأعطاه نقودا فانصرف مهرولا ، ورأت الأم ذلك فقالت لزوجها في تأنيب :

ـــ بقى يوسخ نفسه وتديه فلوس ! أنا مش فاهمه .

وأحست أن الأنظار اتجهت إليها ، فكظمت غيظها وقالت :

.... أهلا وسهلا . شرفتونا .

وقال مصطفى وهو ينهض:

__ نستأذن بقى .

وقال حسين :

_ خليكو على راحتكو .

وكان ذلك إيذانا بالانصراف ، فنهض الجميع وراحوا يتصافحون ، وقد اختلطت أصواتهم ، وظل جلال يهمس بحديثه لأحلام ، وكان آخر من انصرف :

وخف حسين وزوجه وسامي وأحلام ونبيلة ومراد الذي عاد بعد أن أعطى الرجل نقوده إلى الشرفة يرقبون ضيوفهم وهم ينصرفون .

أسرع شفيق يفتح أبواب السيارة ، وتقدم مصطفى وزوجته فى تؤدة ، بينا حمل جلال عاطفا بين يديه وقال له :

_ عملت إيه بالقرش ؟

_ اشتریت طباشیر .

__ في*ن* هو ؟

_ خلص . كتبت بيه ع الأتومبيل .

ونظر جلال إلى السيارة فإذا بها قد غطيت بخطوط ودوائر بيضاء ، وأن بابها كان أشبه بسبورة كتب عليها : زرع . درس . وزن . فقد شاركت سوسن أخاها في استهلاك الطباشير .

ووضع جلال عاطفا على الأرض ، وضربه مداعبا على مؤخرته ، وقال له :

ــ اطلع على فوق .

ورفع بصره ، فانجذب إلى أحلام ، كأنما لم يكن فى الشرفة غيرها ، فابتسم لها ولوح بيده مودعا ، ثم سار إلى السيارة وركب إلى جوار شفيق .

وغابت السيارة عن العيون ، فقالت الأم :

_ ياللا . كلكو ع المطبخ .

وقالت نبيلة:

_ يا ماما ورايا مذاكرة .

__ اشمعنى المذاكره حليت دلوقت ؟ قدامى ع المطبخ اللي سايبينه لايص وواقف على رجل .

وانسلت أحلام ونبيلة وسامى ومراد ، وبقى الزوجان وحدهما فى الغرفة ، فالتفتت الزوجة إلى زوجها وقالت :

_ هيه . عملت إيه مع مصطفى ؟.

_ دفع لي المهر .

_ وقلت له إن النجف والمشمع وحاجة المطبخ عليه هو انه يجيبها ؟

ـــ ما قلتلوش .

_ ما قلتلوش ليه ؟

_ ما جتش فرصه .

ـــ ما جاتش فرصه واللا انت انكسفت ؟

__ والله أنا مش فاهم الكلام ده . اشمعنى العريس يجيب النجف والمشمع وحاجة المطبخ ؟.

(أم العروسة)

- _ الدنيا كلها ماشيه على كده .
- _ ما شفتش حد ماشي على كده إلا انتو .
- _ قصدك تقول إننا خليناك تجيب حاجات ما حدش يجيبها ؟!

كل العرسان بتجيب الحاجات دى ، وان ما كنتش مصدقني اسأل .

- _ ولا بسأل ولا حاجه .
- _ بلاش ، أصل فلوسك كتير ، قال على رأى المثل .
 - ـــ ما تقولي المثل إيه .
 - _ أنا عارفه ؟!

وذهبت إلى المطبخ ، وانطلق خلفها ليعاون أولاده ، وهو يغمغم :

_ قال على رأى المثل: « عقلك في راسك ، اعرف خلاصك » .

الفصل التاسع

كانت الردهة خالية ، ولكن لم يكن للصمت فيها مكان ، فالأصوات منبعثة من غرفة الوالدين ، وغرفة الأولاد وغرفة البنات ، كان الجميع يتكلمون وما كان أحد يصغى إلى ما يقال ..

وقالت الأم :

بس یا مراد ، انزل یا عاطف من ع الکرسی ، وانتی یا سوسن ابعدی من هنا بلاش وجع دماغ .. أوه یا سامی بلاش مناهده بقی .. ما كفایه یا نبیله كلام .

فكانت أشبه بمذيع في مباراة كرة حامية .

وخرجت أحلام من غرفتها ، ترتدى ثوبا ورديا ، ضاق عند خصرها غاية الضيق حتى ليحار المرء إذا ما فكر كيف مر ذلك الثوب من صدرها الممتاع عند ارتدائه ، واتسع غاية السعة عند طرفه ، وزينت جيدها وأذنيها وصدرها بعقد وأقراط و « بروش » من طراز واحد ، وكان شعرها ينطق ببراعة الحلاق .

ومرت في الردهة ، والأصوات تتناثر هنا وهناك ، فلم تحفل بها ، كانت مشغولة بنفسها تعيش للحظة التي سيقدم فيها جلال ليأخذها لأول نزهة بكل حواسها ، والتفتت إلى الساعة المعلقة في الردهة ، فإذا بها الخامسة إلا خمس دقائق ، فقالت :

_ ياللا يا نبيلة زمانهم جايين .

فقالت نبيلة وهي تديم النظر في وجهها في المرآة :

_ أنا خلاص لبست .

وقال سامي وهو يحاول أن ينيم شعره الذي كان أشبه بعرف الديك :

ـــ وانا جاي اهه .

ودنا مراد من أبيه وقال في غضب :

_ واشمعني سامي اللي يروح معاهم ؟

فقالت له الأم:

ـــ المرة الجايه تروح معاهم .

وقال سامي في غطرسة :

_ حتى انت ليك نفس ، يا شيخ روح طلع الحبر من صوابعك قبله . وقال مراد في عناد :

_ لازم اتفسح النهارده . ماليش دعوه .

ودنت سوسن من أمها وقالت:

_ عايزين نتفسح _ اشمعني هم يخرجوا ؟

وأسرع عاطف إلى أبيه وقال له :

ــآه يا بابا نتفسح ، والنبي نتفسح .

ورق قلب الأب لأولاده ، فقال لهم :

_ طب البسوا وانا أفسحكم .

فقال سامي وهو في طريقه إلى غرفة أبيه :

ــ يا بابا تاخد مراد معاك ازاى وشعره طويل كده .. لما يحلقه قبله .

فقال مراد في تحد:

_ وانت مالك ؟

_ ما هو يا ماما ..

فقاطعته أمه:

_ بس مالكش دعوه بيه . روح انت مطرح ما انت رايح .

وقالت سوسن وهي تتمسح بأبيها:

_ هم ح يركبوا أتومبيل ..

فقال لها الأب:

_ ح اركبكم أتومبيل .

وقال عاطف في فرح:

ــ وانا اللي اسوقه .

فقال لأب وهو يعبث في شعره في حنان :

_ وانت اللي تسوقه .. ياللا روحوا البسوا .

وخرجوا من غرفة أبيهم فرحين ، مراد يخلع جاكتـة بيجامتـه ، وسوسن تحاول أن تخلع ثوبها وهي في طريقها إلى غرفتها ، وعاطف

يصيح:

_ لبسوني .. لبسوني ..

وقالت أمه وهي تضع هالة بجوار أبيها:

_ طيب . أنا جايه البسك .

والتفت الأب إلى هالة وقال مداعبا:

ــ وانتى .. مش عايزه تتفسحى ؟

فقالت الأم وهي تهم بمغادرة الغرفة وعاطف في يدها :

ــ يا ريت تاخدها معاك وتريحني .

ونظر الأب إلى هالة ، فإذا بعاطفة الحنان تتحرك فى جوفه ، وإذا بأساريره تنبسط ، وإذا به يمد يديه ويحملها ، ويضمها إلى صدره ويقبلها .

وبلغ صوت نداء سيارة آذان الجميع ، فحدث في الشقة هـرج شديد ، راحت أحلام تهرول صوب باب الشقة في فرح وفي أثرها نبيلة وسامى ، وقد أخذ سامى يصيح :

ــ أيوه . نازلين .

وقالت سوسن في غضب:

ـــ اشمعنی هم ينزلوا قبله .

وجرى عاطف إلى والده حافى القدمين ، وجذبه من بنطلونه الذي كان يرتديه ، وقال له :

ــ ياللا احنا كمان ننزل بقى .

فقال له أبوه وهو يدفعه في رفق:

- روح كمل لبسك ، وتعال ننزل .

وخف مراد إلى الشرفة يرقب إخوته .

تقدمت أحلام إلى السيارة فى دلال ، وإن كانت المشاعر الرقيقة المنبعثة فى جوفها انعكست على مرآة وجهها ، وضيقت من خطوها ، ولو طاوعت نفسها وأطلقتها على سجيتها لهرولت وهمى تنادى : « حلال .. جلال » .

وتقدمت نبيلة فى رشاقة كأنما تسير على أطراف أصابعها ، وقد شمخت برأسها فى كبرياء ولم تغير صفحة وجهها مسحة من كبر ، وسار سامى وهو ينقل عينيه بين أحلام و نبيلة والسيارة . كان المراقب الذى يخشى أن تشرد منه شاردة ، أو يأتى أحد المراقبين بحركة فى غفلة منه ! وقفز شفيق من السيارة فى رشاقة وفتح بابها ، فحيته أحلام بإيماء من رأسها ، ومدت بصرها فألفت جلالا جالسا خلف عجلة القيادة ، فصعدت لتشاركه فى المقعد الأمامى وهى تقول فى نبرات مشحونة بالعاطفة المشبوبة :

نــ مساء الخير .

فقال جلال مغازلا:

_ مساء النور ، مساء الجمال .

وقالت نبيلة وهي ترفع يدها إلى رأسها ، فقد نسيت كبرياءها المصطنعة ، وعادت إلى طبعها :

ــ السلام عليكم .

فقال شفيق و جلال:

_ عليكم السلام .. أهلا .

ومدت يدها وصافحت شفيقا ، ثم صعدت إلى المقعد الخلفي ، وهي تمد يدها إلى جلال لتصافحه .

وهز سامى رأسه محييا ، وغمغم بعض كلمات لم يفهم منها شيء ، ولكنها أولت على أنها تحية . ووقف برهة مترددا يفكر . وإذا به لأول مرة في حياته يتمنى لو أن أحد إخوته قد جاء معهم ، حتى يجلس بين أحلام وجلال ، بينا يجلس هو بين نبيلة وشفيق = حتى يطمئن إلى عدم تماس أجسام البنات بأجسام الشباب .

وفى مثل لمح البصر تذكر أن هناك خطبة بين أحلام وجلال ، وأنه لا غضاضة من تركهما جالسين فى مقعد واحد دون عازل ، ما داما تحت بصره وسمعه ، فصعد وجلس إلى جوار نبيلة ، وقعد شفيق إلى جواره وأغلق باب السيارة خلفه .

وانطلقت السيارة ، وقال جلال وهو ينظر إلى أحلام :

ـــ تحبوا تروحوا فين ؟

قالت نبيلة في نشوة:

... نروح الهرم ، أنا ما رحتوش من أيام ما كنت في ابتدائى ، لكن لسه فاكره المنظر الجميل اللي شفته هناك ساعة الغروب ، منظر بديع ، كانت الشمس وهي نازله زى ..

وقال سامي مقاطعا:

_ إيش ودانا لهناك ؟

فقال شفيق وهو يديم النظر إلى نبيلة ، دون أن يأبه لعيني سامي

المحملقتين :

_ فكره جميله ، أنا موافق ع الهرم .

وقال جلال لأحلام :

ـــ وانتى ، رأيك إيه ؟

فقالت وهي تغوص في مقعدها:

_ مطرح ما تحبوا .

فقال شفيق:

ــ يعنى موافقه . خلاص نبقى أغلبية . ع الهرم .

وصمت سامي على مضض ، وإن راح يمضغ غيظه ، وقال شفيق لنسلة :

_ كملى . كنتى بتقولى : كانت الشمس وهي نازله زى .. زى إيه ؟

فقالت وهي تضحك :

_ والله ما انا فاكره ، أنا لما حد يقاطعني وانا باتكلم يطير كل اللي في . يخي .

فقال سامي في شماتة:

_ الحمد الله إنه طار ، وإلا كنا ح نفضل نسمع للصبح .

فقالت له في تهديد:

_ سامى ، لم لسانك أحسن لك .

وأحس جلال أن الجو بدأ يتكهرب ، وأن نقاش نبيلة وسامــى

سيخرجه من الجو الشاعرى الذى بدأ يستشعره ، وهو قابض على عجلة القيادة وأحلام إلى جواره ، والنيل ينساب رقراقا كمرآة سحرية تعكس أفانين من الجمال ، تفجر ينابيع الحب والهيام ، فضغط على زر راديو السيارة فإذا بأنغام عذبة تنبعث حنونة ، فتهدئ الأعصاب التي بدأت تثور ، وتجعل الجميع يسترخون حالمين في مقاعدهم .

ودنت أحلام من جلال ، ومالت برأسها نحوه ، ثم أسندته على مسند المقعد ، وراح شفيق ونبيلة يتبادلان النظرات ، ثم يطبقان الأجفان حتى لا تفر رؤى الأماني العذاب ، التي كانت الموسيقي تفتق مواهبها !

ونظر جلال إلى أحلام ، فألفاها ترمقه بعينين والهتين ، فيهما حب وفيها رغبة وفيهما نداء ، فراح يديم إليها النظر ، وتخاطبت العيون ، وانبثقت الأحاسيس ، وولدت اللحظات المسحورة التي تنتشى في ذاكرة الحبين ، وتختزن في سويداء القلوب ، لتعيش الأفئدة عليها في السنين العجاف .

وفقد جلال سيطرته على حواسه ، كان في شبه غيبوبة ، استرخت قبضته على عجلة القيادة فإذا بالسيارة تنحرف ، وتكاد ترتطم بشجرة ضخمة من الأشجار المغروسة على جانبي الطريق .

وصاح سامي في فزع:

ــ حاسب ح نروح فی داهیة .

وأفاق جلال من حلمه ، وفي مثل لمح البصر سيطر على السيارة ، وأبعدها عن الخطر ، فأحدث احتكاك العجل بالأرض صوتا غطى على

صوت الموسيقي ، ولكن سرعان ما تلاشي ، وسرت مرة أخرى الألحان الحالمة .

وتأهب من في السيارة ليستأنفوا شرودهم اللذيذ ، وإذا بصوت سامي يعكر صفاءهم :

_ والنبي تدور لنا محطة غير دي .

ومد جلال يده إلى الأزرار ، والتفت سامي إلى نبيلة وقال :

_ شورتك كانت ج تودينا في داهية ..كان لازم الهرم ؟! حبكت ! فقال شفيق :

__ حصل خير .. مين عارف كان ح يحصل إيه لو كنا رحنا في حته تانيه .

وأرضى نبيلة انبراء شفيق لتأييدها والدفاع عنها ، فمنحته بسمة اعترافا منها بجميله .

وانطلقت السيارة حتى إذا لاحت الأهرام في الأفق ، قالت نبيلة في انشراح :

ـــ الأهرام أهيه .. مش عارفة أنا فرحانه كده ليه ، متهيأ لى إنى المجعت عيله صغيره .. عايزه اتنطط واجرى ، تعرفوا لو توافقونى على عقلى ، تقفوا هنا وانزل أجرى .. أجرى لغاية ما اوصل الهرم .

فقالت أحلام ، وهي تبتسم :

_ تجرى من هنا لهناك ؟. كان انقطع قلبك .

وملأ شفيق رئتيه بالهواء وقال :

... حاجة لطيفة . تيجو نوقف العربيه ونجرى شويه .

فقال له جلال:

_ اعقل .

فقال شفيق:

_ والله نفسي أجرى . بقى لى زمان .

_ طب استنى لما نوصل فوق .

ونظر شفيق إلى نبيلة ، وقال دون أن يبعد عينيه عنها :

__ سامى . تسابقنى ؟

فقال سامي في غرور:

__ ح اسبقك . ما فيش كلام .

فقال شفيق:

_ الميه تكدب الغطاس.

وقالت نبيلة:

_ وانا ح اخش معاكم في السباق ده .

فقال لها سامي:

ــ نفسى تبطلي غلبة ، ولا تحشريش نفسك في اللي مالكيش فيه .

وصعدت السيارة المنحدر ، ووقفت عند سفح الهرم الأكبر ، وفتح شفيق الباب وهبط يتبعه سامى ثم نبيلة ، بينا ظل جلال وأحلام فى مكانهما يصغيان إلى الموسيقى .

ودارت نبيلة دورة على أطراف أصابع قدميها ، وقالت :

_ احنا مش عايشين . آدى الحياة .

فقال لها سامي وهو يهز رأسه آسفا :

_ نفسك تسيبي على طول.

_ نفسي أبقى حره . . طليقه . . زى النسم .

فقال لها سامي:

_ ح نمثل .. شياطين الفن ح تتحرك .

فدنا منه شفيق وقال له:

__ انت في سنه إيه ؟

__ أولى ثانوى .

فقال شفيق في استنكار:

_ لسه أولى ثانوى .

فقالت نبيله وهي تضحك:

ـــ ما هو أولى ثانوي دلوقت .. يعني تالته ثانوي زمان .

_ دى حاجه تلخبط . ما افهمش حاجة في النظام الجديد ده أبدا

لدرجة إنى فكرت مره أعمل جدول معادلات .. وانتي في سنه إيه ؟

فقالت في فخر:

_ فی تالته ثانوی .

ـــ ودي تساوي إيه في جدول المعادلات ؟

ــــ توجيهي .

ــ وناويه بعد ما تخلصي تقعدي في البيت زي أحلام ؟

فقالت وهي تشب على أصابع قدمها:

_ لأ .. ح اروح الجامعه ، وح ادخل كلية الطب .

. فقال لها سامي:

ــ دا بعدك .

_ بكره تشوف .

_ بكره تشوفي انت .

وقال شفيق :

_ ياللا مش ح نتسابق ؟

وراح يخلع جاكتته ، ففعل سامي مثله ، ومد شفيق إليه يده بالجاكتة وقال :

ــ ولله لو تسمح تودي الجاكتة دي معاك في العربيه .

وتناول سامى الجاكتة ، وذهب إلى السيارة ، وأحست أحلام دنوه فرفعت رأسها عن صدر جلال، والتفتت إليه، فإذا بجلال يلتفت ويقول:

_ ناويين على إيه ؟

- ح نتسابق .

واقترب شفيق من نبيلة وقال لها:

- وليه ما تقعديش في البيت زي أختك ؟

- أقعد في البيت أعمل إيه ؟

ــ تعملي زيها .

ـــ أملا قلل واغسل وإطبخ وامسح . لا .. دانا ح ابقى دكتوره ..

دكتوره مشهوره .. أنا شايفه اليافطه دلوقت على العياده .. « الدكتورة نبيلة حسين » .

ــ بقیتی دکتوره مشهوره . وبعدین ؟

وقالت مفكرة:.

__ وبعدين ؟ وبعدين ؟ مش عارفه .. ما فكرتش .. كان أملى إنى أبقى دكتوره .

وابتسم شفيق ، ووصل إليهما سامي ، وقال :

_ ياللا . اقفوا جنبي هنا ، شايفين الحجر الكبير اللي هناك ده ؟ ح نجري لعنده ونرجع للعربيه .

واصطفوا صفا واحدا ، والتفت سامي إلى السيارة وقال :

_ أحلام . خدى بالك . ح نبتدى .

وقالت أحلام دون أن تلتفت :

__ حاضر .

واستأنف جلال حديثه وأحلام ترنو إليه في وله :

__ تعرفى ، نفسى اكون أنا وانتى لوحدنا فى جزيره ، ما شفش غيرك ولا تشوفيش غيرى ، وما تسمعيش غيرى .

فقالت وهي تبتسم في إغراء:

_ وإن زهقت ؟

_ مش معقول أزهق وانتي جانبي .

وازدادت قربا منه ، ورفعت بصرها إليه ، فإذا به يهوى عليها ويقبلها وهو يضمها في قوة . وارتفع الصياح ، فالتفت جلال وأحلام ، فوجدا أن سامي وشفيق في عودتهما بينا لم تصل نبيلة إلى الحجر .

وقفت نبيلة ، وتلفت شفيق نحوها وخفف من سرعته ، وراح سامي يعدو بأقصى سرعته مزهوا بنصره .

ووقف شفيق ، وانتظر حتى وافته نبيلة وسارت إلى جواره تلتفظ أنفاسها ، وقال لها :

ــ تعبتى ؟

__ حاسه إن قلبي ح ينط من بقى ، وإن رجليه مش قادره تشيلنى . ومد لها ذراعه وقال:

_ طب اسندى على .

وترددت ، وإن كانت تلهث ، وتحس قواها تخور ، وفطن إلى ترددها فمد لها يده ، فإذا بها تضع يدها في يده ، وتسير معه .

وصاح سامي في فرح وهو مستند إلى السيارة :

ـــ لما انتو مش قد الجرى ما تبقوش تتغالبوا .

وأدار وجهه ناحية الغرب ، فإذا بالشمس في الغروب . فهتف : __ ما تمدى يا نبيله شويه عشان تشوفي المنظر الجميل اللي عجبك قبل

_ ما بدی یا نبیله سویه عسان نسوی استو اجمین ای حبیت جر الشمس ما تغیب .

وقال لجلال وأحلام:

_ ح تفضلوا لابدين في العربيه كده . مش ح تنزلوا شويه ؟ فقال جلال وهو يفتح باب السيارة :

_ آدى احنا نازلين .

ووقف الجميع برهة صامتين ، وهم يرصدون الشمس وهي تغوص في الأفق البعيد .

وركبوا السيارة وقد خيم الظلام على المكان ، وقفلوا عائدين وقد سيطر عليهم السكون ، صمت الراديو وركن سامي إلى الهدوء ، حتى نبيلة لم تنبس بكلمة ، كانوا جميعا يجترون الحوادث التي انزلقت من لحظات من دنيا الواقع إلى عالم الذكريات ، وقد راحت يد الخيال تنمقها فتنة وجمالا .

ولاح في وجه جلال وجد وهيام ، فمد يده ووضعها فوق يـد أحلام ، ليربط ما يدور برأسه بواقعه الذي يعيش فيه .

وبلغت السيارة الدار ، فأفاق الجميع من أحلامهم ، وفتح الباب الخلفي وهبط شفيق وسامي ونبيلة ، ثم فتح الباب الأمامي وهبطت أحلام وهي ترنو إلى جلال وتقول :

_ مش ح تطلع شویه ؟

ــ معلهش المره دى .. بقينا ليل .. المره الجايه .

ومدت يدها وصافحته ، ثم صافحت شفيقا ، وانطلقت مرحة ، وقالت نبيلة :

_ السلام عليكم .

ولكنها لم تنصرف ، بل مدت يدها إلى شفيق تصافحه ، وأحست يده تضغط على يدها ، فخفق قلبها ، ونظرت إليه فإذا في عينيه نور يأتلق ، فاستشعرت كأن تيارا كهربيا سرى فى روحها فزلزل كيانها .
وتسمرت لحظة ، وقد اسنبد بها اضطراب لذيذ ، وأحست فى لمحة أنها تغيرت ، لم تعدطفلة ، فقد راحت تمور فى أغوارها مشاعر ناضجة ! ودارت على عقبيها ، وسارت فى تؤدة ، كانت تستشعر كأنما صارت طيفا ، ومع ذلك لم تنطلق فى خطوات راقصة على أصابع قدميها كعادتها ، بل انسابت فى رزانة ، تطأ الأرض بكل قدمها .

ووقف سامي يودع جلالا وشفيقا ، و لم يتحرك إلا بعد أن ابتعدت السيارة وابتلعها الظلام .

وصعدا إلى الشقة وإذا بمراد وسوسن وعاطف يخفون إليهم ويلتقون بهم ، ويسألونهم في صياح :

ـــ رحتم فين ؟. رحتم فين ؟

فقال سامي في فخر:

ـــ الهرم .

وقالت سوسن في حزن :

ــ بابا ضحك علينا ، وركبنا تاكسي شويه صغيره ورجعنا .

وقال مراد وهو يحاول أن يعترض طريقهم ليؤخر وصولهم إلى غرفهم:

ــ تعرفوا عداد التاكسي ضرب كام ؟ تمانيه صاغ .

و دخلت سوسن على أبيها وقالت :

ـــ أنا عايزه أروح الهرم .

وقال الأب في أسى ، فقد جرح نفسه سخرية أولاده من النزهة التي حاول أن يدخل بها السرور على قلوبهم ، كان يأمل أن يرضوا فإذا بها تخلف في نفوسهم مرارة :

_ حاضر .

وأقبل عاطف وقال:

ـــ وانا يا بابا .

وعبث بشعره وقال:

_ وانت یا حبیبی .

ودخل مراد وقال :

ـــآلمره الجايه أنا اللي ح اخرج معاهم ، اشمعني سامي يعني اللي يخرج معاهم كل مره .

فقالت الأم:

_ هم خرجوا إلا المره دى ؟

فقال مراد وهو يعبث في كرفاتة أبيه المعلقة :

__ ما انا عارفه لزقه ، ما يحبش إلا نفسه و سامي أناني خطف الفسحه من قدامي .

فصاحت الأم فيهم جميعا:

_ إيه لزمة الخوته دى دلوقت ؟. ياللا امشى بره انت وهو .

فقال مراد معترضًا:

_ إيه . احنا عملنا حاجه .

وهمت الأم وتحركت في مقعدها وقالت :

_ والله إن ما خرجتو من هنا لضرباكم بعصاية الغليه .

وفر الأولاد من الغرفة كأرانب مذعورة ، فالتفت الأب إلى الأم وقال :

__ ليه بس كده ؟

فقالت الأم:

... دلعهم يا خويا عشان يحبوك . أنا ما اعرفش ادلع . أنا أربى .. التربيه ما تنقص عمر .. قال على رأى المثل .

فقال الزوج مداعبا:

_ طب المثل بيقول إيه ؟

_ أنا عارفه ؟

ــ المثل بيقول: ربى ابنك واحسن أدبه ، التربيه ما تاخد أجله .

ــ يا اخويا الأمثال كتير ، الواحده ح تفتكر إيه واللا إيه .

__ أمال كل ما تتكلمي تقولي (على رأى المثل) ليه ؟ دا اللي يسمعك يحسبك قاموس في الأمثال .

ـــ يوه بقى .

وخلعت أحلام ونبيلة ثيابهما ، وارتدتا ثياب النوم ، وأسرعت كل منهما إلى سريرها لتعيش وحدها مع خيالها ، وجذبت نبيلة الغطاء فوقها ، وتململت في رقدتها وقد رفت على شفتيها بسمة حالمة .

وأحست أن الضوء المنبعث من الردهــة الخارجيــة يشغلهــا عـــن



سامحيني،يدا أحلام ، ما كنتش فاهمه إنى بضايقك لما كنت بانور الأباجوره .. النهارد بس فهمت .

الاستغراق في أوهامها ، فقامت تطفئ النور ، ومرت وهي في طريقها إلى الزر الكهربي بعاطف وهو غارق في نومه على الأريكة ، فلم تفكر في حمله إلى سريره ، وضغطت على الزر ، ثم عادت إلى سريرها مسرعة ، وما إن اندست في فراشها حتى التفتت إلى أحلام وقالت :

ـــ سامحيني يا أحلام ، ما كنتش فاهمه إنى بضايقك لما كنت بانور الأباجوره .. النهارده بس فهمت .

فقالت أحلام في تكاسل:

_ فهمتي إيه ؟

فقالت نبيلة وهي تنام على ظهرها وتضع كفيها تحت رأسها ، وتشرد ببصرها :

ــ أنا عرفه ا فهمت كتير.

وهامتا في عالم وردى من التصورات ، ورفت على شفتيهما ابتسامات رضا وأمان وأمل .

الفصل العاشر

وقف حسين أمام باب الشقة وفى وجهه سهوم ، ومد يده إلى زر الجرس وضغطه ، ثم أرخى ذراعه وراح يعبث فى أصابعه . كانت حركاته توحى بالقلق . وفتح الباب ودخل ، وما إن خطا خطوتين ، حتى دوت زغرودة طويلة ممدودة ، وبدرت حفنة من « الملبس » على الأرض ، فانقض الأولاد جميعا يلتقطون « الملبس » المنثور .

ونظر حسين إلى زوجته في تساؤل ، فقالت :

... دى الخياطه جابت فساتين أحلام .

ودلف حسين إلى غرفته ، وزوجته خلفه ، وقبل أن يستقر على مقعده ، قالت له زوجه :

_ الخياطه طالبه خمسين جنيه .

فقال وقد اتسعت عيناه:

ـــ خمسين جنيه ! دا كتير .. كتير قوى .

ـــ مش كتير . يا دوبك . مش فصلت أربع فساتين سهره كوكتيل وخمسه تواليت وتمانيه اسبور وست جونلات وست بلوزات نايلون وجيبون تواليت وجيبون اسبور ؟

وأحس حسين رأسه يدور ، وقام إلى الصوان وفتحه وأخرج منه

خمسين جنيها ، وقال لزوجته وهو يمد لها يده بالأوراق المالية :

_ خلاص . ما بقاش معانا حاجه ، المهر اللي خدناه ، والقرشين اللي كنا شايلينهم طاروا .

_ ياما قلت لك إوعى لنفسك ، ياما قلت لك طالع لنا بنات .

__ يعنى كنا حا نعمل إيه ؟ ما ناكلش ! كل اللي كان بيجينا كنا بناكل بيه .

_ برضه لو كنا وعينا لنفسنا ما كناش احتجنا لحد دلوقت . اللي حصل .

وخرجت زينب ، وبقى حسين وحده فى الغرفة ، فالتفت إلى المرآة وقال لصورته فيها :

ــ دايما انت السبب .. إنت اللي بتبعزق الفلوس .. إنت اللي ما وعتش لنفسك ، إنت اللي بتشترى كل شهر شنطه وجزمه وفستان عشان مودة اللي اشتريتهم الشهر اللي فات اتغيرت . معلهش . لك رب اسمه الكريم .

ودست الخياطة الأوراق المالية في حافظتها ، وقبلت أحلام ، ثم ربتت على خد نبيلة وقالت :

_ عقبالك .. بس قريب إن شاء الله .

ومست أمنيتها أذني حسين فنظر إلى نفسه في المرآة في ذعر ، وقد فغر فاه دهشة .

وأسرعت نبيلة إلى أبيها وقالت :

... بابا أنا عايزه فستان أبيض أنزل بيه مع أحلام .

فجرى سامي إليها حتى لا تفوته الفرصة وقال:

_ غرنا ! ما تشوفش حاجه إلا لما تجيب زيها .

فالتفتت إليه وقالت:

_ وانت مالك ؟

فقال لها سامي : .

_ مش تخلی عندك نظر .

وقالت وهي تنصرف:

_ ح اجيب فستان غصب عنك .

وأخرجت له لسانها فلم يأبه بها ، لأنه أراد أن ينتهز الفرصة لنفسه ، فقال لأسه :

ــ بابا ، أنا عايز بدله كحلى وقميص أبيض وجزمه لميع .

وجاءت الأم ، وسوسن تتمسح بها ، ولما رأت أباها قالت :

_ عايزه جزمه بيضه بكعب عالى . اشمعني أحلام ؟

فصاح مراد وهو مقبل:

_ إيه الطمع ده ؟، ما عندك جزمه سوده جديده . أنا اللي ما عنديش حاجه أبدا ، أنا عايز بدله بينطلون طويل .

فقال سامي :

_ انت تلبس بنطلون طویل!

__ وانت مالك ؟

وصاحت الأم فيهم :

ــ ابعدوا دلوقت خللوا بابا يقلع ويستريح . ياللا بره .

وانسحبوا من الغرفة ، وبدأ الأب يخلع ثيابه ، ومدت الزوجة يدها وتناولت ثوبا صغيرا من سرير هالة ، ونشرته بين يديها وقالت في هيام :

_ شوف الفستان اللي خيطته الخياطه لهاله .. مش طعم والنبي !

وخلع قميصه ، فبدت الفائلة ممزقة ، فقالت له الزوجة في إنكار :

ــ بقى تصرف الصرف ده وتستخسر في نفسك فانلتين ؟

ـــ والنبى تسيبينى فى حالى . أنا مش عايز حاجه ، نفسى بس أسد بق البير المفتوح ده .

ــ كله ينتهي .

وأطرق صامتا ، وجلس يخلع حذاءه ، وبان فى وجهه الهم ، وساد الصمت برهة ، وزوجه ترمقه فى قلق ، وأرادت أن تخرجه من صمته ، فقالت له :

_ أحلام عايزه أربع تطقم نايلون .

فقال في إنكار:

ـــ أحلام تلبس نايلون ؟.

ـــ وما تلبسش نايلون ليه ؟

ــ هو النايلون بيغطي حاجه . دا فضيحه .

وأرادت أن تداعبه لترفه عنه ، فقالت له :

ــ وانت إيش عرفك ، شفت النايلون على مين ، قول لي ؟

- _ شفته في الفتارين .
 - ـــ ينا راجل !
- _ ما تشوفى حاجه غير النايلون ده .
- _ ح نیجی ع الآخر ونکسر بخاطرها ، نجیب لها الأربع تطقم وخلاص ، واهی ح تلبسهم فی أودتها .

فقال وقد شرد ببصره:

- __ ع الآخر ؟ مين اللي قال ع الآخر . قدامنا كتير ، بتاع الموبيليا عايز فلوس ، وأنا خلاص عايز فلوس ، وأنا خلاص ما بقاش معايا فلوس .
 - _ وح تعمل إيه ؟
 - ــ عملت وخلاض . طلبت استبدال جزء م المعاش .
 - _ خسارة !
- ـــ لا خساره ولا حاجه ، لو طلت استبدال المعاش كله كنت استبدلته ، مش أحسن ما الحكومة تورث فيه ؟

فقالت الزوجة في فزع:

- ــ ما وعيت .
- __ ح توعى ، ودى فيها كلام ح اموت يوم ، وح تورث الحكومة فيه .
 - __ بعد الشر .
 - وشرد ببصره وقال:

__ أنا مش فاهم الحكومه تورِث ليه ، لهي أمي و ابويا ولا بنتي ولا ابني ولا ابني ولا انا مسئول عنها .

وتمدد في السرير ، ونظر إلى حيث ترقد هالة ، ثم التفت إلى زوجه التي تناولت حذاءه ؛ وراحت تضعه في مكانه ، وقال لها :

ـ قولي لي يا زينب لو مت تعملي إيه ؟

فقالت له في ضيق:

ـــ أوه . والنبي تسيب السيره دي .

ــوليه نهرب م اللي ح يحصل ؟ ما نفكر سوا في اللي تعمليه لو مت .

__ يمكن أموت قبلك .

ـــ ونفكر في اللي نعمله لو متى .

_ تفتکری کده ؟

_ ما فيش كلام . يعنى انت أحسن من مين ؟

ــ طب لو مت قبلك تعملي إيه ؟

__أشوف شقه على قدى ، وادبر عيشتى أنا والأو لاد على قد القرشين اللي يطلعوا لى .

_ يعنى من مصلحتك ومصلحة الأولاد إني أموت قبلك .

ــــ أوه . والنبى تفض السيره دى . أنا عارفه النهارده مـــالك ، مسكت الحكايه دى واستقلعت ليه ؟ وتركته وغادرت الغرفة ، وإذا بسوسن تقبل وفى يدها ورقـة ، ودفعت بها إلى أبيها وقالت :

_ بابا عايزينك في المدرسه تحضر مجلس الآباء .

فقال وهو شارد:

__ حاضر .

وأسرعت نبيلة إليه وقالت :

__ اشمعنى ح تحضر مجلس الآباء في مدرسة سوسن ، وما حضرتش المجلس في مدرستي ؟

وخف سامي إليه وقال:

_ مجلس الآباء بتاعنا بكره ، ضرورى تحضره .

وصاح مراد:

_ كل أصحابي أبهاتهم حضروا مجلس الآباء .

وأقبلت الأم على صياحهم ، وقالت لهم :

_ هو ما حدش يعرف يستريح شويه في البيت ده! بزه .

وانسلوا من الغرفة ، وقال الأب :

_ بس الواحد ح يروح هنا واللا هنا واللا هنا . ح يجيب الوقت منين ؟! يعنى ما يجيناش بدل الكلام ده عضوية مجلس إدارة شركه .. تحل أزمتنا ؟

__ أنا عارفه عرسان اليومين دول إيه ؟ الواحد منهم يدفع المهر ويسلت إيده ، لا نفقه ولا نشان ، فاكر الهدايا الحلوه اللي كنت بتبعتها

لى فى المواسم! عروسة المولد اللى قد كده! والحلاوة الحمصية والسمسميه ، واللا السمك اللى كان يملا طشوت .. والنشان اللى بعتولى .. الفستان القصب والجزمه القصب ، والشرابات الحرير والصابون الممسك ، والشباشب اللى قلبك يحبها . تصدق إن الهدايا اللى بعتها لى فرحتنى أكتر من كل الحاجات اللى جابوها لى ؟

ــ دى بقت موضه قديمه .

_ موضه قديمة ! والله كانت تشرح القلب ، ده فقر اللي بيعملوه اليومين دول .

_ تعرفي أنا كل ما اشوف سامي ومراد وعاطف بتهدا ناري .

_ ليه ؟

۔۔ مسیرهم ح یتجوزوا یوم ، وادفع ُلهم المهر وبس واسلت إیدی أنا کان ، واسیب غیری یکع ، واخد بتاری .

وسمع ارتطام حذاء صغير بالباب ، فقالت الأم :

_ عاطف جه ، كان فين غطسان من بدرى ؟

وأسرعت تفتح له الباب ، وبدأت هالة تبكى ، فنهض حسين وحملها في حنان ، وقال لها وهو يرقصها بين يديه :

__ تعرفى لو عشت لغاية ما أجوزك ، ح اجهزك جهاز ما فيش و احده اتجهزته ، مش ح يبقى ع الحجر غيرك .

وضمها إليه وقبلها قبلة أنسته كل آلامه ومتاعبه ، أحس الكدر الذي غبش صدره ينقشع ، والهموم التي كادت تنقض ظهره تتلاشي ، وإذا

ببصيص من الأمل يبدد ظلام نفسه ، ثم ينداح حتى يملاً جوانحه . و فتحت الأم الباب و نظرت ثم ارتدت خطوة وصاحت :

_ إيه القرف ده ؟

كان عاطف يرتدى قميصا أبيض مخططا بخطوط خمراء ، صار رماديا من أثر التراب ، وقد التصقت خصلات شعره بجبهته من أثر العرق المتصبب منه ، وكان بنطلونه ممزقا عند فخذه ، أما حذاؤه فلا لون له ، وفي يده قطعة حبل وفي نهايتها كلب صغير ، أذناه طويلتان تخطان في الأرض وشعره متهدل ، أبيض اللون ، حول عينه اليسرى هالة سوداء .

وجذبت الحبل من يده ، ولكنه تشبث به ، فقالت له :

_ سيب الكلب ، جبته منين ؟

_ واحد صاحبي اداهولي .

وعوى الكلب ، فإذا بأحلام ونبيلة وسوسن وسامى ومراد ، يتسابقون إلى الباب ، أحلام فى قميص النوم ، ونبيلة ترتدى بنطلون البيجاما ، عارية الصدر ، حافية القدمين ، وسامى ليس عليه إلا بنطلونه الأبيض القصير ، ومراد بالفانيلا و « الكلسون » ، أما سوسن فقد راحت تهرول وفى قدميها شبشب كبير .

وخرج الأب من غرفته ينظر وهو يحمل هالة .

وقالت الأم وهي تجذب الحبل:

_ ما تتعبش نفسك ، الكلب دا مش ح يخش الشقه أبدا .

وقالت أحلام:

_ يا جماله!

وأسرعت نبيلة إليه وحملته ، فصاحت فيها أمها :

_ نزليه ع الأرض ، مش شايفاه وسخ ازاى ؟.

فقالت نبيلة:

_ ح احميه .

وقالت سوسن:

_ والنبي يا ماما تسيبيه ، دا لطيف خالص .

وصاح مراد:

_ ح ننضفه ، ح نخلیه فل .

فقال له أمه في غيط:

_ ياخي روح نضف نفسك .

وسارت نبيلة به إلى الحمام ، وإخوتها خلفها يتصايحون ، فقالت لها أمها :

ـــ يعنى عفيتي دلوقت ، لا تعبانه ولا مهمده ولا وراكي مذاكره ، ما تنشطريش إلا في الحاجات الهايفه .

وأغلقت الأم الباب خلفها ، وسارت مهزومة حتى إذا بلغت زوجها قالت له :

_ هو البيت كان ناقص كلاب ! ما كفايه اللَّى فيه .

وسار الزوجان إلى الحمام ووقفا بعيدا ينظران ، وجدا أحلام تدلك جسم الكلب بالصابون بينا راحت نبيلة تصب لها الماء ، بينا راح عاطف

يصيح:

ــ ده كلبي ، أنا اللي أحميه .

وطفق يمد يده ليأخذ من نبيلة الكوز ، وسامي يبعده ، ومراد يقول

له :

_ استنى لما يستخمه ابقى خده .

وقالت سوسن وهي تلوح بالمشط في يدها:

__ أنا اللي ح اسرحه .

وقالت أحلام:

ــ ناولني فوطه يا سامي .

قالت الأم في غضب:

ـــ مش ناقصنا إلا الكلب نجيب له فوط راخر ، وهو انتو مش داريين ، ما بتحسوش . والله اللي ح يحط الفوطه على جسمه ح يعرف شغله .

وشقت نبيلة طريقها إلى غرفتها وعادت بجاكتة بيجامتها ، ولفت الكلب فيها ، ثم عادت إلى غرفتها وإخوتها خلفها .

وسارت الأم إلى غرفتها مطرقة وزوجها إلى جوارها ، وقالت له : _ هو احنا قادرين نأكلهم لما ح نأكل الكلب ؟ قال على رأى المثل . فقالت زوجها وهو يبتسم :

_ مش لاقيين العيش ياكلوه ، يجيبوا كلب يربوه .

(أم العروسة)

الفصل الحادي عشر

اصطف الأولاد في حلقة واسعة ، وقد ركع سامي ومراد وأحلام ونبيلة وسوسن على ركبهم بينا ظل عاطف واقفاً ، ووضعوا الكلب في مركز الدائرة ، وقالت نبيلة :

_ اللي يروح له الكلب يبقى ح ينجح السنه دي .

وراح كل منهم يناديه ، ويغريه بالاتجاه إليه ، فارتفعت فرقعة الأصابع ، وصفر كل منهم بفمه بطريقته الخاصة .

وترددت النداءات:

ــــ بوبی .. بوبی .

ووقف الكلب حائرا ، يدير رأسه يمينا وشمالا ، وقالت نبيلة :

ــ بلاش نقول له ﴿ بوبي ﴾ نسميه اسم تاني .

فقالت أحلام وقد وضعت سبابتها على خدها :

__ نسميه إيه ؟

وشردت ببصرها تفكر ، وهى تغض شفتها السفلى بأسنانها ، وقال سامى :

ـــ نسميه جلجل .

والتفت إلى أحلام ، وضحك ضحكة ساخِرة ، فنهرته نبيلة قائلة :

__ بلاش قلة أدب .

وتوردت وجنتا أحلام ، والتفتت إلى سامى غاضبة ، وقالت فى غيظ :

- ح نتخافف ؟

وقال عاطف:

_ نسمیه (عاطف) .

وضحك الأولاد ، وقالت سوسن وهي تضحك ، لتعلن الجميع أنها فهمت سبب ضحكهم :

ـــ يعنى عاطف كلب .. يعنى عاطف كلب .. هى هئ .. هى .. هى .. هى .. هى .. ه

وقالت نبيلة وهي تفرقع بأصابعها :

ــ نسميه سوزى .

فارتفعت الأصوات تنادى :

_ سوزى . سوزى .

واختلطت الأصوات بفرقعة الأصابع ، وصفير الأفواه ، والكلب يبصبص بذنبه ويتلفت ، ثم يتقدم إلى أحلام .

وحملته أحلام في فرح وضمته إلى صدرها ، وصاح الأولاد جميعا وهم يضحكون :

_ أحلام ح تنجح السنه دى .

وأسرعت إليها سوسن تضمها في فرح لتعلن سرورها بنجاحها ،

وقالت أحلام وقد توجت شفتيها بسمه عذبة :

__ ح انجح في آني امتحان ؟

ورنت إليها نبيلة رنوة ذات مغزى ، وقالت لها :

ـــ هو ضرورى تنجحى فى الامتحان ، أهو ح تنجحى والسلام . وعلا بكاء هالة على ضجيج الأولاد ، فنادت الأم :

ـــ نبیلة ، تعالی خدی أختك لعبوها ، واللا یعنی مش ح تحصل الكلب !

وقالت نبيلة:

ـــ مراد،، هات هاله والنبي .

فأسرعت سوسن تهرول إلى الردهة وتقول:

ـــ أنا اللي ح اجيبها .

وانطلقت إلى حيث كانت أمها جالسة على الأريكة ، وحملت هالة ،

ثم عادت بها ، فقال سامى : ـــ حطوها مع الكلب لما نشوف ح تعمل إيه ؟

فقال مراد معترضا:

ــــ لأ ، ح اقول لماما .

ولم يأبهوا لاعتراضه ، ووضعوا هالة والكلب فى وسط الدائرة ، واشرأبوا بأعناقهم ينظرون .

وتمسح الكلب بها ، ومدت يدها تجذبه من شعره ، فانطلـقت صيحات الرضا ، وراحوا يزحفون على ركبهم يضيقون الحلقة ، حتى ينعموا بمراقبة الغزل الدائر بين هالة وسوزى .

وخرج الأب من الحمام ، يلف حول عنقه فوطة مبتلة وقرع أذنيه صياح الأولاد ، فسأل زوجته :

_ إيه الزيطه دى ؟

_ زيطة أولادك اللي بتدلعهم ، بيلعبّوا الكلب ، يا راجل كش فيهم خليهم يوطوا حسهم .

ـــ وانتي ما كشتيش فيهم ليه ؟

ـــ طول عمری بکش فیهم لوحدی لما بقیت العدوه ، روح انت ربیهم مره .

وانطلق فى عزم إلى حيث كانوا يلعبون ، وزوجته تنظر إليه ، وقد أصاخت السمع ، ووضعت القميص الذى كانت ترتقه جانبا .

ووقف عند باب الغرفة ينظر ، فرأى هالة تجذب الكلب من أذنه وتحاول أن تضعها في فمها ، فاحتلت وجهه بسمة عريضة ، ودغدغت أذنيه ضحكات أبنائه ، فاستشعر مشاعر رقيقة تنبثق في أعماقه ، وتقدم مسرورا يشاركهم حبورهم .

وركع على ركبتيه ، وأبعد « الفوطة » عن عِنقه ، وراح يفرقع بأصابع يديه فى توافق عجيب كأنما يدق لحنا راقصا .

وبدأت سوسن تتمايل على الأنغام ، وتشجع مراد وراح يصفق لها على الوحدة ، و لم ينهره أبوه ، فصفقت نبيلة وأحلام وسامى معه ، وأسفر تمايل سوسن عن وجهه الحقيقي ، فإذا بها ترقص وتميل برأسها إلى الخلف ، حتى مس شعرها كعبها ، وبطنها في حركة دائبة .

وجلجلت ضحكات ناعمة ، وتعالت الأصوات ، وقرع ذلك أذن الأم فقطبت جبينها و جذبت القميص الذي نحته في عصبية ، ثم استأنفت رتقه وتثبيت أزراره .

وتتابع رنين جرس الباب فانقطع التصفيق وفرقعة الأصابع وتوقف الرقص ، ومد الأب يده وأخذ الفوطة ووضعها على كتفه وهم بالانصراف ، وأسرع مراد إلى الباب يفتحه .

وقال مراد:

ـــ أهلا جلال .

ومس صوت جلال أذنى الأب وهو يقول « أهلا بيك » فوسع في خطوه ، حتى دنا من زوجه وهمس :

_ جلال جه .

فقالت وهي تنهض:

ــ يا ريته كان جه من بدري وشافك وانت بترقص العيال .

ووقفت أحلام تصلح هندامها ، وراحت نبيلة تمرر يدها على شعرها وفي عينيها قلق ، وحمل عاطف كلبه وجرى إلى غرفة الاستقبال حيث دخل جلال .

وقالت أحلام لسامي :

_ احمل هاله .

ـــ وانا مالي . ــ

وغادر الغرفة ليرتدى ثيابه ، والتفتت أحلام إلى سوسن وقالت :

_ سوسن شاطره . احملي أختك .

فقالت و هي تهز کتفيها:

ـــ وانا مالى .

ـــ احمليها وح اديكي قرش .

_ هاتى قبله .

ــــ روحي خديه من شنطتي .

ولم تنتظر حتى تحمل سوسن هالة ، بل انسابت مرحة إلى غرفة الاستقبال وفي أثرها نبيلة .

كان جلال يداعب الكلب ، وعاطف ينظر إليه مسرورا ، بينا راح مراد يفتح الشبابيك ، واقترب عاطف من جلال وقال له :

_عجبك الكلب ؟

فقال جلال وهو يعبث في رأس الكلب:

_ لطيف خالص .

فقال عاطف وقد لمعت عيناه خبثا:

_ طب ادى له قرش يشترى بيه بسكويت بقى .

وسمعت أحلام ونبيلة ما قاله عاطف ، فوقفت أحلام وأطرقت خجلا ، ووضعت يدها على فمها ، ودفعتها نبيلة في ظهرها تحثها على التقدم ، وهي تبتسم ، وصاح مراد في أخيه :

ــ امش اطلع بره ، بلاش قلة أدب .

وقال له جلال :

_ ما تسيبه ، دا صاحبي .

ووقف جلال ومد يده في جيب بنطلونه ليخرج القرش ، وإذا به يلمح أحلام مقبلة ، فيمد يده مصافحا ؛ ثم يصافح نبيلة ويشغل بحديثهما عن عاطف .

و جلس جلال والكلب في حجره ، وأصابعه تتخلل شعره في حنان ، وقد تعلقت عيناه بوجه أحلام .

ورمق عاطف أحلام ونبيلة في غيظ ، عطل دخولهما حصوله على القرش، ورمى جلال بنظرة شزراء ، ثم هجم عليه ينتزع الكلب منه ويقول : __ طب هات الكلب بقى .

فقال جلال وهو يقف ويمد يده في جيبه :

_ إنت زعلت ؟ لك حق . خد القرش أهه .

فقالت أحلام في عتاب :

_ ما تعلموش على كده .

فقال مراد وهو يطوح يده في يأس:

... هو لسه ح يتعلم ، ما خد على كده وخلاص .

ودخلت زينب وصافحت جلال وقالت لمراد:

ــ افتح الشباك اللي ورا جلال ، النهارده حر .

فقال جلال منتهزا هذه الفرصة :

_ بلاش تعب ، احنا ح نخرج نتمشي ع النيل شويه ، يا للا

يا أحلام .

واتسعت عينا الأم ، وثارت دماؤها ، ولكنها كبحت جماح عواطفها وقالت في صوت مضطرب جاهدت أن يكون طبيعيا

- _ طب استنى لما تشرب حاجه .
 - __ لا معلش .
 - _ استنى حسين جاى .

وقامت نبيلة وتظاهرت بأنها تصلح ضلفة الشباك ، ورمت ببصرها . كانت ترجو أن ترى السيارة واقفة ، وأن تلمح شفيقا فيها ، ولكنها رأت الطريق خاليا ، فانقبض صدرها ، وعادت إلى مقعدها مطرقة .

وانصرفت الأم ، وانطلقت إلى زوجها ثائرة ، وقالت له :

_ سمعت ؟ عايز ياخذها ويخرج .

وقال الأب في بساطة وهو يرتدي جاكتته:

- _ وفيها إيه ؟
- _ وفيها إيه ازاى ؟ يخرجوا لوحدهم ؟
 - _ مش قاري الفتحه ودفع المهر ؟
- _ والله ما يخرجوا لوحدهم ولو اتكتب الكتاب ، ما يخرجوا إلا بعد الدخله .
 - _ وح تعملي إيه دلوقت ؟
 - ــ ح اتصرف .

وعادت إلى غرفة الاستقبال ، ولكنها لم تدخل ، بل وقفت بعيدا بحيث يراها مراد ، ولا يراها حلال ، وجعلت تشير بيدها لمراد أن تعال . وقال مراد بصوت عال دون أن يتحرك :

_ إيه . في إيه ؟

ووضعت أصبعها على شفتيها تأمره أن يلزم الصمت ، ثم عاودت الإشارة له بيدها ، فذهب إليها وهو ضيق بها ، وما إن وصل إليها حتى

_ روح البس هدومك عشان تخرج مع أحلام وجلال : قوام .

وهرول إلى غرفته ، وفتح درج (الشوفنيير) وبحث عن قميص نظيف له ، فلم يجد فأخذ قميصا من قمصان سامى ، ولمحه سامى وهو يسرح شعره ، فقال له :

ــ سيب القميص ده .

فقال مراد .

_ ما عنديش قمصان . كل قمصاني اتوسخت .

وأسرعت الأم إليهما وقالت لسامى الذى انتزع القميص من يد أخيه :

- _ خليه يلبسه يا سامي .
- ـــ لا يا ستى . عشان يجيبولي نصين ؟
 - ـــ إن قطعه أجيب لك غيره .
 - ـــ ما ليش دعوه .

_ طب اديهوله واشترى لك بداله .

وقال سامي وهو يلقى بالقميص في وجه مراد:

_ إذا كان كده معلش.

وراح مراد يرتدى ثيابه فى عجلة ، وأمه تعاونه ، ووقعت عيناها على حذائه ، فقالت له :

_ جزمتك وسخه قوى .. فين الورنيش ؟

فقال سامي وهو يغادر الغرفة :

ــ لو كانوا بياكلوه ما كانش يلحق يخلص بالشكل ده.

وراحت الأم تلمع حذاءه بخرقة ، حتى إذا اطمأنت إلى مظهره ، رنت إليه لحظة وقالت :

_ ياما نفسى تفضل نضيف كده على طول .

وسارا إلى غرفة الاستقبال ، ودخلا . ولمح مراد كأسا على الصينية فيها شراب وردى بين الكئوس الفارغة ، فخطر له أن يتناولها ولكنه وقف مترددا ، وأحست أحلام به ، فقالت له :

_ اشرب الشربات بتاعك .

ورفع الكأس إلى شفتيه ، فقال له سامي :

_ حاسب توسخ القميص.

وابتسم الجميع إلا نبيلة فقد ظلت ساهمة ، ولاحظ جلال صمتها فقال لها :

_ مالك النهارده ؟ ساكته ليه ؟

وتوردت وجنتاها ، وأحست دماء حارة تتدفق في عروقها ، وقالت وهي تمرر يدها على جبينها :

_ مش عارفه مالى . عندى صداع شويه .

وقال لها أبوها :

ــ خدى لك اسبرنتين وكباية شاى وخشى نامى .

ونهضت لتفر من الغرفة ، خيل إليها أن العيون كلها صوبت إليها ، وأن أمرها كاد ينكشف .

وقام جلال وقال لأحلام:

_ يللا .

ونظرت الأم إلى مراد ، فنهض وسار جلال وأحلام إلى جواره وانطلق خلفهما مراد . وقبل أن يصلا إلى الباب كان مراد يسير بينهما . وأحس به جلال ، فلم يشعر بارتياح ، وكبت عواطفه وابتسم وقال له :

_ جای معانا ؟

فقال مراد في ثقة:

_آه .

و لم تنهره أمه ، و لم يزجره أبوه ، فقال له جلال :

_ تشرف .

وانطلقوا وقد تكدر صفو جلال ، وإن راح يربت على ظهر مراد ، ' ويمرر يده على شعره . وبلغوا الجزيرة ، وساروا في الطريق المنساب على ' ضفة النيل ، وقد أضيئت المصابيح الخافتة التي عجزت عن قهر جحافل الظلام ، وكان مراد يسير بينهما ، ويشاركهما الحديث .

وأراد جلال أن يسير مع أحلام جنبا لجنب ، فوسع من خطوه وانتقل إلى جوارها ، وإذا بمراد يندس بينهما ويفصلهما . وضاق جلال به ذرعا ، فجذبه من يده ، ونقله إلى يمينه فصارت أحلام عن يساره لا يفصل بينهما فاصل .

والتصقت كتفه بكتفها ، ومال رأساهما حتى كادا أن يلتصقا ، والتقت العيون وهمس جلال :

_ أحبك .

فقال مراد .

_ بتقولوا إيه ؟

فقال جلال في اضطراب:

ــ كنت باقول الجو لطيف النهارده .

فقال مراد:

__ أبدا . الدنيا حر موت ، أنا عارف طايقين تتلزقوا في بعض كده ازاى ؟

وابتعد جلال عن أحلام ، وقد لمعت العيون بالبسمة التي كبتتها الشفاه !

وانطلقوا ، وما إن ابتعدوا خطوات حتى التصق الكتفان ، ومال الرأسان ، وتحدثت العيون ، وتحركت المشاعر في الصدور ، وهمس

جلال مغازلا:

ـــ قمر .

ومست الكلمة أذني مراد ، فقلب وجهه في السماء وقال :

ــ فين ده القمر ؟ مش شايف حاجه .

فقال جلال ، وهو يئد البسمة التي ولدت على شفتيه :

سألتنى أول الشهر العربي إمتى ؟ قلت لها ، لما يطلع القمر .
 فنظر مراد إليه في دهش وقال :

ــ سألتك إمتى . أنا ما سمعتش حاجه .

وأشاحت أحلام بوجهها حتى لا يرى أخوها البسمة العريضة التى ارتسمت على وجهها ، وقال جلال ليغير مجرى الحديث ، وهو يشير إلى مركب يسير في النيل .

- شايف المركب ماشي بالليل ازاى ؟

فقال مراد:

-- وإيه يعني ، ما المركب بيمشي بالليل وبالنهار .

فقال جلال:

_ صحيح .

وضربه على ظهره بقوة وهو يقول له:

ــ شاطر . ما كنتش فاهم إنك كده .

ووصلوا إلى جسر التحرير ، كان يأتلق بالنور والسيارات تنساب فوقه في صفوف ، والناس على جانبيه يتدافعون بالمناكب ، فاندسوا بين الجموع ، وقد أتاح الزحام فرصة التصاق جلال بأحلام رغم أنف مراد .

و نادى صوت نسوى رقيق:

_ جلال .. جلال ..

والتفت جلال خلفه ، ثم خفف من خطوه ، ولاحظت أحلام تمهله ، فسارت في طريقها ، ومدت يدها وأمسكت مرادا من يده .

ونظرت خلفها فألفت جلالا يحادث شابة جذابة ويبتسم ، فاربد وجهها ، وتحركت عقارب غيرتها ، ولم تطق صبرا ، فجذبت مراد من يده ، ووسعت خطاها وراحت تشق طريقها بين الكتل البشرية المتدفقة .

واشرأب جلال بعنقه فلم يجد لأحلام أثرا ، فجعل يتلفت ثم انطلق يجد في أثرها ، ولكن أفواج الموج البشرى المتدفق على الجسر كان يعوق تقدمه .

ووصل أخيرا إلى محظة السيارات ، ولمح أحلاما ومرادا في سيارة بدأت تتحرك فهتف :

_ مراد .. مراد ..

وأشاحت أحلام بوجهها عنه في غضب ، فضرب كفه بقبضة يده في حنق ، وعقد العزم على أن يتركها الليلة لغيرتها تؤرقها وتنهش صدرها . وعادت أحلام إلى الدار ، واتجهت إلى غرفتها حانقة ، وفطنت أمها إلى غضبها ، فخفت إليها وقالت لها :

- ـــ رجعتي لوحدك ليه ؟ أمال فين جلال ؟
- ــ سابني ووقف يكلم واحده ، فته وجيت .
 - ــ وقف يكلم واحده ، إزاى ده ؟
 - _ أهو ده اللي حصل .
 - ــ ماتزعلیش نفسك ، بس لما ييجي .

وبدأت أحلام تخلع ثيابها وتلقيها في غضب، وغادرت أمها الغرفة و ذهبت إلى حيث كان زوجها وقالت له :

ــ شفت جلال عمل إيه!

ونحى الرجل الصحيفة التي كان يطالعها وقال:

- _ عمل إيه ؟
- ــ ساب أحلام ووقف يكلم واحده .
 - _ وعملت إيه أحلام ؟
 - ــ فاتته وجت .
 - _ غلطانه .
- غلطانه ازاى ؟ أمال كنت عايزها تعمل إيه ؟!
- ـــ تستنی لما تشوف مین ده ، مش یمکن قریبته ، واحــده مــن معارفهم ؟
 - ــ بس لما ييجي .
 - _ حتعملي له أيه ؟
 - _ ح افرجه .

_ مالكيش دعوه .. سييهم هم يصفوا مشاكلهم من غير ما حد يتحشر بينهم ، يكره ح يبان لك إنها حكايه هايفه .

_ هايفه ! بكره ح تشوف .

وتحركت لتغادر الغرفة ، ثم وقفت قليلا ساهمة ، خطرت لها فكرة ، فأغذت السير إلى حيث علق زوجها ثيابه ، وراحت تعبث في جيوبه ، وتقلب في أوراقه وهي تغمغم :

__ مين عارف . يمكن . ! الرجاله كلهم خاينين وعينهم فارغه ، ومالهمش أمان .

الفصل الثاني عشر

أطفئت الأنوار ، وساد الظلام ، ونام حسين وزوجته وأولاده ، وبقيت أحلام مسهدة ، لا يمشى الوسن إلى جفنيها ، ولا يغادر القلق صدرها ، ولا يهدأ لها بال ، ولا يستقر لها قرار . كانت تتقلب في فراشها تقلبها على جمر ، ما أن يمس جنبها الأيمن الفراش حتى تدور وتستلقى على ظهرها ، ثم تكمل دورتها لتنام على جانبها الأيسر ، وسرعان ما تعود سيرتها الأولى .

وكانت تحكم الغطاء عليها ، وتغطى وجهها ، وما تلبث أن تدفعه بيدها ، ثم ترفسه بقدمها ، ثم تعود وتجذبه بيدها وتسدله على جسمها القلق المحموم .

وكانت نبيلة ترقبها فى صمت ، وخطر لها أكثر من مرة أن تحادثها لتنتشلها من ذلك القلق المضنى ، ولكنها كانت تتريث لعلها تهجع وتروح فى سبات ، وظلت أحلام فى عذاب ، فلم تطق صبرا ، وقالت وقد رفعت رأسها عن الوسادة ورمت ببصرها إليها :

ـــ معذبه نفسك كده ليه ، الموضوع بسيط خالص .

ودفنت أحلام وجهها في الوسادة ، وشهقت ، فمدت نبيلة يدها وأضاءت الأباجورة » ثم اتجهت إلى سرير أحلام وجلست على حافته »

وقالت:

_ قولي لي : بتفكري في إيه ؟.

فقالت أحلام وهي تبكي:

_ يسيبني ازاي وانا ماشيه معاه ويكلم واحده تانيه ؟

_وفيها إيه يعني ؟ ما استنتيش ليه لما يرجع ويشرح لك كل حاجه :

غرتى قوام ! خليتى لبتوع زمان إيه !.

ومالت نحوها ، وقالت وهي تمرر يدها على ظهرها :

_ عايزه الحق . إنتي غلطانه .

وأجهشت أحلام بالبكاء ، فقالت لها نبيلة :

_ بتعیطی لیه دلوقت ؟

_ عشان عارفه ان أنا غلطانه .

_ خلاص ، مدام معترفه انك غلطانه ، كل حاجة ح تبقى سهل ،

لما ح ييجي بكره ح تتصلح كل حاجه .

والتفتت أحلام إليها وقالت في لهفة :

_ تفتكرى انه ح ييجى بكره ؟

فقالت لها نبيلة وهني تهز رأسها :

بقی عشان کدہ بتعیطی ! اطمنی . ح بیجی . أمال ح یروح فین ؟

وجلست أحلام في فراشها وقالت:

ـــ إن جه ح اعتذر له ، ح اقوله اني غلطانه ، ومش ح اعمل كده

تانى .

قالت لها نبيلة:

__إياكى تعتذرى له ، مثلى عليه . اعملى انك زعلانه لغاية ما يعتذر لك عشان ما تبقيش انت اللي غلطانه .

وابتسمت أحلام على الرغم من الدموع المترقرقة في مآقيها وقالت وهي تدفع نبيلة في صدرها في حنان :

اتعلمتي الحاجات دي فين ؟

فقالت نبيلة في غرور :

ــ الحاجات دي ما تتعلمش . نتولد بيها . خليكي تقيله .

ونامت أحلام وسحبت نبيلة عليها الغطاء ، ثم أطفأت نور الأباجورة واندست في فراشها ، واستغرقت في النوم .

وأصبح الصباح ، ودبت الحياة فى الشقة ، وراح الأولاد يهرولون ويصيحون قبل أن يغادروا الدار إلى المدرسة ، وحملت نبيلة حقيبتها وأسندتها على عجزها ، وقبل أن تنصرف ألفت أحلام تملأ القلل وهى ساهمة ، فدنت منها وقالت :

۔ واللہ ح بیجی . بس مش ح بیجی الصبح . ح بیجی لما یخلص شغله .

وغادرت المطبخ وهي تصيح :

ـــ ماما .. ح اتأخر العصر ، عندنا بروفه لحفلة التمثيل .

وقالت الأم وهي تقوم بلم ما بعثره الأولاد قبل خروجهم من ملابس

وأوان وفتات خبز وقصاصات ورق :

ـــ والله ما انا عارفه التمثيل ده لزمته إيه !

و لم تحفل نبيلة باعتراضها ، وانطلقت كالطيف على أطراف أصابع قدميها ، ودوى فى أذنبها صوت بوق السيارة ، فقالت وهى تجرى :

ـــأنا نازله . العربيه جت .

وصفق الباب خلفها .

وخلت الشقة من الأب والأولاد ، ولم يبق بها إلا الأم وأحلام وهالة ، أما عاطف فقد كان في طوافه اليومي على شقق الجيران .

وانتهت أحلام من عملها اليومي الرتيب ، وبدأت في كي ثوب من ثيابها ، واقتربت أمها منها وهي تحمل هالة وقالت لها :

ـــ كما ييجي جلال أنا اللي ح اخش له .

فقالت أحلام ، وقد رفعت المكواة عن الثوب :

_ليه ؟

ـ مش ح تعرفي تكلميه ، أنا اللي ح اعرف أكلمه .

وخشيت أحلام أن تجرح أمها شعوره ، أو تسىء إليه من حيث لا تدرى ، وتسبب لها المتاعب فقالت لها :

ـــ أرجوكي يا ماما تسيبي الموضوع ده ليه .

فقالت لها أمها في تهديد:

۔۔ بقی اسمعی . لو قرش ملحتك مرہ ، ح يقرشها على طول . ح تبقى هفيه .

ـــ ما تخافیش .

وراح الوقت يمر وثيدا وئيدا ، وعاد الأولاد من مدارسهم ، وجاء الزوج . ومالت الشمس للمغيب ، ولم يأت الحبيب ، فطفقت أحلام تغدو وتروح في الشقة في قلق شديد ، كانت كلما سمعت صوت وقوف سيارة تهرع إلى النافذة تنظر وهي تأمل أن يكون جلال جاء في رفقة شفيق ، ولكن سرعان ما يتبدد الأمل ، ويستبد بها يأس مرير .

ودق جرس الباب الخارجى ، فخفق قىلبها فى شدة ، ولفها اضطراب ، وراحت دماؤها تتدفق حارة فى عروقها ، وخفت إلى الباب فى وقفت لحظة تصلح هندامها وشعرها ، ثم مدت يدها تفتح الباب فى تؤدة ، كانت أشبه بمقامر يفحص ورقه فى حرص ، خشية أن يفجع فيه . ولحت جلالا ، فاشتد وجيب قلبها ، وربا اضطرابها واحمرت

و هحت جلالا ، فاشتد وجیب قلبها ، وربــا اضطــرابها و وجنتاها ، ولکنها فتحت الباب علی مصراعه وقالت فی فرح :

ــــ أهلا وسهلا .. اتفضل .

وذهب إلى غرفة الاستقبال ، وقال جلال قبل أن يجلس :

_ تقدرى تقولى لى مشيتى امبارح ليه ؟

فقالت في اضطراب:

ــ يعنى ما انتش عارف ؟

ــ لأ مش عارف .

ــ لما لقيتك سبتني ومشيت اضطريت أمشي .

_ سبتك ومشيت ؟!

- ــ بصيت ما لقيتكش جنبي . ما قلتليش رايح فين ..
 - ــ هو انتى استنتيني علشان أكلمك .
 - _ كنت اقف فين والناس عماله تزق في بعضها ؟
- ــ طب ولما ندهت عليكو وانتو في الأتوبيس وديتي وشك الناحيه التانيه ليه ؟ أنا مش فاهم إيه اللي زعلك .
 - ــ عايزني أفرح لما تسيبني وتكلم واحده تانيه ؟
- ـــ ما تقوليش سبتك ، واحنا ماشيين واحده كانت زميلتي في الجامعه شافتنا ، ندهت على يا دوب رحت لها ، والتفت علشان أقدمها لك ، بصيت مالقتكيش .

ودنا منها وقال لها :

ــ مشيتي ليه ؟ غرتي ١

فقالت وهي تشيح بوجهها عنه في دلال:

ــ اللي بيحب لازم يغير .

ثم عادت ونظرت إليه فى إغراء ، وتعطلت لغة الكلام وتخاطبت العيون ، فلف ذراعه حولها وقبلها قبلة طويلة حارة .

وانفصلا في فزع ، وفي مثل لمح البصر جرى جلال خلفها حتى لحق بها ، فأمسكها ووضع يده في جيبه وأخرج قطعة نقود ، دسها في راحتها وقال لها :

ــ خدى اشترى حاجه .

وفتح الباب ودفعها منه ، وضربها على مؤخرتها ، ثم أغلق الباب وعاد إلى غرفة الاستقبال وهو يزفر في راحة .

وجاءت الأم تسعى ، وخلفها زوجها ، ودخلا غرفة الاستقبال فألفيا أحلاما وجلالا يتناجيان فى ود ، فصافحا جلالا وجلسا ، وراح الزوج ينظر إلى زوجه وعلى شفتيه بسمة ، وفى عينيه كلام ، لو ترجم لكان : (مش قلت لك . ماتتحشريش بينهم ، سبيهم يصفوا مشاكلهم لوحدهم . شفتى ! جالك كلامى ! » .

وراح جرس الباب يرن رنينا متصلا ، فقالت الأم :

ــ نفسى سوسن ما تجطش إيدها ع الجرس على طول ، هي فاكره البوابين واقفين ورا الباب ؟

وسمع صوت فتح الباب ، واندفاع سوسن وهرجها ، وما أن وصلت إلى الغرفة حتى صاحت :

_ ماما .. ماما الحقى .

واتسعت عينا جلال رعبا، وأطرقت أحلام خجلا، ثم قامت لتغادر الغرفة قبل أن تشى سوسن بها ، واستشعرت عرقا باردا يتفصد من وجهها ، وخيل إليها أن لونها قد غاض ، وقالت الأم :

ــ فيه إيه ؟

فقالت سوسن :

_ عاطف شحت برتقاله من الجيران .



مش قلت لك : ما تتحشريش يينهم . .

وارتمت أحلام فى مقعدها ، وزفر جلال فى راحة ، وهو يوسع خناق الكرافاتة ، وأقبل عاطف وهو يحمل البرتقالة ، وقال فى صوت ثابت ، لا أثر للخوف عليه :

__ أنا ما شحتش .

وقال له أبوه :

__ أمال مين ادهلك ؟

_ هم ماادوهالیش کده .

_ أمال ادو هالك ليه ؟

_ عشان جبت لهم سجاير .

فابتسم جلال وقال:

ــ مايبقاش شحتها ، خدها أجرة المشوار .

وجلست سوسن ، وراحت تنقل بصرها بين جلال وأحلام ، ثم تضحك وتخفى وجهها فى راحتيها ، وخشيت أحلام أن تسألها أمها عن سبب ضحكها . فتبوح بالسر الذى تشتهى أن يكشف ستره ، فأشارت إليها بيدها أن تأتى ، فذهبت إليها ، فأسرت أحلام فى أذنها أن فى درج ملابسها قطعة شيكولاتة عليها أن تأخذها على ألا تعود حتى ينصرف جلال .

ودوى صوت كلاكس سيارة ، فقال جلال :

ــ ده شفيق إيه اللي جابه ؟

فقال حسين وهو ينهض:

ــ خليه يتفضل .

و لم يتحرك جلال ، وأسرع حسين إلى النافذة المطلة على الطريق .

وأطل منها وقال :

_ اتفضل .

وقال شفيق وهو في السيارة :

_ جلال موجود ؟

ــ أيوه . اتفضل .

وصعد شفيق ، وقال لجلال وهو يصافح الموجودين :

ـــ رحت لك البيت مالقتكش ، سألتهم رحت على فين ، قالوا ما يعرفوش ، قلت لروحى ضرورى ح يبجى على هنا . ح يروح فين ؟ الرجل تدب مطرح ما تحب .

وجلس شفيق وضحك حسين وقال:

_ إنت غاوى أمثال انت راخر ؟

فقال شفيق:

ــ ده المثل الوحيد اللي اعرفه .

وراح شفيق يقلب عينيه في المكان ، ويشرئب بعنقه ويمد بصره إلى الردهة ، كان يبحث عن نبيلة ، وهم أكثر من مرة أن يسأل عنها ، ولكنه كان يكبح جماح نفسه .

ولاحت نبيلة في الطريق مقبلة ، وقد وضعت حقيبة كتبها على عجزها ، ولمحت سيارة شفيق من بعيد ، فجعلت تتفرس فيها ، حتى إذا

ما تيقنت منها وسعت من خطوها ، ولو طاوعت نفسها لراحت تعدو في الطريق .

وبلغت الدار ، فألقت على السيارة نظرة ، ثم دلفت إلى مدخل السلم ، وأخذت تصعد في الدرج قفزا ، ووجدت باب الشقة مفتوحا فانسابت منه إلى غرفة الاستقبال .

وتريثت قليلا تلتقط أنفاسها ، وأخرجت من حقيبتها مشطا وراحت تسرح به شعرها ، ثم تقدمت وقالت :

_ السلام عليكم .

فقال جلال وشفيق :

_ وعليكم السلام .

وتقدمت تصافحهما ، صافحت جلال في عجل ، وبقيت يدها في يد شفيق برهة ، وقالت الأم :

- ــ جيتي بإيه ، يعني ما سمعناش صوت عربية المدرسة ؟
- ــ جيت في الأتوبيس ، مش قلت لك الصبح عندنا بروفه لحفلة التمثيل ؟
 - ــ لو قلتي انك ح تيجي في الأتوبيس كنا بعتنا لك سامي .
 - _ وفيها إيه يا ماما لما آجي لوحدي في الأتوبيس ؟
 - ـــ یا بنتی ما بقتیش صغیرہ .

و وجد شفيق الفرصة سانحة ليشترك في الحديث، فقال:

_ أمال لما ح تروح الجامعه ح تروح في إيه ؟

فقالت الأم في استنكار:

_ الجامعه! كلها السنه دى وتقعد في البيت.

فقال شفيق في ارتياح:

__ أحسن .

فقالت نبيلة:

_ أنا لازم اروح الجامعه ، وابقى دكتوره . ما تتكلم يا بابا .

_ ناخذ رأى الموجودين . إيه رأيك يا جلال ؟

فقال جلال وهو ينظر إلى أحلام:

_ أنا رأيي قلته عملي .

وابتسمت أحلام ، وسرت الأم ، كانت تحسب أن الأمر لا يخرج عن معركة بينها وبين ابنتها ، ينبغي أن تفوز فيها تحفظ كرامتها .

وقال الأب:

_ وانت يا شفيق رأيك إيه ؟

_أفضل في البيت واحده عنيها حلوه ، اتعلمت كفايه ، عن دكتوره عنيها مضعضعه ونضاره تخن كده .

وبالغ في سمك النظارة عندما أشار بأصبعيه ، حتى أن نبيلة ابتسمت ، على الرغم من أن الرد لم يكن في صفها .

وقالت:

_ ضروري كل دكتوره تكون لابسه نضاره تخن كده! وأقبل سامي وهو يحمل الكلب على ذراعه، ووقف بعيدا يصغي إلى

الحديث الدائر ، وقال شفيق:

__ إن ما كانتش نضارتها تخن كده بيكون وشها كرمش ، شوفى بتقعد كام سنه في الكليه .

وقال جلال:

_ من رأيي يعملوا كشف هيئه على البنات اللي تروح الجامعه ، وما يسمحوش إلا بدخول الوحشين بس! .

فقال سامي لنبيلة:

... خلاص . ضمنتي إنك تخشى الجامعه .

والتفتت نبيلة إليه في غضب وقالت:

_ إيش حشر العيال في الكلام ده ؟

فقالت الأم في زجر:

__وبعدین معاکو .. لازم تتناقروا . روحی یا نبیلة غیری هدومك وتعالى .

وغادرت نبيلة الغرفة وهى تنظر إلى سامى شذرا ، وانطلقت إلى غرفتها ، وراحت تخلع ثيابها ، وترتدى ثوبا أخاذا ، وقبل أن تكتمل زينتها تذكرت شيئا ، فأسرعت إلى غرفة الاستقبال وشعرها منفوش ، وقالت :

ــ بابا ، حفلة التمثيل بعد بكره ، ضروري تحضرها .

فقال الأب:

ــ يا ريت ، مش فاضي ورايا شغل .

فقالت نبيلة في عتاب:

ـــ هو كل سنه ما يحلاش الشغل إلا يوم حفلة التمثيل ؟

ــ عندي لجنة .

فالتفتت إلى أمها وقالت : وانت يا ماما وراكي إيه ؟

ــولا حاجه .

فقالت نبيلة في فرح: خلاص. ح تيجي أنت وأحلام وجلال.

ثم التفتت إلى شفيق وقالت :

ـــوانت .

فقال شفيق:

ــ حاضر .

ــ الحفله ح تبتدى الساعه اربعه .

وقال شفيق وهو يلتفت إلى الأم:

ــ أفوت عليكو أنا وجلال الساعه تلاته ونص .

فقالت الأم:

فقال جلال:

ــ معلش . اعفونا من حكاية الغدا دى .

فقال شفيق:

ـــ لأ . ح نيجي نتغدى بس بشرط .

فقالت الأم:

__ إيه هو ؟

فقال شفيق:

ـــ انكم تيجوا كلكم معايا العزبه يوم الجمعه ، نقضى اليوم كله هناك .

فقال الأب في استنكار:

_ نيجي كلنا ؟؟ إزاى ؟ .

_ المسافه قريبه ، ح افوت عليكم الساعه سبعه الصبح وآخدكم في العربيه .

فقال الأب في سخرية:

_ با راعقل ، مالك ومال الشبكه دى ؟

فقال شفيق وهويبتسم:

ـــ أنا وأنا بكامل عقلى ، باعزمكم يوم الجمعه ومصمم على العزومه دى .

فقالت الأم وهي تهز كتفيها :

_ إيه . ذنبك على جنبك .

وقال الأب :

ــ على نفسها جنت براقش .

الفصل الثالث عشر

شرعت الأم فى دس قدمها فى الجورب النايلون ، وراحت تعالجه فى حرص شديد ، كأنما نسج من خيوط العنكبوت ، ولما تم لها لبسه ، انتصبت واقفة ، ودارت بعجزها ونظرت لتطمئن إلى استقامة خط الجورب الخلفى ، وإذا « بسوزى » يقفز من فوق السرير ، ويهرع إليها ويشب على ساقها فتنشب أظافره فى الجورب وتمزقه ، فدفعته بقدمها فى غيظ وهى تقول :

ـــ كنا ناقصينك انت راخر .. يا سامى ..، يا مراد .. تعالوا خدوا الكلب ده من هنا .

وأقبل سامي ، وقال :

_ فيه إيه يا ماما ؟

_ خد الكلب ده اللي من يوم ما جه ما شفنا يوم راحه .

فقال سامي وهو ينحني ليحمله:

_ عمل إيه بس ؟ دا راجل طيب .

فقالت وهي تخلع الجورب وتنظر فيه:

_ قطع الشراب اللي لسه تمنه ما بردش ، وامبارح طلع قطن الكنبه ، وأول امبارح نزل الشارع مع عاطف جه و سخ البياضات كلها ، وما زاد (أم العروسة)

وعاد إلا نومته على السرير على طول ، هي بقت شقتنا ، دى بقت شقة أبوه .

و جاء حسين و قال:

_ أبوه مين بس ؟ هو فيه أبو حد هنا غيرى ، ياللا ، انتي لسه ما لبستيش ؟ الناس قلقوا .

فقالت وهي تشير في غيظ إلى الكلب:

... ما هو السبب ، هو اللي عطلني .

ــ دا انتى بتلبسى من بعد الغدا ، الساعة بقت تلاته و نص ، فاضل نص ساعة ع الحفله .

ـــ أنا خلصت أهو .

والتفتت إليه وقالت:

_ إنت ح تنزل امتى ؟

_ الساعه سته .

_ طب إن صحيت هاله لبنها عندك في التملية ، ولما تيجي تخرج سلمها لسامي .

و تلفتت و قالت:

_ أمال فين مراد ؟

فقال سامي:

بيذاكر .

ونادت الأم :

_ مراد .. مراد .

وجاء مرادوفی يده كتاب إنجليزي وفي خده و شفتيه أثر حبر ، فقالت له :

__ أنا مش فاهمه ، إنت بتشرب الحبر ؟ إيه الحبر دا اللي في بقك ؟. فقال وهو يمسح فمه بيده :

__ كنت باحل الحساب ، وأنا بافكر نسيت وحطيت سن القلم في .

واقترب خطوة وقال:

ـــ تعرفي يا ماما أنا صعبان على قوى الأولاد الانجليز الصغيرين .

__ ليه ؟

فقال وهو يرفع الكتاب الإنجليزي في يده:

_ إزاى ينطقوا الكلام الإنجليزي الصعب ده ؟!

فقالت له أمه:

_ ما يصعبش عليك غالى .

وقال له أبوه :

ـــ والله انت اللي صعبان على .

ثم التفت إلى الباب وقال :

ــ واللي مستنيين بره صعبانين على روخرين .

فقالت الأم:

__ أنا خلاص لبست أهه .. خلى جلال وشفيق وأحلام يسبقونى ع العربيه ، وأنا نازله على طول . وانت يا سامى خد أخوك وع المطبخ اغسلوا الاطباق ، وشيلوهم محلهم .

فقال سامى:

__أمال ح نذاكر إمتى ؟ ما تجيبوا لكم خدامه تغسل الاطباق و تكنس تمسح .

فقالت الأم:

__إن جبنا بنت ح ندفع لها أجرتها م الفلوس اللي بتروحوا بيها السينا ، واللي بتركبوا بيها عجل .

فقال مراد وهو يضع كتاب الإنجليزي على التواليت:

ــ لا . دا احنا نغسل الاطباق قوى ، ونلحسها بلسانا كان .

وخرج سامى ومراد من الغرفة ، وسمع صوت مغادرة أحلام وجلال وشفيق الشقة ، والتقى الوالد ومراد وسامى فى المطبخ ، وإذا بالأوانى والصحاف والشوك والسكاكين والأكواب مكدسة فى انتظار من يتفضل بغسلها .

ووضع سامى الكلب على الأرض ، فأسرع يلعق الصحاف ، وارتدى سامى ، فوطة ، المطبخ ، وشمر عن ساعده ، بينا راح مراد يحمل الأوانى على صدره ، دون أن يحفل بثيابه .

وجاء عاطف يصيح ، وفي يده غصن شجرة ، يضرب به الأرض : - جلال وأحلام رايحين فين ؟ أروح معاهم .

خرجت الأم من غرفتها بعد أن اطمأنت إلى أناقتها ، والتقت بعاطف في الردهة ، وما إن وقع نظره عليها حتى قال :

- ـــ وانتى خارجه معاهم ؟ وأنا ح اروح معاكم .
 - فقالت له الأم وهي تبعد يديه عن ثوبها:
 - _ خليك هنا ، وح اجيب لك حاجه حلوه .
 - _ ح تجيبي لي إيه ؟
 - _ ح اجيب لك عروسه .
- _ لاً . أنا مش عايز عروسه ، أنا عايز عريس زي أحلام .
 - فقالت له وهي تبتسم:
 - ـــ إنت راجل . تيجي لك عروسه .
 - _ لا . أنا عايز عريس ، عريس يركبني أتومبيل .
 - _ طیب . بس اسکت ..

وهمت بالخروج ، وإذا به يعترض طريقها وقد بسط ذراعيه يحول بينها وبين السير ، وغصن الشجرة يسد الطريق :

_ مش ح تنزلي إلا لما تديني قرش قبله .

و فتحت حقيبة يدها ، وأخرجت منها قرشا ودفعت به إليه وانطلقت في سبيلها ، وهي تنظر إلى المطبخ وترى زوجها وسامى ومراد منهمكين في غسل الأواني والأدوات .

وهبطت إلى الطريق ، وتقدمت إلى السيارة ، فإذا بجلال قد جلس خلف عجلة القيادة وأحلام إلى جواره ، ووقف شفيق عند الباب وقد فتحه ينتظر ركوبها ، فصعدت إلى المقعد الخلفي ، وصعد شفيق في أثرها ، ثم انطلقت السيارة بهم .

. وبلغوا المدرسة ، وراحوا يصعدون فى درج دائسرى ، ورأت الطالبات أحلام فخف إليها بعضهن يصافحنها ، وإن كانت عيونهن تتفرس فى جلال وشفيق .

ودلفوا إلى قاعة واسعة ، أقيم المسرح في صدرها ، وصفت فيها كراسي خيزران ، فاتجهوا إلى الصفوف الأمامية ، والأنظار تتبعهم ، كانت الطالبات في شوق إلى معرفة خطيب أحلام ، فلما جلست أحلام وإلى جوارها جلال ، سلطت الأنظار عليه تفحصه من قمة رأسه إلى أخمص القدم .

وراحت مدرستان تديمان النظر إليهم ، ومالت إحداهما على الأخرى وقالت :

- ــ التانى أحلى من خطيبها .
- ـــ والنبي ياختي راخر شربات . ما وحش الا قلته .

ونهضت ، وراحت تصلح هندامها ، فقالت لها زميلتها :

_ على فين ؟

_ رايحه أسلم على أحلام ، واتفرج .

فنهضت الثانية وقالت:

ــ خديني ياختى معاكى .

وانطلقتا إلى أحلام ، فلما رأتهما ارتبكت ، وقامت تحية لهما ، وقد توردت وجنتاها بلون الورد .

وقالت الأولى :

_ إزيك يا أحلام ؟

_ الله يسلمك يا أبله منيره .

وقالت الثانية:

ــ سنه طويله ما حدش يشوفك ، يخونك العيش والملح .

ـــ والله ما باخرجش يا أبله وداد'.

وسكن اضطرابها ، فالتفتت إلى أمها وقالت تقدمها إليهما :

_ماما .

_ أهلا وسهلا .

وقالت وداد متملقة:

_ والله ما افتكرناهاش ماما ، افتكرناها أختك الكبيره !

وأرضى ذلك الملق غرور الأم ، فقالت :

_ الناس كلها بتفتكر كده .

وقالت أحلام وهي تشير إلى جلال وشفيق:

_ جلال والأستاذ شفيق .

ومدت المدرستان أيديهما ليتمتعا بالمصافحة ، وعيونهما تتجول في

وجهى الشابين ، وقالتا :

_ اتشرفنا .. فرصه سعيده خالص .

وقالت منيرة :

_ أحلام دى .. دى .. دى أختنا .

وقالت أحلام وهي تشير إلى مقعدين خاليين إلى جوارهما :

- ـــ ما تتفضلوا جنبنا هنا .
- _ متشكرين ، إنت عارفه ما نقدرش نقعد النهارده في حته واحده ، أورفوار مؤقتا .
 - وانصرفتا وما إن ابتعدتا عنهم ، حتى قالت منيرة في مرارة :
 - ـــ بنت امبارح بقت عروسه النهارده ، أمال احنا مالنا .
 - فقالت وداد وهي تمصمص بشفتيها:
 - _ قسم .
 - ثم رفعت بصرها إلى السقف وقالت في ابتهال:
 - ــ يا رب ارزقنا بقى بعدلنا .
 - فقالت منيرة:
 - ــــ إن شاء الله يا وداد يا اختى . من بقك لباب السما .
- وراح جلال يتفرس فى المسرح ، فألفاه مكونا من موائد المطعم ، وقد شدت جوانبه بالخيش ، أما الستارة فكانت من مفارش سرر شبك بعضها إلى بعض بدبابيس إبرة ، والتفت إلى أحلام وقال :
 - ــ أظن انتو ساهمتوا في بنا المسرح ده .
 - فقالت أحلام وهي تبتسم وتشير بأصبعها إلى الستارة :
 - ــ طبعا ! مفرش السرير التالت ده بتاعنا .
 - وقالت لها أمها همسا:
 - نفسی یا أحلام ما تشوریش بصباعك وانتی بتتكلمی .
 فقالت لها أحلام :

_ يا ماما انتى نفسك في حاجات كتير ، مش ممكن تتعمل .

وظهر الميكروفون أمام الستارة ، فقال شفيق في تأوه :

__ آه . ح نشرب أكبر مقلب ، الخطبة ، نفسى يطلع قانون يحرم الخطابة في الحفلات .

فقالت أحلام وهي ترنو إلى جلال في حب:

__ كلهم نفسهم مفتوحة النهارده ، عمالين يتمنوا ، ماما قالت نفسى ، وشفيق قال نفسى ، وانت ما نفسكش في حاجه ؟

فقال وهو ينظر إليها في حب:

_ نفسي في حاجات كثير قوى .

_ نفسك في إيه ؟ قول .

فقال وهو يرمقها بطرف عينه في خبث :

_ ما اقولش ، وان كنت عارف انك عارفه اللي نفسي فيه .

وأسبلت جفنيها دلالا ، ورفت على شفتيها بسمة عذبة ، واقترب رأسها ، وإذا بصوت الناظرة في جنبات القاعة ، فيفيقان من حلم لحظتهما .

وراحت الناظرة ترحب بالمدعوين ، في أسلوب متحذلق . فمال شفيق على جلال وقال :

_ أراهن إن اللي كتب الخطبه دى مدرس لغه عربيه عتيق .

فقال له جلال:

ـــ أمال ح يكون مدرس انجليزى!

.... مش قصدى . قصدى انه مدرس يهتم باللفظ بس بيفضل اللفظ الرنان ولو شوه المعنى .

وقالت أحلام :

ــ اللي بيكت الخطب كلها أبو الأسود الدؤلي .

ــ يدوب كده ، باين على الخطبه إنها من أيام سيدنا على .

وضحكت أحلام وقالت:

_ مش أبو الأسود بتاع أيام سيدنا على ، دا الشيخ اللي قاعد هناك ده ، البنات مسميينه كده .

ونظر جلال وشفيق إلى حيث أشارت أحلام ، فإذا بشيخ معمم يصغى إلى الناظرة فى انتباه ، وهو يهز رأسه إعجابا ، كأنما يصغى إلى مطربة ، فقال شفيق فى حماسة :

ــ مؤكد هو اللي كاتب الخطبه دى ، لأن كل كلمه فيها لابسه عمه وكاكولا .

ـــ وانتهت الناظرة من خطبتها ، فصفق شفيق فى شدة ، وقال له جلال :

_ إيه الإعجاب ده ؟

_ ده إعجاب بأنها خلصت الخطبه .

وفتحت الستارة ، وإذا بطالبة فى ملابس (بلياتشو » فضج الفتيات بالضحك . فراحت ترقص حاجبيها ، ثم قامت ببعض ألعاب بهلوانية . وقفزت إلى أعلى ، فإذا بها ترتفع حتى وصلت إلى سقف الغرفة ، كان فى

وسطها حبل متصل ببكرة حديد قرب السقف ، فلما قفزت جذب بعض زميلاتها المختفيات خلف المسرح طرف الحبل الآخر .

وبقيت متعلقة في الهواء ، وتحرك ساقيها وذراعيها في حركات مضحكة ، بين ضجيج المدعوين وضحكهم .

وأغلقت الستارة ، ودوى التصفيق ، ففتحت الستارة ثانيا ، وأرخى الفتيات المختفيات خلف المسرح الحبل قليلا ، ثم جذبته ثانية فبدت الفتاة كأنها تنحنى للمصفقين ردا على تحيتهم ثم تنتصب قائمة .

وسرى فى القاعة همهمة ، بعد انتهاء ذلك المشهد ، وارتفعت الضوضاء ، وإذا بدقات متتابعة على خشبة المسرح تعلن بدء المشهد التالى ، وفتحت الستارة وانبعثت من الفونوغراف موسيقى راقصة ، وظهرت على المسرح فتيات فى ثياب قصيرة بيضاء فبدت سيقانهن وأفخاذهن ، ورحن برقصن على الأنغام ، وحملقت الأم فيهن وهن يتايلن ، كانت تبحث بعيونها عن نبيلة وهى مبهورة النفس ، وفى وجهها قلق وضيق .

ودخلت نبيلة المسرح وحدها تسير على أطراف أصابع قدميها لتتقدم المجموعة ، كانت فى ثوب وردى قصير غاية القصر ، وكان صدرها عاريا ، ولا يستر ساقيها وفخذيها إلا جورب أبيض قصير ، وطرف الثوب الذى كان على شكل دائرة .

وشهقت أمها في صوت خافت :

__ يادى الفضيحه!

ولم يلتفت أحد إلى اعتراضها ، كان شفيق يرمقها في إعجاب ، وقد فغز فاه ، وراح جلال يرقب الرقصة في شغف أما أحلام فقد راحت تهز رأسها في نشوة .

وتحركت الأم في مقعدها في ضيق ، وقالت :

_ ليه نبيله تعمل كده ؟

فقال شفيق في نبرات حالمة:

__ مدهشه .

وتألق ضوء خاطف ، وقالت الأم في فزع :

ــ صورها! تبقى نايبه لو نشر صورتها في مجله وهي بالشكل ده .

مش ح تتجوز أبدا ، قوم يا جلال هات الصوره منه .. دى فضيحه .. ح يضيع مستقبل البنت ، مش ح تتجوز أبدا .

فقال شفيق ، وهو يحملق في نبيلة ويتبعها بعينيه :

_ اطمني ما تخافيش ، أنا هنا .

وحسبت الأم أن شفيقا يعدها بأنه سيستولى على الصورة ويمنع نشرها ، فقالت له :

ــ ربنا يسترك .

وانتهت الرقصة ، وأقفلت الستارة ، وأقبلت المدرسات على الأم يصافحنها ويهنئنها :

ـــ مبروك .. يا سلام على نبيلة . كانت مدهشة .

وراحت الأم تحملق فيهن وهي في حيرة من أمرها ، وجاءت نبيلة

بملابس الرقص ، والفتيات يرمقنها في حسد ، ويقلن :

_ إيه ده كله ؟ .

وابتسمت في زهو ، ولحتها أمها فصاحت فيها :

ـــ وجابه عريانه ؟ مش مكسوفه ؟ ياللا ع البيت ياللا .

وخف إليها شفيق وقال لها وهو يصافحها :

_ مدهشه .. جنان .

فقالت الأم في ضيق:

_ صحيح جنان ، واللي يطاوعكوا يستاهل أكثر من كده . · والتفت شفيق إلى الأم وقال لها :

_ إنت زعلانه ؟

__ أمال عايزين أفرح ؟

_ إيه اللي مزعلك .

_ عاجبك كده ؟ عاجبك واقفتها عريانه ؟!

والتفتت إلى نبيلة وقالت في عزم :

ــ نبيلة . . روحي البسي هدومك وياللاع البيت .

وانسحبت نبيلة ، وقالت أحلام لأمها :

_ مش ح نقعد لآخر الحفلة ؟!

· فقالت الأم:

_ ع البيت على طول . يا نيبتى لو طلعت الصوره فى الجرانين ح يتوقف حالها . مش ح تتجوز أبدا .، مين اللي يرضى يتجوز واحده

عريانه بالشكل ده ؟

فقال شفيق وهو يبتسم:

_ ما قلت لك اطمني أنا هنا .

وفهم جلال وأحلام ما يرمى إليه فابتسما ، أما الأم فلم تفهم قصده ، وقالت في ضيق :

ـــما قلت لى اطمني قبل كده ، ولا جبت الصوره ولا حاجه ، وأهو المصوراتي داير يصور في البنات ، أروح أنا اجيبها منه ؟

وتيقن شفيق أنها لم تفهم غرضه ، وأراد أن يرضيها فقال لها :

ـــ أنا رايح للمصوراتي أجيب الفيلم منه .

وذهب إلى الرجل واتفق معه أن يبعث إليه بصورة نبيلة في حجم كبير ، والصورة السلبية ، وأعطاه عنوانه ودفع له القيمة مقدما .

وأقبلت نبيلة بعد أن استبدلت ثيابها ، وما إن رأتها أمها حتى قالت لها :

- ع البيت قدامي .

وسارت نبيلة وشفيق وأحلام وجلال وانطلقت الأم خلفهم وهي تغمغم :

دا مجنون اللي يسيب بناته على حل شعرهم .. قال على رأى المثل : « كنا في جره وطلعنا بره » .

الفصل الرابع عشر

استيقظ الأولاد مبكرين ، وراحوا يغدون ويروحون في الردهة مسرعين ، هذا يخلع ثيابه ليرتدى ثياب الخروج ، وذاك يمشط شعره وهو يدور بعينيه في المكان ويقول :

_ أمال الجزمه فين ؟

وذهبت نبيلة إلى الساعة ونظرت فيها ، ثم اتجهت إلى غرفة أبويها وطرقت الباب في رفق وهي تقول :

_ اصحوا بقى ما فيش وقت ، زمان شفيق جاى .

وقالت الأم من الداخل وهي راقدة في فراشها :

_ افتحى و خدى هاله لبسيها .

وفتحت نبيلة واتجهت إلى سرير هالة وحملتها وقالت لها مداعبة :

_ تعالى يا ستى عشان تروحى العزبه ، ياللي عمرك ما شفتى عزبه .

فقالت لها أمها:

_ يعنى انتى اللي شفتيها ؟ َ

_ طبعا شفتها .

_ شفتيها فين بقى ؟ .

__ في السينها.

وغادرت نبيلة الغرفة وقال الزوج :

ــ يا للا ما فيش وقت يا دوب تلبسي .

ونهضت وهي تتمطى ، وتركت الغرفة ، فألفت أحلام قد انتهت من عاطف ، وبدأت في تمشيط شعر سوسن ، فقالت :

ـــ ما فيش خروج قبل الشقة ما تتنضف . سامعين ؟

فقال مراد:

ــ أنا ح اكنس الأوده المفروشه ..

وقال سامي :

_ وأنا ح امسح المطبخ .

وقالت الأم:

ـــ وانتی یا نبیلة املی القلل وحطی هدوم هاله فی شنطتها ، وما تنسیش تاخدی هدوم لعاطف ومراد .

فقالت نبيلة وهي تبدل ثياب هالة:

_ حاضر .

ودلفت الأم إلى الحمام وهي مسرورة ، لم تسمع اعتراضا ، و لم تر تذمرا ، كانوا جميعا سامعين مطيعين .

وذهب عاطف إلى أبيه وهو يحمل كلبه ، وقال له :

_ يا بابا احنا رايحين العزبه ؟

ـــ أيوه .

ــ و ح ناخد سوزي معانا العزبه ؟ .

- _ الا يا بابا العزبه يعني إيه ؟
- وحك الأب رأسه يظفره ، وشرد يفكر برهة ثم قال :
 - _ العزبه يعنى بيت كبير حواليه غيطان .
 - _ غيطان يعني إيه يا بابا ؟
- __ يعنى جنينه واسعه تزرع كوسه وكرنب وبرتقال وموز وكل الخصار والفاكهه اللي بتاكلها .
 - . [_
 - فقال الأب وهو يعبث في رأسه في حنان :
 - _ عايز حاجه تاني ؟!
 - __ أيوه . عايز قرش .
- ومد الأب يده في جيب البنطلون وناوله قرشا ، فأطبق عاطف يده عليه وقال :
 - _ وسوزى عايز يضيع .
 - و دفعه أبوه في رفق يخرجه من الغرفة وهو يقول له:
 - __ بره یا بکاش .
- وخرج عاطف من الغرفة وهو يضحك ضحكة تتم عن مكر ودهاء ، وعادت الأم ، فقال لها حسين :
 - _ شهلي شويه ما فيش وقت ..
 - _ دنا ح البس قبلك .

(أم العروسة)

ووقفت تفكر برهة ، ثم قالت له :

__ قل لي ألبس إيه ؟

فقال وهو يطوح ذراعه في حنق:

__ أوه . إنت لسه ما فكرتيش ح تلبسي إيه ؟ يبقى مش ح نخرج قبل الضهر . البسي أي حاجه ، انتي رايحه فين يعني !

وفتحت الصوان وراحت تقلب ثيابها لتختار منها ما ترتديه ، وهي تقول :

_ أنا عارفه أتومبيل إيه ده اللي ح يساعنا كلنا! .

وأقبلت نبيلة تحمل هالة ، وجاءت أحلام وقد تأهبت للخروج ونظرتا ثم قالتا معا :

_ لسه ما لبستيش يا ماما!

ــ ناولونی الجزمه .

ــ حاضر .

_ طلعي لي يا أحلام الشراب الأسود .

ــ حاضر .

ــ جهزتی شنطة هاله یا نبیله ؟

_ جهزتها . فيه حاجه تانيه ؟

وأثلجت تلك الطاعة صدر الأم ، فتمنت أن يصبح ذلك حالهم على الدوام ، وشاءت أن تنعم بتلك الطاعة الطارئة فقالت :

ـــ روحي يا نبيله شوفي مراد مسح جزمته وخد مناديل نضيفه واللا

عمل إيه ؟

__ حاضر .

وتحركت نبيلة ، وذهبت أحلام وسوسن وعاطف إلى الشرفه ليرقبوا الطريق .

وقالت الأم:

ـــ عینی بارده ع الأولاد النهارده ، إیه اللی جری لهم ، متشطرین من بدری و كل ما نقول لهم حاجه ، يقولوا حاضر .

_ مش فاضيين للزعيق والخناق ، عايزين يخلصوا . نفسهم يغمضوا ويفتحوا يلاقوا نفسهم في العزبه .

_ أنا عارفه ما كانش لك عزبه ليه .

_ الحمد لله على كده .

وسمع نداء كلاكس سيارة ، وإذا بأحلام وسوسن وعاطف يقبلون مهرولين يتصايحون ، وبلغت أحلام غرفة والديها فقالت :

_ جلال جاب عربيه وشفيق بعربيته .

فقالت الأم في راحة:

_ أيوه كده ، مش كناح نندس في عربية زى علبة السردين ! ووقف جميع الأولاد على باب الغرفة يحثون أمهم على الإسراع :

_ ياللا يا ماما ياللا يا ماما .

_ انزلوا انتو وأنا محصلاكو .

وقال الأب :

... سوسن ومراد ونبيلة وماما يركبوا مع شفيق . وأحلام وسامي وعاطف وأنا تركب مع جلال .

وانطلق الأولاد يعدون في مرح ، وقال عاطف لسامي :

_ خد سوزی .

_ أنا مالى .

وتناولت أحلام يد عاطف ، وحملت الكلب وانطلقت وكل حالجة فيها تنطق بالغبطة والسرور .

وخلت الشقة إلا من الزوجين ، والتفتت زينب إلى زوجها وهي في طريقها للهبوط وقالت :

- ــ يا راجل ليه تفرق بينا ، كنا ركبنا سوا في عربيه واحده .
 - _ كل واحد منا ف عربيه عشان ناخد بالنا م العيال .

فقالت في دلال:

ــ قول إنك زهقت مني .

فلف ذراعه حول ظهرها ، وضغط على كتفها البعيدة بيده في حب وقال :

- ـــ مش معقول .. تصدق . متهیألی اننا متجوزین من کام شهر بس .
 - ــ والأولاد دول كلهم .
 - _ أنا عارف جم إمتى ؟

وهبطا إلى الطريق ، فخف إليهما جلال وشفيق وراحا يصافحانهما

ونظر الأب فألفى أحلاما قد جلست في المقعد الأمامي في العربة الأولى " ونبيلة قد جلست في المقعد الأمامي في عربة شفيق " وقد أعطت هالة لسوسن ، فقال :

ــ مراد يركب قدام جنب نبيله .

وقفز مراد فى مثل لمح البصر من المقعد الخلفى إلى المقعد الأمامى ، فأفسحت له نبيلة مكانا إلى جوارها ، وإن كانت ملامحها تنطق بعدم رضاها .

وقال الأب لسامي ، قبل أن يهم بالصعود إلى السيارة :

_ سامى . عد اخواتك .

فراح سامي يعدهم ثم قال:

_ سته والكلب .

فقال الأب في إنكار:

ــ سته إزاى ! يبقوا ناقصين واحد عدهم تاني .

فراح سامي يعدهم مرة أخرى وقال:

_ برضه سته والكلب .

وأخذ الأب في عدهم وهو يشير بأصبعه إلى كل منهم ، فلما أشار إلى سامي فغر فاه ، فقد عرف خطأ نفسه ، وقال الأب :

ــ مش عارف تعدهم ؟! سبعه والكلب .

... آه . أصلي نسيت أعد نفسي .

وقال الأب:

_ مش ناسيين حاجه قبل ما نمشى ؟

وقال الجميع:

_ مش ناسيين حاجه ياللا بقى .

وركب الجميع ، وانطلقت السيارتان ، حتى إذا بلغتا محطة بنزين عرجتا للتزود بالوقود وأطلت سوسن من نافذة السيارة وقالت :

ــ بابا .. بابا . أنا ما خدتش قرش . خليه معاك لما نوصل .

وقال عاطف وهو يعطى الكلب لأبيه:

_ بابا . خد سوزی شویه .

__ حاضر ..

والتفتت أحلام إلى أبيها وقالت :

_ بابا ما قلتليش . لما فت ع الصايغ قال لك إيه ؟

_ قال بعد بكره ح يسلمنا كل حاجه .

وقرعت « بابا » المتناثرة من السيارتين أذن عامل المحطة فاقترب من النافذة الجالس عندها حسين وقال له :

_ اسم النبي حارسهم كلهم ولادك ؟

فقال له حسين وهو يبتسم:

_ أيوه .. والباقي سبتهم في البيت .

فقال له الرجل في رثاء:

_ الله يكون في عونك . دنا عندى تلاته عقلي ح يشت .

فقال له حسين في بساطة:

ــ تلاته يبقوا صعب ، لكن لما ييزيدوا عن كده آمرهم يبهون . واستأنفت السيارتان رحلتهما ، كان شفيق فى المقدمة وجلال خلفه ، وكان السكون مسيطرا على سيارة جلال ، الأب جالس يعبث فى شعر الكلب وعاطف واقف ينظر من زجاج السيارة الخلفى يشاهد الحقول والترع والأشجار الممتدة على جانبى الطريق وهو مأخوذ .

كانت أول مرة يشاهد فيها ذلك الفضاء العريض. ووضعت أحلام رأسها على حافة المسند وشردت ببصرها ، وهامت في عالم من الأحلام ، كانت السعادة تغمرها ما دامت بالقرب من جلال .

وضاق سامي بذلك الصمت ، فقال:

- _ تعرف العزبه يا جلال ؟
 - _ طبعا .
- _ طب ياللا نطلع من شفيق .

وزادت سرعة السيارة ، وانحرفت إلى اليسار قليلا . واستمرت في تقدمها حتى أصبحت في محاذاة سيارة شفيق فصاح سامي في نشوة :

_ هيه .

وشاركته أحلام في صياحه ، ثم التفت عاطف وشاركهما في التهليل ونظر الأب فألفى الأم ناحيته لم يكن يفصل بينهما إلا لوحا زجاح السيارتين ، فأخرج لسانه لزوجته ، وانسابت السيارة حتى أصبحت في المقدمة .

وضايق ذلك ركاب السيارة الأخرى ، فقال مراد :

__ ياللا نسبقهم .

وقالت نبيلة:

__ ياللا يا شفيق .

و لم تعترض الأم ، كانت تفكر في طريقة ترد بها على مداعبة حسين .
واندفعت السيارة في عدوها تنهب الأرض ، ومرق شفيق بمهارة من
جوار سيارة جلال ، ونبيلة ومراد وسوسن يتصايحون مسرورين أما الأم
فقد وضعت إبهامها على أنفها وراحت تحرك أصابعها في الهواء زراية
وسخرية .

وانسابت السيارتان في طريق زراعي ضيق ، الحقول الخضر مترامية عن يمينه ، قامت بيوت متواضعة من طين ، وامتدت الترعة عن يساره ، تتدفق بالأمل والحياة . وأحست الدواجن والطيور التي كانت تمشى في تؤدة واطمئنان على شاطئ الترعة إقبال السيارتين ، فراحت تسفسح الطريق ناشرة أجنحتها وقد ارتفعت صيحات الأوز ، حتى كادت تغطى على صوت السيارة .

ونظرت الأم ، فلمحت فلاحا مقبلا على ظهر حماره ، يسير في عرض الطريق ، فقالت :

_ حاسب يا شفيق الحمار .

والتفتت سوسن ، وراحت ترقب الحمار في انتباه ، ثم قالت :

ــ ماما . بابا بيقول لمراد يا حمار ليه ؟ دا الحمار كبير وبيمشي على إيديه ورجليه وله ديل وودان طويله !

ومد مراد يده وقبض على ذراعها وقال:

_ وبعدين معاكى ؟

و لم تأبه به ، بل قالت :

_ ماما .. نفسى أركب حمار .

فقال شفيق:

ــ دلوقت أركبك حمار . ادى احنا وصلنا .

ووقفت السيارة أمام باب كبير ، يتوسط سورا من اللبن ، مطلى بالجير ، وضغط شفيق فى الكلاكس ، وإذا بالباب يفتح وانطلق شفيق فى ممر بين الخضرة والأزهار والأشجار العالية ، وجلال فى أثره ، حتى بلغ سلالم الدار فوقف عندها .

وهبطت نبيلة والأم تحمل هالة ، وسوسن وعاطف ومراد وصعدوا في الدرج قليلا ، ثم وقفوا ينظرون إلى فناء الدار الواسع ، وفي وجوههم إعجاب . كانت الأشجار العالية كمردة حارسة على حوافه ، بينا غطت الحضرة المكان ، تتخلها ممرات نسقت تنسيقا بديعا ، ونبتت الورود والزهور في أحواض تحف بها خضرة أزهى من الخضرة التي تغطى المكان جميعا .

ووقفت سيارة جلال ، وهبطت أحلام ووالدها وسامي وعاطف يحمل كلبه ، وخف إليهم شفيق وقال :

_ حمدا الله ع السلامه .

وصعدوا بضع درجات ونظر الأب وقال:

_ حاجه جميله .

فقال جلال وهو ينظر إلى شفيق :

_ مهندس زراعی ، إن ما كنش يهندس بيته ، ح يهندس بيت مين ! وسار شفيق أمامهم وقال :

__ اتفضلوا .

وبلغوا ردهة تؤدى إلى بعض غرف ، وفي جانبها الأيسر درج يقود إلى الطبقة العليا وقال: \

___ اتفضلوا فوق استريحوا وانا وسامى وجلال وعاطف ح نستريح ونغير هدومنا هنا . وح نتقابل في الجنينه ثحت .

وصعدوا فى الدرج ، وقد ارتفعت الضوضاء ، سوسن تطلب ركوب الحمار وعاطف يقلدها ، ونبيلة تحث أحلام على الإسراع حتى لا يفوتهم التمتع باليوم كاملا . *

وبدلوا ثيابهم والتقوا في الحديقة ، وقد تركت الأم هالة مع خادم قروية ، وقال شفيق :

_ تعالوا أفرجكوا الجناين بتاعتنا .

وغادروا الدار ، وانطلقوا فى حقول الفواكه ، وراحت نبيلة تملأ رئتيها بالهواء ، وشفيق يسترق النظر إليها ، وسار جلال إلى جوار أحلام وقد أمسك يده فى يدها ، وراح سامى ومراد يعدوان ، وعاطف وسوسن يجريان فى أثرهما .

وقال جلال:

ـــ إيه رأيك نمضى شهر العسل هنا ؟

وقالت نبيلة :

_ ياريت يا أحلام ، دى جنه .

وقال شفيق :

ــ اتفضلوا . العزبه واللي فيها وصاحبها تحت أمركم .

والتقت عيناه بعيني نبيلة ، فأحست أن حديثه لها ، فتفتحت نفسها ومست أو تار قلبها يد حنونة ، راحت تعزف أنشودة الحب الخالدة .

وبلغوا حديقة المانجو . فوقف الجميع ينظرون فاغرى الأفواه . حتى الأب سال لعابه ، ومد شفيق يده وقطف واحدة ، وقال :

ـــ دوقوا مانجتنا ، مانجه حلوه .

وهجم الجميع على المانجو ، وغاصت أقدامهم فى الطين ، ولكنهم لم يحفلوا بذلك ، وامتدت الأيدى ، وقطفت الثمر المتدلى ، وتلوثت الأكف والوجنات والذقون وراح عاطف يمسح يديه فى صدره ، ونهرته أمه ، واعتبر مراد فلم يمد يديه إلى ثيابه ، بل راح يمسحها فى ورقة من أوراق الشجر ، فاختلط عصير المانجو بالتراب : ومرر يده على فمه وذقنه و خديه ، فإذا بوجهه يتلوث بالطين ، ولمحته نبيلة ، فراحت تضحك وهى تشير إليه بأصبعها ، وسدد الجميع إليه نظراتهم ثم انفجروا ضاحكين :

واستمروا في تجوالهم ، وفي عودتهم إلى الدار مروا بالحظيرة ، فألفوا حصانين وبعض أبقار ، وراح شفيق يمرر يده على رقبة الحصان وقال

سامي لأبيه:

_ مره يا بابا حكيت لنا إنك ركبت حصان فى الهرم وسبقت بيه أتومبيل . الحصان اهه ، ورينا يا بابا بتركبه إزاى ؟

والتف الأولاد جميعا حول أبيهم وقالوا:

_ والنبي يا بابا عايزين نشوفك وانت راكب الحصان .

واتسعت عينا الأب ، وبلع ريقه ونظر إلى زوجته يتوسل إليها أن تنقذه ، ولكنها أعرضت عنه ، فلم ير مفرا من التهرب والتماس المعاذير ، فقال :

_ مش دلوقت . تعبنا م المشي .

فقال سامى:

_ والعصر يا بابا بعد ما تستريح ح نخضر لك الحصان .

وقالت سوسن لشفيق:

_ عايزه أركب الحمار.

ـــ حاضر .

وأمر خادمه أن يحضر حمارين .

وعادوا إلى فناء الدار وجلسوا على كراسى خيزران صفت فوق الحشيش ، وجيء بالحمارين ، فهرع مراد وسوسن وعاطف إليهما ، وركب مراد حمارا ، وركب عاطف وسوسن الحمار الآخر ، وقال الأب :

_ طالع فوق شويه أستريح .

وقالت الأم:

ـــ لما اطلع أنم هاله .

وانصرف الوالدان ، وذهب شفيق وأحضر فونوغرافا ، وجلس على الحشيش ، فترك جلال وأحلام ونبيلة وسامى كراسيهم وجلسوا على الأرض .

وانبعثت الموسيقي ، كانت نفس الموسيقي الراقصة التي انسابت يوم حفلة المدرسة و رقصت عليها نبيلة .

ونظر شفيق إلى نبيلة وقد توجت فمه بسمة ، فأطرقت نبيلة حياء ، وقال جلال :

ــ ياللا يا نبيله .

فأدارت وجهها ، وقالت :

ــلا .

وقالت أحلام :

ــ وش كسوف قوى . ياللا .

وقالت لشفيق :

ــ دور الاسطوانه م الأول .

ونهضت نبیلة ، وبدأت فی الرقص ، وتعلقت عینا شفیق بها ، وراح يمرر لسانه على شفتيه .

وانتهت نبيلة من رقصتها ، وارتمت على الأرض ، وشفيق يتفرس فيها . ونهض جلال وجذب أحلام من يدها : وقال وهو ينظر إلى

الحمارين:

ـــ تعالى ناخد لنا دور .

وقامت أحلام ، ونهض سامي وقال :

_ وانا جای آخذ دور کان .

وهبط مراد عن ظهر الحمار ، وراح جلال يعاون أحلام على امتطائه ، وهي تميل على صدره وتضحك ، حتى إذا ما استوت على ظهره وأمسكت باللجام الكزه في بطنه فهرول وأحلام تصيح وتضحك وتطلب النجدة .

وركب جلال الحمار الآخر وراح يعدو فى أثرها ، ويضرب حمارها وهى تتوسل إليه أن يكف . وانطلق مراد وسوسن وعاطف يجرون خلفهم ، بينا وقف سامى يرصد أحلام وينتظر عودتها ليأخذ الحمار منها .

وبقى شفيق ونبيلة وحدهما على الأرض ، راحا يتبادلان النظرات ويتناجيان بأرق حديث وأعذبه وإن لم تنفرج لأحدهما شفة . كانا يتحدثان حديث روح لروح ، وقلب لقلب .

ومر الوقت ، وجاء العصر ، فإذا بشفيق قد أقبل يقود الحصان من لجامه ، وقد أسرجه ، ونبيلة تسير إلى جواره وأحلام وجلال والأولاد جميعا خلفه ، وقد اتسخت ثيابهم ، وكان مراد أكثرهم قذارة .

ووقف شفيق عند درج الدار ، وصعد مراد وسامي يهرولان ، حتى إذا بلغا الغرفة التي بها والداهما قال سامي لأبيه :

ــ بابا الحصان جاهز تحت .

ونظر الأب من النافذة ، ورأى الحصان يهز ذيله ويضرب الأرض بحافره ، ويصهل ، فعاد وهو يمرر يده على بطنه ويقول :

- بطنی ح تطق ، کلنا کتیر ع الغدا . مش قادر اتحرك ، بلاش النهارده ، مره تانیه .

وأرادت زوجته أن تداعبه ، فقالت له :

ـ يا راجل انزل اركب شويه .

ورمقها في عتاب ، ثم اتجه إلى السرير وتمدد فيه وقال :

- مش قادر اتحرك النهارده . مره ثانيه .

ویئس ابناه منه ، فغادراه وهبطا ، وانصرف السائس بالحصان ، وقال سامی :

ــ عايزين نلعب حاجه .

فقال مراد:

ــ نلعب الكوره .

فقالت نبيلة:

_ لأ . نلعب حاجه تانيه .

فقال شفيق:

ــ نلعب استغمایه .

وقال الجميع :

ـــ موافقون .

__ أيوه ، نلعب استغمايه .

وقال جلال:

__ مين الحفاء ؟ .

فقال مراد:

__ أنا .

وقال سامي : `

_ لأ:أنا .

وقال شفيق وجلال:

_ خلى سامى الحفاء .

وأغمض سامي عينيه ، وأخذ الجميع يتسللون ليختفوا منه ، وجرى مراد بعيدا ، وقالت أحلام لسوسن وعاطف همسا :

ـــ اطلعوا فوق استخبوا عند ماما .

وأطاعاها ، وصعدا في الدرج ، وذهب جلال وأحلام ليختفيا خلف الدار بينا خرج شفيق ونبيلة من الباب الكبير ، وصاح سامي :

_ خلاص ؟ .

وجاءه صوت شفيق من بعيد:

_ لسه .

ودلف شفيق ونبيلة إلى الحظيرة ، وصهل الحصان ، وأشار له شفيق أن يصمت وهو يقول :

ـــ هس ،

ووقف شفيق وإلى جواره نبيلة ، ومس شعرها خده ، وملاً عبيرها أنفه ، فانبثقت في أغواره مشاعر رقيقة ، واستشعر غيبوبة لذيذة تغلفه ، وحنانا طاغيا آمرا ، يستبد به فلا يستطيع أن يعصى أمره ، فمد يده وجذبها من يدها فاستدارت له ، وتألقت عيناه بالرغبة ، وضمها إليه وقبلها ، فنظرت إليه بعينين ترقرقت فيهما الدموع ، فقال لها في وجد :

_ تروحى الجامعه ، واللا تتجوزيني وتقعدى في البيت ؟
فقالت وهي هائمة في عالم بهيج من الأحلام :

_ لأ . البيت أحسن .

الفصل الخامس عشر

وضعت أحلام حقيبة كبيرة على سريرها ، وراحت تصف فيها ملابسها الداخلية والمنزلية ، وأخذت نبيلة تعاونها ، فأخرجت من الصوان بعض قمصان النوم والقطع الدقيقة التي تفتق ذهن صانعي الجمال عنها ، لرفع الثديين ، وبعض القطع الصغيرة من الثياب ، التي تسدل القمصان فوقها ، ولمحتها أحلام وهي ترفع رأسها عن الحقيبة ، فقالت لها :

- ــ خلى الهدوم دى عندك .
 - ــ ليه ؟.
- ـــ مش ح اخدها دلوقت . ح البسها في الخمس أيام اللي فاضلين لي ا
 - ــ خديهم معاكي بالمرة ، وابقى البسى من هدومي .
 - فقالت أحلام وهي تحاول أن تغلق الحقيبة:
 - يمكن أسيبهم هنا على طول ، أبقى ألبسهم لما آجى أزوركم فقالت نبيلة وهي تعيد الثياب مكانها :
 - عدمت ببیند و هی مسمار جحا ! _ خلیهم زی مسمار جحا !
 - وارتفع صوت سوسن:

__ ماما .. ماما .. الحقى . عاطف غرق هدومه ميه وهو بيحمى سوزى .

فصاحت الأم من غرفتها:

_ عاطف ، اقفل الحنفيه دي ، واخرج من عندك .

وصاح عاطف:

_ سوزى اتمرغ في الوحل باحميه .

_ اخرج من الحمام أحسن إن قمت لك ح اقصف رقبتك .

وخرج عاطف من الحمام ، وقد ابتلت ملابسه ، وهو يحمل سوزى ويضمه إلى صدره ، والماء يتقاطر من جسمه ، ولمحته أمه فهرعت إليه وهي تصيح :

_ هو انتو قرود .. دوختونی .

وجذبته من يده وقالت وهي تذهب به إلى غُرُفَّته :ّ

_ تعال غير هدومك اللي بتلق دى .. ح تعيى وتموت .

فقال وهو يهز كتفيه في زراية :

_ بتضحكي على ، مش ح اموت . الصغيرين ما يموتوش .

_ مين اللي قال لك كده ؟

_ مراد .

وأطلت نبيلة برأسها وضحكت ، ثم دارت على عقبيها ونظرت فألفت أحلام تديم النظر إلى سريرها وقد شردت في تفكير ، فرمقتها في صمت ، أحست ما يعتمل في صدر أختها من مشاعر ، وفطنت أحلام

إلى وقفة نبيلة ، فالتفتت إليها وقالت وهي تقبض بيدها على السرير : __ أول سرير اتنصب هنا أول سرير ح يتفك .

فخطت نبيلة خطوة حتى لمست كتفها كتف أختها وقالت :

_ مش ح يتفك أبدا ، ح يفضل منصوب على طول ، لما تجينا تبقى تريحي فيه ، وبكره هاله تكبر وتنام فيه .

ولفت نبيلة يدها حول كتف أختها وقالت :

__ ح توحشينا .

ونظرت أحلام إلى أختها وقد اغرورقت عيناها بالدموع .

وخرج سامى من غرفته وفى يده كرفاتة يقلبها فى زراية ، وقد لوى شفته السفلى ، وانطلق إلى غرفة أبيه ، فوجد أباه مطرقا فى صمت، فلم يحترم خلوته ، وقال :

__الكرافاته اللي جبتها لى مش حاجه .. مش ماشيه مع البدلة . عندك كرافته تبقى على بدلتي الجديدة شيك خالص .

فقال الأب في استسلام:

_ الكرافاتات كلها عندك ، خد اللي انت عايزه .

وعادت الأم ، ورأت سامي يقلب في كرافتات أبيه ، فقالت له :

_ انت مش ح تبطل الطمع ده ، ياللا بره بلاش دلع .

و لم يحفل بها ، أخذ الكرافتة التي يريدها ووضعها على كتفه ، وخرج في تؤده ، وقد صم أذنيه عند تأنيب أمه .

ورمقت الأم زوجها ، فإذا به صامت ، فقالت له :



تعبت . ادينت ومابقاش معايا حاجه أبدا

- _ مالك سرحان النهارده ؟.
- _ تعبت . ادينت وما بقاش معايا حاجه أبدا .
- ـــ الحمد لله البنت اتجهزت . وكلها يومين وتتستر ، وبعدها يعدلها ربنا .
 - _ اتزنقت قوى .
- __ برضه انت اللى زنقت روحك . لو خليته يجيب المشمع والنجف والنملية وأدوات المطبخ وملة السرير زى الناس كلها ما بتعمل ، ما كنتش ازنقت كده .
 - _ دى كلها حاجات فارغه .
 - ـــ أهو برضه كان تمنها نفع دلوقتي .
 - ورفع بصره إليها وقال :
- _ اسمعى يا زينب ، عايزين نلم نفسنا ، نكتب الكتاب ع الضيق لو اتفنجرنا ح نتفضح .
 - ـــ وأنا ليه مين يا حسره ، ح اقتصر ع العيلة وبس .
 - ـــ والعريس لأ ؟
- _ العريس إذا كان ح يعزم يعزم على بيته .. ما قلتليش اتفقت على إيه مع ابوه ؟.
- _ ح ييجوا بعد صلاة العشا يكتبوا الكتاب ، وبعدها ياحد العريس عروسته ويمشى .
 - _ كله بيتقضى ، كلها كام يوم ونفوق على طول .



- والنبى خروف يا بابا .

ورن الجرس ونینا متصلا ، فخفت سوسن تفتح الباب ، فقرع أذنيها صَوت خروف ، فإذا بها تعود مهرولة وهي تصيح :

ــ ماما .. ماما . إلحقي . خروف .

وقال الأب في تساؤل:

_ خروف إيه يا بت ؟

ـــ والنبي خروف يا بابا .

أسرع سامى وعاطف وأحلام ونبيلة إلى الباب وقامت الأم وخرج الأب خلفها ، وقد اختفت خلفه سوسن ، وفتح الباب ، وإذا بأربعة ديوك رومى تتدفق فى كبرياء ، وفى أثرها خروف سمين يدفعه مراد .

وقفز سوزى من يد عاطف ، وراح ينبح ، وأسرع عاطف يقبض على ديك ، بينا صرخت سوسن رعبا من الخروف . وارتفعت أصوات سامى وأحلام ونبيلة ، فأصبحت الشقة أشبه بحمام عام قطعت عنه المياه .

وصاح الأب في ضيق:

__ بس بقى . إيه الزيطه دى ؟!

وخفتت الأصوات ، وقال الأب لمراد :

ـــ إيه ده ؟.

فقال مراد وهو يدفع الخروف:

ــ شفيق بعتهم .

_ إيش عرفك ؟

....الراجل اللي جابهم واقف تحت ، كان معاه الاسم والعنوان ، وقال إن سي شفيق اللي باعتهم .

وقال الأب في مرارة:

ــ وليه بعتهم بس ؟

فقالت نبيلة في زهو:

ــ بعتهم هدية يا بابا .

وقالت الأم .

ــ طب ياللا طلعوهم ع السطح .

وأخذ الأولاد يدفعون الخروف أمامهم ، وسوزى ينبح ، وراح سامي يهش الديوك لتشق طريقها حلف الخروف .

و قالت الأم للأب:

_ مش ح ندى الراجل حاجه ؟.

وتحرك الأب نحو غرفته ، وقالت الأم لسوسن .

ــ تعالى يا سوسن إدى الفلوس دى للراجل اللي واقف تحت .

ومد الأب يده في جيب جاكتته المعلقة في المشجب ، وأخرج ريالا أعطاه سوسن فانطلقت تعدو ، ورفعت الأم بصرها وقالت وهي تصيخ السمع :

ـــ لو فيه مكان واسع في الشقة كنت خلتهم فيها ، يا خوفي لحرامي يسرقهم .

فقال حسين وهو يرفع أكف الضراعة :

- _ ياريت !.
- ــ ليه بس ؟.
- ــ كنت استريحت م الفتحة اللي ح تتفتح عليه دي .
 - ــ فتحة إيه ؟
 - ـــ الخروف والديوك دى مش عايزه طباخ ؟!
- ۔۔۔ مش فیہ ناس م العیلہ ح بیجوا من أول النہار ، أهو الطباخ بغدیهم ، واللا مین کان ح یغدیهم ؟
 - ــ كنا ح نطبخ لهم حلتين .
 - ــ أهو الطباخ ح يطبخ لهم الحلتين دول :
 - ـــ والطباخ يعوز فراش .
- مش كنا ح نجيب كرسيين للناس يقعدوا عليهم . إيه اللي ح يزيد علينا ؟
 - فقال الرجل وهو يهز رأسه أسفا :
 - ــ جت رجلي وخلاض .
 - فدنت منه وقالت مواسية :
 - ــ ربنا يخليك لهم ، وتفرحهم ، هم لهم مين غيرك ؟
 - فقال الرجل في استسلام:
 - ـــ لو كان فيه معلهش ، إنما ما فيش خالص ، الفلوس كلها طارت .
 - كله يدبر .
 - وعادت سوسن ، فقالت الأم :

- ـــ إديتي الفلوس للراجل ؟
 - ـــ أيوه .
 - _ وقال لك إيه ؟
- ــ قال لى : قولى لام العروسه : مبروك .

وأشرق وجه الأم ، ورمقها زوجها من طرف عينه ، فانبسطت تجعدات جبهته ، و لم تنفرج شفتاه .

وعادت الضوضاء إلى الشقة ، ارتفع صوت نبيلة وسامى ، قالت نبيلة :

- ــ إنت مالك ما تسيبه .
- ـــ أسيبه ازاى لما يتغور ؟
 - وقالت الأم:
 - __ فيه إيه ؟
 - فقال سامي :
- ـــ عاطف مش عايز ينزل . قاعد جنب الخروف فوق .
 - ـــ سيبه .
 - وساء سامي أن يهزم ، فقال :
 - ــ ح يموت الديوك .
 - فقالت الأم:
 - _ ما لكش دعوه بيه ، وريح نفسك انت .
- وانسابت نبيلة على أطراف أصابع قدميها وهي ترنو إلى سامي من فوق

كتفيها ، ولمحت الأم الشرر في عيني سامي ، فقالت له :

_ عايز تغيظها ، ما تسألش عنها .

ونهض الأب ليرتدى ثيابه ، فقالت له الأم :

_ على فين ؟

__ أروح اشوف الطباخ والفراش .

__ وأناح اخرج مع أحلام نعزم العيلة .

وبلغ ذلك مسامع أحلام فقالت:

_ مش ح اقدر أخرج معاكى يا ماما عشان فايزه أخت جلال جايه تشوف الجزمه اللي ح البسها ليلة الفرح تشترى زيها .

_ فايزه جايه ؟ والله احنا ما فينا خير ، اللي ما سألنا عنها ، ويوم ما رحنا العزبه اللي ما قلنا لها تيجي .

فقالت نبيلة:

_ إحنا كنا معزومين ح نعزم غيرنا ! إذا كان جلال عايز يجيبها كان جابها معاه .

فقال سامي وهو ينظر إلى أحلام:

_ هو جلال فاضي لها ؟

ورمقته أحلام في شزر ، فاضطر إلى كبح جماح لسانه . ودار على عقبيه وانصرف وقالت الأم :

ـــ آخد نبيله معايه ، ياللا يا نبيله البسى ما تعطلنيش .

فضحكت نبيلة ضحكة طويلة ممدودة ، حتى إن عدواها قد سرت

إلى أحلام وسوسن . وقالت وهي تقلد أمها :

_ أنا اللي ح اعطلك ! قال على رأى المثل : لو الجمل حس بصنمه .. فقالت الأم في عصبية :

_ ما باحبش اخرج معاكى يا بت انتى من لسانك الطويل .

* * *

وانطلق حسين إلى طباخ ورثه عن أبيه ، كان يقيم موائد أفراحهم وأطقم مآتمهم ، وانتقل موقده إلى أسطح بيوت الأسرة جميعها ، واحتل أفنية مدافنها ، وما كان في إعداد طعامه يفرق كثيرا بين ما يقدمه في الأفراح وفي الأتراح .

وحياه حسين وجلس ، وقال له :

_ عندى كتب كتاب أحلام يوم الخميس ، وعايزينك تيجي تطبخ

لنا حلتين ع الضيق .

فاعتدل الطباخ وقال:

_ إنت مش عازم حد أبدا ؟.

... يا دوب العيله ح تيجي وبس .

_ يبقى الكلام اللي بتقوله مش ح ينفع ، اسألني أنا ع العيله .

_ أنا عندى خروف وأربع ديوك رومى ، عشره .. خمستاشر ح يتغدوا والباقى للعشا . .

فضحك الطباخ وقال:

_ عشرة خمستاشر ؟! دول يدوب أهل البيت . الكلام ده مــا

ينفعش .

وأحضر ورقة وقلما وناولهما لحسين وقال:

_ أول ما نبدى نبدى بالمورد ، اللهم اجعله ورد ، اكتب يا سيدى عندك قزازة ماورد و ٢٠٠ بيضة وعشرين وقة دقيق أمريكاني .

فقال حسين معترضا:

_ عشرين وقة دقيق أمريكاني ليه ؟ مش ناوى تشترى عيش ولا إيه ؟.

ـــ والنبى يا حسين بيه تكتب ، إياك يكفو الفطاير اللي ح نعملها . واستأنف إملاء ما يريد كأنما يقرأ في صفحة مكتوبة :

_ وقة شعرية ، سبع أقداح أرز ، ميت رطل لحمة عجالي .

. فقال حسين معترضا :

_ واللحمة العجالي ليه ؟ ما عندنا الخروف !

فقال الطباخ في بساطة:

- ح نعمل م الخروف كفتة والالحمه عصاج ؟ والنبى تكتب قبله وبعدين شوف اللي عايز تقوله إيه .. أربع مراوح ضانى و خمستاشر جوز حمام .. خد الحضار : عشرة ارطال كوسه صغيره للحشو . خمسة ارطال ورق عنب . خمسة ارطال فاصوليا خضره ، علبتين بسلة نشفه . خد عندك الحاجات دى عشان الحلويات : اتنين كيلو شيكولاطن كتل ، واتنين كيلو شيكولاطة مجروشة ، وتلت وقات كريز وخمس علب أناناس وخمس وقات موز ، وخمسه كيلو كريمه وعشر وقيات

فسدق ، وعشرين لمونه .

ورفع حسين القلم عن الورقه وقال:

_ ح تعمل إيه بالحاجات دى كلها ؟

_ طرطات وهريسه وخشاف وألمظيه ومهلبيه .

_ ما كفايه صنفين .

_ لو الحاجات دي كفت يبقى ستر من عند ربنا .

_ أنا مش عامل حاجه ومش عازم حد ، و ... و ...

_ والنبي تكتب قبل ما انسى .

_ لسه فيه كتابه ؟

_ عشرين رطل سمن ، والبصل والفلفل والملح .

_ الحاجات دى في البيت .

_ وحملين خشب رواجع ونص قنطار فحم وسلامتك .

ورفع حسين رأسه وقال:

__ خلاص خلصت ، اسمع يا سيدى . أنا مش ح اجيب إلا نص __ الحاجات دى .

_ يا ريت !.

ودنا من حسين وقال له كصديق يهمه مصلحته :

_ بقى نصرف المصاريف دى كلها ونيجى ع الآخر ونفضح

نفسنا ؟

فقال حسين وهو ينظر إلى الأرض:

_ بس الواحد ح يجيب منين ؟

_ كله برزقه .

أراد أن ينهي مهذا الحديث ، ويتحدث في موضوع آخر فقال:

ــ واتفقت ع الفراشة مع مين ؟

فقال حسين في استسلام:

_ والله لسه ما اتفقتش مع حد ، لكن ما فيش إلا عماره ، على قدنا وابن حلال .

فقال الطباخ:

- _ واهو الراجل بتاعنا برضه .. ح تروح له إمتى ؟
 - _ بكره .
 - _ وليه بكره ما تياللا نفوت عليه دلوقت .

وسارا يتحدثان حتى بلغا غزن فراشة الحاج عمارة ، وكان الحاج جالسا خلف مكتب وإلى جواره بعض المقاعد الخشبية ، بينا وضعت الكراسي المذهبة في صدر المخزن في عناية .

وقال حسين :

- _ السلام عليكم يا معلم عماره .
- _ وعليكم السلام حسين بيه . اتفضل .

وجلس حسين وجلس الطباخ ، ولم يشأ حسين أن يضيع وقتا ، فقال :

ــ يوم الخميس كتب كتاب بنتي ، عايزين كام كرسي .

فقال الطباخ .

ـــ الكلام ده ما ينفعش ، نقوم نشوف المكان اللي ح يتفرش أحسن . وقال المعلم عمارة :

_ أحسن .

ثم نهض وقام الطباخ وحسين وانطلقوا إلى الشقة . وراحوا يجوسون خلالها ويدخلون غرفها غرفة غرفة ، والفراش يقلب عينيه في الأثاث ويلوى شفته السفلي ، ولما انتهوا من طوافهم ، قال الفراش :

- العفش اللي في الشقة لازم يتكوم في أوده واحده ويسك عليها . فقال حسين في فزع :

ــ يتكوم في أوده واحده ؟ وليه كده ؟ !.

فقال الفراش :

ـــ لو فضل العفش ده ، الناس ح تقعد فين ؟ ح نفرش الأرض سجاجيد ونرص الكراسي في الأرض . نجيب كام كرسي مذهب ؟

فقال حسين:

ــ كفايه دسته .

فقال الطباخ:

ــ دسته تعمل إيه ؟ ع الأقل دستتين .

وقال حسين :

ـــ و لما ح تملا الأوض كلها كراسى ، الناس ح تاكل فين ؟ فقال الطباخ في بساطة :

(أم العروسة)

... ح نشد تركين قماش وننصب البوفيه في السطح .

وانتهت المناقشات ، وشد الطباخ والفراش على يد حسين ، وهما يقولان :

__ ربنا يتمم بخير .

وانصرفا وارتمى حسين على الأريكة في الردهة ، وقد شرد ببصره ثم راح يدلك جبهته ببطن كفه .

ورن الجرس ، وأسرعت أحلام تفتح الباب ، ودخلت الأم ونبيلة ، يلوح التعب في وجهيهما ولكن ما أن وقعت عينا الأم على أحلام ، حتى قالت :

_ فايزه عندك ؟

__ هو بابا جه ؟

ودخلت الأم . وجلست على الأريكة بجوار زوجها وقالت وهي تخلع حذاءها رحمة بقدمها :

_ خير . هه عملت إيه ؟

فقال في صوت خافت :

ــ خير .

وأحس أن نبرات صوته توحى بالضيق ، وخشى أن يتسبب فى انقباض صدر أهل بيته فى أيام فرحهم ، فتظاهر بالنشوة ، وقال لزوجه : __ هيه . عملتوا إيه ؟

- فقالت الأم:
- _ عزمنا الناس اللي حوالينا .
 - ــ عزمتوا كتير ؟
 - ـــ لا مش كتير.
 - فقالت نبيلة في استنكار:
- _ مش کتیر ؟ مش کتیر ازای ؟! بدا ما فیش بیت ما دخلناهش .
 - فالتفتت الأم إليها وقالت :
 - _ يا بت بلاش تهويل .
 - فقالت نبيلة وهي تتململ في وقفتها:
 - ــ لو رجلينا تعرف تتكلم . كانت حكت اللي جرى لها .
 - والتفتت إلى أبيها وقالت :
- _ تعرف یا بابا لو اللی عزمناهم کلهم جم ، ح یبقی الناس علی بعضهم .
 - فقالت الأم:
 - _ هو معقول كل اللي عزمناهم ح ييجوا .
 - فقالت نبيلة:
- ـــ هو معقول حد يتعزم ولا يجيش . والله اللي ح ييجوا أكتر م اللي عزمتيهم . يا ما ناس بتيجي من غير عزومه .

وقامت الأم وهي تقول:

ــ يا بت انتي هواله ، ما تبقيش تخرجي معايا أبدا .

وانصرفت الأم إلى غرفتها ونبيلة تقول:

_ بكره ح تشوف .

الفصل السادس عشر

وأشرقت شمس يوم الأربعاء ، اليوم السابق لليلة الخطيرة المرتقبة ليلة الزفاف ، فدبت الحياة في الشقة مبكرا ، استيقظت الأم وأحلام ونبيلة ، ورحن يرقبن عمال الفراش ، وهم يكدسون الأثاث في الردهة التي كانت معدة لا ستقبال الضيوف ، وأخذ سامي ومراد وسوسن يحملون الكراسي الخيزران على رءوسهم ، ويقومون بصفها في الغرف التي فرشت بسجاجيد الفراش الكبيرة الحمراء ، التي نمقت بزخارف عربية زرقاء وصفراء وبيضاء ، استوحيت من غصون الشجر والأوراق والأزهار .

وراح عاطف يقفز فوق الكراسى ، والكلب فى أثره ، يصعد إذا صعد ، ويهبط إذا هبط ، وجاء الأب يحمل هالة على ذراعه . ولم يكن منسبط الوجه ، كان يلوح عليه آى التفكير .

ورأى هبوط عاطف وصعوده وحركته الدائبة بين الكراسي ، فقال له :

_ إنت هنا بتعمل إيه ، اطلع السطح اتفرج . الطباخ ح يدبح الحروف .

والتفتت سوسن وأصاخت سمعها ، ه وضع مراد الكرسي الذي يحمله

والتفت ، بينا جلس سامى على أحد الكراسى المصفوفة ، وربع يديه فوق صدره العارى . كان يرتدى بنطلونه القصير الأبيض وحذاء أبيض من المطاط ، واشرأب بعنقه ينظر .

وذهب عاطف إلى أبيه وقال ، وعيناه تنان عن حبث :

_ عايزني أطلع السطح واتفرج على الخروف لما يدبح ؟

ــآه .

_ ها*ت قرش قب*له .

وأخرج الأب قرشا من جيب بنطلونه ، فالتقطه عاطف فى خفة الحدأة التى تلتقط حشايا طير مذبوح ملقاة فى خربة ، واقتربت سوسن من أبها وقالت :

ـــ بتجيب الفلوس منين ٰيا بابا ؟ .

وقفزت إلى ذهنه إجابات كثيرة ، ولكنها ما كانت تصلح إجابة عن سؤال طفلة لا تدرى ما الحياة وقسوتها ، أيقول لها من عرق الجبين الممتزج بتحمل سخافات رؤساء تافهين ؟ أيقول لها من الملق والرياء ؟ أيقول لها من كتم أنفاس صوت الضمير والسير في مواكب النفاق ؟ وشرد قليلا وقد از دحمت في رأسه صور معتمة بغيضة ، نكأت جرح نفسه ، وحركت أساه ، حتى إنه أحس مرارة في فمه ، ولكنه كبت مشاعره وقال :

ـــ من الحكومه .

وقالت سوسن :

__ والحكومه بتجيب الفلوس منين ؟

_ من الناس . اللي عنده دكان تاخد الحكومه من مكسبه ، واللي عنده بيت تاخد الحكومه من الأجره اللي بيلمها م السكان .

فقال مراد:

... الحمد الله لا عندنا بيت ولا دكان . مش ح تاخد مننا الحكومه حاجه .

وقال سامي :

_ یا ریت کان عندنا و کانت خدت .

وقالت سوسن:

_ مش الحكومه بتديك فلوس كتير قوى يا بابا ؟

و تجعدت جبهته ، ولاحت في وجهه مسحة من الحزن ، ورأى أن يئد ذلك الحديث الذي يخز روحه ويضنيه ، فقال :

_ مش ح تطلعوا تتفرجوا ع الخروف لما يدبح ؟

ورن صوته غريبا في أذنيه ، خيل إليه أن فيه نبرة أسى ساخرة تومئ إلى العلاقة بين ذبحه وذبح الخروف ، فوقف مشدوها برهة ، وقال سامى وهو ينهض :

_ يللاع السطح .

واندفع الأولاد يصيحون ، والكلب يجرى خلفهم ، والتفت عاطف وقال :

_ وهاله مش ح تتفرج ع الخروف لما يدبح ؟

فقالت الأب ساخرا:

_ هاله لسه صغيره ، لما تكبر ح تدبحه .

واختفى الأولاد عن عينيه ، ولكن أصواتهم كانت ترن في أذنيه عالية مدوية ، وضم هالة إلى صدره في حنان وقال يناجيها :

ـــ لما تكبرى ح تدبحى بابا ؟! ح تفلسيه كده ؟! لكن انت ذنبك إيه ، حد خد رأيك قبل ما تيجى ؟ إحنا اللي جبناكى غصب عنك . وراح يمرر شفتيه على صفحة خدها ويغمغم :

ـــ إكبرى وفلسي بابا .

ولمح نبيلة قادمة ترتدى بيجاما ضيقة ، تفضح مفاتن جسمها ، فاربد وجهه ، ورفع شفتيه عن جد هالة ، وقال :

_ واقفه يا نبيلة قدام الرجاله الغرب بالشكل ده ؟

ونظرت إلى نفسها في دهش وقالت:

_ فيه إيه يا بابا ؟ درعاتي متغطيه ورجليه متغطيه .

فقال وهو ينظر إلى صدرها البارز ، الذي يكاد يقفز من البيجاما : __ لكن . . لكن .

_لكن إيه بس يا بابا ! إذا لبسنا فستان بكم جابونيز قلتم دراعاتكو عريانه ، وإن لبسنا فستان قصير قلتو : عيب رجليكو عريانه ، وإن غطينا دراعتنا ورجلينا ما نعجبش.أمال نعمل إيه بس .

ورن جرس الباب الخارجي ، فدارت نبيلة على عقبيها ، وقال لها

أبوها :

_ ما تفتحيش انتي . خشي جوه . أنا اللي ح افتح .

وانطلق إلى الباب وفتحه ، وإذا بثلاث سيدات من الأسرة وأولادهن ، وخادم تحمل بقجة كبيرة ، فيها ثياب منزلية كيثيرة ، وحملت في يدها مشجبا به فستان للسهرة ، كانت هيئتهم تدل على أنهم جاءوا ليستقروا ، وما أن لمجهم حتى قال مرحبا :

_ أهلا وسهلا . اتفضلوا .

وارتفعت الأصوات من هنا وهناك :

_ أَلف مبروك. والله فرحنا قوى . أحلام دى بنتنا .

واندفعوا داخلين ، وما أن اجتازت الخادم الباب حتى أطلقت زغرودة مدوية ، جعلت الأم وأحلام تهرعان إلى الردهة .

ودارت القبلات ، وترددت التمنيات ، وقالت النسوة وهن يضربن ظهر أحلام فى حنان :

وانطلقوا إلى الغرف الداخلية ، وقال الأولاد :

_ أمال فين سامي ومراد وعاطف ؟

وتلفتت الأم ، فلما لم تجد أولادها قالت بصوت عال :

.... أمال الاولاد فين ؟

فقال الأب من بعيد:

ــ طلعوا السطح يتفرجوا ع الخروف لما يدبح .

ولم ينتظر الأولاد حتى تدعوهم الأم إلى اللحاق بأولادها ، بـل انطلقوا مهرولين وهم يتصايحون .

ورن الجرس الخارجي ، فقالت الأم :

_ افتحوا الباب على طول ، هو الباب يتقفل النهارده !

وحف الأب إلى الباب وفتحه ، فإذا بسيدة و بناتها وأولادها وقد حمل الأولاد تحت إبطهم لفائف فيها ثيابهم المنزلية ، بينا حملت إحدى الفتيات في يدها بقجة .

وابستسم ورحب بهم ، وأفسح لهم الطريسق ، وأسرعت الأم الاستقبالهم وقادتهم إلى الغرف الداخلية ، ليبدلوا ثيابهم ، وليرتدوا ما حملوه في اللفائف والبقجة .

وأحذت أم العروسة تغدو وتروح فى الشقة ، دون أن يكون لها هدف ، والتقت بزوجها بالقرب من الباب ، فقال لها :

_ مالهم مبدرين كده ؟!

فقالت الأم وهي تأخذ منه هالة :

ــ العاده كده . يباتوا معاها ليلة الحنه .. آخر ليله لها في بيت أبوها .

ــ يباتوا معاها مش يبجوا م النجمه .

واتجه الأب إلى بثر السلم ونادى :

نسسامي .. سامي .. انزل .

__ حاضر .

وهبط سامي في الدرج قفزا ، حتى بلغ أباه ، فقال :

__ نعم ؟

فقال الأب في صوت خافت :

__ قول للطباخ يعمل حسابه إن تلاتين ع الأقل ح يتغدوا ويتعشوا النهارده .

فقال سامي وهو يبتسم:

ــ هو عامل حسابه . قال لي إنه عارف العيله كويس .

ولاح فى عينى سامى كلام ، فقال له الأب يستدرجه للبوح له بما يحاول أن يكتمه :

__ وقال لك إيه كان ؟

فقال سامي وهو يخفض عينيه :

_ وقال لى إنه يعرف العيله أكثر منك . كنت عايز تعمل حاجه ع الضيق ، وهو ما وافقكش . ما حبش يكشفك .

... طب اجرى حصله فوق وبلاش لت معاه .

وعاد الأب إلى الشقه ، وجلس فى غرفة المكتب على كرسى من كراسى الفراش ، بحيث يرى ما يجرى فى الردهة ، ولمح زوجته فى غدو ورواح دون أن تفعل شيئا ، وسعت إليها الخادم الكبيرة ، التى جاءت مع الفوج الأول من الأسرة ، وقالت :

_ قال يا ستى مش ح تعجنوا الليله دى حنه ؟

فقالت الأم في استنكار:

__ حنه ! الحاجات دى ما قدمت بقى .

فقالت الخادم في استنكار:

_ هو يبقى فرح من غير حنه ! إذا كنتو مش ح تتحنوا نتحنا احنا .

_ والله ما عرف الحنه بتتباع فين !

_ عند العطارين .

ورنت إليها رنوة معبرة ، لم يفت الأم مدلولها ، فأخرجت ورقة مالية

صغيرة دفعت بها إليها وهي تقول:

_ اشترى الحنه اللي عايزاها.

وارتفع صوت نسوى ينادى :

ـــ يا ست يا أم العروسه .

فقالت الأم:

_ حاضر . جايه .

وظل الأب يرقب ما يجرى في الشقة ، وهو جالس في مكانه .

وراحت ساعات النهار تمر وثيدة ، حتى إن حسينا ضاق بنفسه ا واستشعر مللا ممضا ، ومالت الشمس للغروب ، فاجتمعت الحادمات في الردهة ، ورحن يغنين ، ويرقصن على نغمات طبلة ورق ، وخف الأولاد إليهم ينظرون .

ونظرت سوسن إلى الفتاة التي كانت ترقص شزرا ، وقالت في ازدراء :

ــ هو دا رقص ؟

وسمعت الفتاة سخرية سوسن فتوقفت وقالت :

ـــ مش عاجبك رقصى ؟! تعالى فرجينا .

وقبلت سوسن التحدى ، وتوسطت الحلقة وراحت ترقص ، وجعلت تهزكل عضلة فى جسمها ، حتى إن الفتاة راحت ترمقها فى غيظ ، وارتفع تصفيق الأولاد ، فخفت النسوة ينظرن مشدوهات ، ونظر الأب من بعيد ، ولأول مرة منذ الصباح رفت على شفتيه بسمة . والتفتت سيدة إلى أحلام وقالت لها :

والنفست سيده إلى احارم وقائت ها . ___ لو كانت كبيره شويه كانت لهفت العريس منك .

فقالت أحلام وهي تبتسم :

_ ما انا لحقت اتجوزت قبل ما تكبر.

ومر الوقت في ضحك ورقص وغناء وأكل ، وجاء الليل ومشت الأم إلى حيث كان زوجها ، وراحا يتناجيان ، قال :

_ فيه حد ما اتعشاش ؟

_ كلهم كلوا .

ـــ وح يناموا فين دول كلهم ؟

_ ما تحملش همهم . دلوقت يناموا مطرح ما هم قاعدين . ليله و تنفض .

_ عايزه الحق ؟ أنا تعبت خالص .

__ كلها الليله دى وبكره . ونستريج بعدها على طول . استحمل شويه .

فقال مواسيا نفسه:

ــ خلص الكتير ما بقى إلا القليل .

وارتفع صوت الخادم تنادى :

_ يا ست يا أم العروسه .

_ حاضر . جايه .

وانطلقت إليها ، فقالت الخادم:

__ ح نعجن الحنه في إيه ؟

_ عندك قروانه صغيره في الحمام اعجنيها فيها .

وجىء بالقروانه ، ووضعت فى الردهة ، وتحلق الحدم حـولها ، ووقف الأولاد ينظرون وراحت كل فتاة تلف حول كف زميلتها أشرطة فى تقاطع هندسى ساذج ، حتى إذا وضعت الحناء فى قبضة اليد ، بقى مكان الأشرطة دون خضاب ، فتبدو الكف منقوشة .

وتم لف الأشرطة ، وأغلفت الأكف على الحناء ، ثم ربطت القبضات بقطع من القماش الأبيض فبدت كرءوس الثوم الكبيرة !

__ ومشى الوسن إلى جفون الصغار ، فتمددوا فى أماكنهم حيث كانوا جالسين ، ولمحتهم أم العروسة فى دورانها الدائب فى الشقــة ، فقالت :

ــ يا عيني ! النوم غلبهم .

ونادت على الخدم وقالت لهم :

_ تعالوا افرشوا المراتب ونيموا الأولاد .

وذهبت الفتيات خلفها حيث صفت الحشايا ، بعضها فوق بعض ،

وقبضاتهن ملفوفة بالقماش ، والتفتت إليهن وقالت :

_ شيلوا .

وتقدمت إحداهن ، وحاولت أن تحمل حشية بين ذراعيها ، ولكنها أخفقت ، فقالت لها الأم :

_ أنا عارفه كنتوا مستعجلين على الحنه ليه ! استنى لما أساعدك .

وتقدمت الأم ورفعت الحشية ووضعتها على عاتق الخادم ، وفعلت مثل ذلك مع الأخريات .

وأحس الأب التعب يمشى فى أوصاله ، فأخذ وسادة فى يده وانطلق إلى الغرفة التى كدس فيها الأثاث ، ووضع الوسادة على مسند كرسى طويل ، ثم تمدد لينام .

وتململ فى رقدته ، وأحس ألما فى رقبته ، فراح يتحسسها بيده ، ولم يحتمل ما يقاسيه من تعب فى نومه ، فانتصب واقفا وأخذ الوسادة ووضعها على الأرض ، ثم رقد على البساط . وحن جسمه إلى الراحة فراح فى سبات .

وانقضى الليل.. وجاء النهار ، وخيل إليه أنه يسمع رنين جرس الباب الخارجي ، كان ما يسمعه أشبه بما يستشعره المستغرق في حلمه ، ولكنه فتح عينيه ، فإذا برنين الجرس يصك أذنيه .

ونهض لينطلق كعادته إلى المطبخ يأخذ وعاء اللبن ، فإذا به يحس ألما شديدا في ظهره فتأوه ، وكاد يضطجع على المقعد الطويل ، ولكن رنين الجرس دفعه إلى السير .

وأشرف على الردهة ونظر ، فإذا بأرضها قد غطيت بسأ جساد بشرية ، فاضطر أن يسير على أطراف أصابع قدميه ، وأن يقدر لرجّله قبل الخطو موضعها ، حتى لا يعلو جسم سيدة ، أو يدوس فى بطن غلام ! وبلغ المطبخ سلام ، وتناول الوعاء ، وعاد يشق طريقه فى مهارة وحرص بين الأجساد المتناثرة على الأرض ، المتشابكة من الأقدام ، حتى إذا بلغ الباب فتحه ، ومد يده بالوعاء ، فقال له الرجل :

__ ربنا يتمم بخير يا بيه .

_ متشكر .

وعاد يتلمس طريقه ، وإذا بالثياب قد انحسرت عن السيقان الممتلعة ، فنظر ، وانشغل بالنظر عن اكتشاف الطريق ، فكادت قدمه تتعتر ، وارتج اللبن في الوعاء ، فانتبه ، وراح يتقدم في حرص شديد .

ووقف يغلى اللبن ، وأخرج من النملية الزجاجة وراح يغسلها ، حتى إذا ما فار اللبن صبه فيها وأغلقها بالحلمة المطاط ، ثم اتجه إلى الصنبور وفتحه ، ووضع الزجاجة تحت الماء المتدفق .

وكان يمص الحلمة مصة بين لحظة وأخرى ليطمئن إلى مناسبة حرارة اللبن ، وخرج إلى الردهة ، وراح يجوس خلال النائمين وهو ينقب عن هالة ، ويده ممدودة بالزجاجة .

ولمح مراد نائما على الأرض وقد رفع رجليه وأسندهما إلى الحائط ، ورأى سوسن عارية البطن كعادتها ، فمد يده وأسدل ثيابها على بطنها ، وأخيرا عثر بزوجته وقد نامت على ذراعها وإلى جوارها هالة ، فوضع الحلمة في فم ابنته ، فإذا بها ترفع يديها وتقبض على الزجاجة ، فنظر مليا ثم انسل هاربا من المكان .

ودبت الحياة في الشقة وارتفعت الأصوات وتداخلت وامتزجت فانقلبت إلى ضوضاء تحطم الأعصاب ، وأقبل سامي على أبيه وقال :

__ ح اعمل لهم شاى في إيه ؟

فقال له أبوه في ضيق:

ــ ضروري يشربوا شاي ! إياك نفطرهم احنا .

_ فیه ناس طلبت شای ؟

فغمغم الأب مندهشا:

ــ طلبت ؟! هي قهوه ؟!

ثم رفع صوته وقال:

_ روح اعمل لهم شاى في حلة .. في طشت الغليه .

ـــوح اجيب لهم شاى وسكر منين ؟!

.... خد من ماما .

وتحرك سامي لينصرف ، وإذا بأبيه يقول له :

_ اسمع . قبل ما تعمل الشاى اطلع للطباخ قول لـه يحضر لهم الفطور .

ـــ حاضر .

وانصرف سامي وبقى الأب وحده في الغرفة ، فراح يعد على أصابعه وهو يحدث نفسه بصوت مسموع :

(أم العروسا

ــ غدا وعشا وفطور وغدا وعشا .

ولوى شفته السفلى فى ضيق ، وهز كتفيه فى استسلام . وقال وهو يدور على عقبيه .

ـــ واحد مصارينه خرجت ، كل واحد قال حته لقطتي .

الفصل السابع عشر

راح الأب يدور فى الغرفات ، ويلقى نظرة أخيرة على المكان ، فعما قليل تغيب الشمس ويتقاطر المدعوون من كل حدب وصوب ، وأقبل سامى يرتدى بذلة أنيقة ، وكرفاتة غالية ، يتبه فى مشيته ، وأطل من الشباك ينظر ، فبدا عليه أنه ينتظر أمرا .

فقال الأب في تبرم:

ـــ أنا تعبت خلاص . قل له يجيب اللي هو عايزه .

وأقبل عاطف يرتدى بنطلونا من القطيفة ، وقميصا تدلى فى أناقة فوق محيط البنطلون فأخفى جزءًا منه ، وراح سوزى يتقدمه وهو يبصبص بذيله ، ثم يتوقف حتى يلحق به ويتركه ، فيعود ليتقدمه ثم ينتظره .

وجاءت سوسن وقد قصت شعرها ، ووضعت الأحمر فى شفتيها و فى وجنتبها ، تخب فى ثوب منفوخ عند طرفه ، ضيق غاية الضيق عند خصرها . وأسرع عاطف إلى أبيه وقال له:

ـــ مش أنا حلو ؟

فقال الأب دون أن ينظر إليه:

_ حلو خالص .

فدنا من أبيه حتى التصق به وقال:

_ طب هات قرش بقى ،

فقال له الآب.

_ ح تعمل به إيه ؟ عندنا كل حاجه . اللي عندهم فرح ما ياخدوش فلوس .

وغمغم في صوت خافت :

ــ يدفعوا بس .

والتف أولاده حوَّله ، فقال لهم في ذعر :

ــ انتو ح تتكوموا في حته واحده ٢١ ما تتفرقوا .

وانتهز عاطف هذه الفرصة فقال :

ــ مش ح امشى إلا لما آخذ القرش.

فقال الأب لمراد:

ــ خد أخوك للطباخ يديه حتة هريسه .

ومد مراد يده وتناول يد عاطف ، فقالت سوسن :

ـــوانا يا بابا ؟

ـــ وانتي رؤحي معاهم .

والتفت سامي وقال:

ـــ يبقى المعازيم مش ح يلاقوا حاجه ياكلوها .

وخرج مراد وعاطف وسوسن والكلب في أثرهم وأقبل الفراش وقال :

ــ عايزين نأجر كان كام لمبه حمره .

فقال الأب في ضيق:

_ كفايه اللي أجرناه .

فقال الفراش ليقنعه:

_ الزينه اللي عملناها على واجهة البيت نورها فسخان . بقى نصرف المصاريف دى كلها ، ونيجى ع الآخر نبوظ الطبخه على بقرش ملح ! _ خلاص مش ح اعمل حاجه زياده عن اللي اتعمل . كفايه بقى . و سار الفراش إلى جواره و قال :

ـــ والميكرفون ؟

ــــ مالوش لزمه .

وهز الفراش كتفيه وانصرف ، وأطل سامى من الشباك وهتف فى فرح :

_ صحابي جم .

وخف الأب إلى الشباك ونظر ، فإذا بجمع كبير من تلاميذ المدارس مقبلين ، فقطب جبينه وقال :

__ مظاهره دی ا

والتفت إلى سامي وقال في استنكار :

__ إنت عزمت المدرسه كلها . ؟

ولم يرد سامي على استنكاره ، بل أسرع لاستقبال أصحابه .

وغادر الأب الشباك وهو مذهول ، وسار حتى غادر الغرفة ، فلمحته ; وجته ، فأسم عت إليه وقالت له :

- _ إنت لسه ما غيرتش هدومك ! الناس جت .
 - ـــ أنا تعبت خالص . ما بقاش فتى روح .
- _ خلص الكتير ما بقى الا القليل . كلها كام ساعه وننفض ، ونستر يح على طول .
 - ـــ وهدومي فين ؟
 - ـــ فى الأوده اللي كومنا فيها العفش .

وارتفع صوت ينادى :

- ـــ يا أم العروسه .. يا ست أم العروسه .
 - __ جايه . جايه حالا .

وذهب الأب يستبدل ثيابه ، وانطلقت أم العروسة تلبى رغبات المدعوات .

وتوافد الناس ، وازدحم المكان بالرجال والنساء والأطفال وجاءت فتيات صغيرات ، وإذا بنبيلة تسرع إليهن وترحب بهن وتبالغ في الترحيب ، فقد كن زميلاتها في المدرسة .

ونظرت الفتيات إلى ثوبها الأبيض في إعجاب ، وقالت إحداهن :

_ مش ناقصك إلا الطرحه البيضه وتبقى عروسه .

وقالت أخرى مستنكرة:

_ بس ! لو كانت الحكايه كده كان كل شيء بقى سهل .. الرك مش ع الطرحه .

فقالت الأولى:

_ أمال الرك على إيه ؟ .

فقالت الثانية وهي تضحك:

_ الركع العريس.

وماج المكان بالناس حتى لم يعد هناك موضع لقدم: وخرج الأب بعد أن ارتدى ثيابه الأنيقة ، وراح يجوس خلال الجموع وهو مأخوذ ، وأخذت صديقات نبيلة يرقصن ويغنين ، فسرى المرح وساد الفرح بهجة وحبور .

وقال قائل:

_ العريس .

فسرت همهمة ، واشرأبت الأعناق ، وصوبت العيون إلى الباب وتقدم جلال وأمه وأبوه وبعض فتيان وفتيات ، وكان شفيق بين القادمين .

وطفق شفيق يتلفت ، حتى وقعت عيناه على نبيلة ، فشق طريقه إليها ، وصافحها فى شوق و لم يكتف بالسر الذى أخذت عيناه تبوحان به ، بل زم شفتيه وفطنت نبيلة إلى أنه يبعث إليها بقبلة ، فغضت من بصرها ، وإن كانت ينابيع الغبطة تفجرت في أعماقها .

وانطلق جلال وأبوه وأمه ومن كان فى رفقتهم إلى الكراسي المذهبة ، واحتلوها . والتقى حسين بزوجته ، فقال لها همسا :

علب الملبس مش ح تكفى . مافيش إلا إننا نقدم الملبس على
 صوانى . يا دوب كل معزوم ياخد ملبسه .. أنا تعبت خالص .. إمتى
 المولد ده ينفض !

ـــ بعد الكتاب ، يطلعوا البوفيه ، وكل واحد يروح لحاله ، وينفض المولد ده .

وسحب رجل الأب من ذراعه ، وهو يقول له : المأذون جه ، اتفضل .

وجلس الأب وجلال يتصافحان ، وأسدل على يديهما منديل من الحرير ، وجلس المأذون بينهما يلقنهما صيغة الرباط المقدس ، ووقف شفيق ينظر ونبيلة إلى جواره .

والتقت عينا شفيق بعيني نبيلة ، فإذا بالحب يتحدث ، وإذا بكل حلجة من خوالجهما تنم عن العاطفة الجياشة ، ومد شفيق يده وقبض على يد نبيلة ، وراح يضغطها في رفق وحنان .

وأطلقت الزغاريد ، إيذانا بانتهاء العقد ، ودخل الفراشون يحملون أكواب الشراب الوردى على صوانى من الفضة ، وامتدت الأيـدى واختفى الشراب في الأجواف .

وقام جلال يصافح المدعوين ، وإذا بشفيق يجذبه من ذراعه ويقوده

إلى حيث كانت أحلام .

كانت أحلام في ثياب العرس ، وقد أسدات نقابا شفافا على وجهها ، فمد جلال يده ورفع النقاب ، ومال إليها وقبلها قبلة طويلة حارة ، وإذا بشفيق يلتفت إلى نبيلة ويهمس : عقبالنا .

والتقى حسين بزوجته ، فقالت له والدموع تترقرق في عينيها :

__ مبروك .

فقال لها:

ــ ــ تعبان ، متهيأ لي اني ح اقع .

_ خلاص . طالعين ع البوفيه ، وبعدها ح ينزلوا على طول . ووضع جلال يده في يد أحلام وسارا والزغاريد تدوى في المكان .

وتدفق المدعوون إلى السطح ، حيث الطعام ، و لم يبق في الشقة إلا الآثار ، وحسين منهار على مقعد من المقاعد الذهبية وزوجته إلى جواره تقول له :

- ــ ياللا نطلع . الناس تقول إيه !
- _ مش قادر . تعبت خالص . عايز أنام .
- _ قوم .. قوم . كلها ساعة . وتنام بعدها زى ما انت عايز .
 - ـــ اسبقيني . ح استريح دقيقتين وح حصلك .

وقامت أم العروسة ، وانطلقت إلى السطح ، وبقسى الأب مضطجعا ، وحن جسمه إلى الراحة ، فأغمض عينيه ، ومس أذنيه حفيف ثوب ، ووقع أقدام ، ففتح عينيه ونظر ، فإذا بشفيق مقبل وف

يده نبيلة .

ورفع رأسه وراح ينقل بصره بينهما وهو مكدود ، وتقدم شفيق خطوة ، وراح يجمع أطراف شجاعته ، ثم قال :

_ أنا جاى يا عمى أطلب منك نبيله .

فقال الأب دون تفكير:

ـــ روح الله يبارك لك فيها .

والتفت شفيق إلى نبيلة ، ومد يده وقبض على يدها ، ثم انصرفا مهرولين ، وقد اتسمت حركاتهما بالخفة والسرور .

وتمدد الأب فى المقعد الوثير ، وغفا قليلا ، ولكن سرعان ما استيقظ على دوى الزغاريد فهب من نومه ، وبدأ فكره يعمل ، فتذكر ما قاله شفيق : فصباح :

ــــ شفیق .. نبیله . الله .. دا خطبها منی وانا وافقت . إیه العمل دلوقت . ح اجهز تانی ۱۴ إزای ۴ ومنین ۱۴

وراح يهرول صوب باب الشقة وهو ينادى:

ـــ يا زينب .. يا أم العروسه .. تعالى شوفى اللي جرى .. مش ح نستر يح .. المولد ده مش ح ينفض .. مش ح ينفض أبدا .

وكان قد بلغ باب الشقة الخارجى ، فوقع بصره على أحلام وجلال وهما هابطان ، وشفيق ونبيلة خلفهما ، والرجال والنساء والأطفال يتدفقون خلفهما فى الدرج ، والزغاريد تجلجل والأصوات تتداخل فوقف ينظر وقد فغر فاه فى دهش ، ثم سقط مغشيا عليه .

مؤلفات الأستاذ عبد الحميد جودة السحار

```
_ أحمس بطل الاستقلال
  ترجم إلى الاندونيسية
                                  _ أبو ذر الغفارى
                              _ بلال مؤذن الرسول
  ( مجموعة أقاصيص )
                                    _ في الوظيفة
                               __ سعد بن أبي و قاص
  ( مجموعة أقاصيص )
                                _ همزات الشياطين
                             _ أبناء أبى بكر الصديق
                                  ___ في قافلة الزمان
            ( رواية )
                                    __ أميرة قرطبة
            (قصة )
                                  _ النقاب الأزرق
            (قصة )
                             _ المسيح عيسي بن مريم
                                  _ أهل بيت النبي
                                 __ محمد رسول الله
   تأليف: مولاي محمد على
ترجمة بالاشتراك مع مصطفى فهمى
  _ قصص من الكتب المقدسة ( مجموعة أقاصيص )
  ٠ مجموعة أقاصيص )
                                   _ صدى السنين
ترجمت إلى الاندونيسية
                                    _ حياة الحسين
```

(رواية)	ـــ الشارع الجديد
(قصة)	ـــ و کان مساء
(قصّة)	أذرع وسيقان
(قصة)	_ المستنقع
(مجموعة أقاصيص)	_ ليلة عاصفة
(رواية)	_ الحصاد
(قصة)	_ جسر الشيطان
(قصة)	ـــ النصف الآخر
(رواية)	_ السهول البيض
(قصة)	ـــ أم العروسة
(قصة)	ـــ قلعة الأبطال
	ـــ وعد الله وإسرائيل
	ــ عمر بن عبد العزيز
	_ هذه حياتي
	_ الحفيد
	_ ذكريات سينهائية
	ــ كشك الموسيقي
	_ خفقات قلب
	ـــ صور وذكريا <i>ت</i>
	ــ الإسراء والمعراج
	ــ القصة من خلال تجاربي الذاتية
	_ عدو البشر
	ـــ أبطال الجزيرة الخضراء
	ـــ النمر

_ الله اكبر

_ ثلاثة رجال في حياتها

_ مسجد الرسول

__ فات الميعاد

_ آدم إلى الأبد

__ العرب في أوربا

ــــ الدستور من القرآن العظيم

السيرة النبوية في ٢٠ جزءًا

١١ ــ الهجرة	١ _ إبراهيم أبو الأنبياء
۱۲ ــ غزوة بدر	٢ _ هاجر المصرية أم العرب
١٣ ــ غزوة أحد	٣ _ بنو إسمَاعيل
١٤ ــ غزوة الخندق	٤ _ العدنانيون
١٥ _ صلح الحديبية	۵ _ قریش
١٦ _ فتح مكة	٦ مولد الرسول
١٧ ـــ غزوة تبوك	۷ اليتم
١٨ ـــ عام الوفود	٨ _ خديجة بنت خويلد
٩ إ حجة الوداع	٩ ــ دعوة إبراهيم
٢٠ ـــ وفاة الرسول	٠١ _ عام الحزن

مكت بترمص*ت ر* ۳ شارع كامل صدّ تى - البخالا